

## MATTHIU

### Matthiu 1

1 Abraham nac mpouh khatni David nac mpouh Jisu Khrista lungcs key-mei kairiang chakh:

2 Abraham rui Isak puanc e; Isak rui Jakob puanc e; Jakob rui Juda puanc e;

3 Juda rui Tamar khou rui Perez lev Zera puanc e; Perez rui Hezron puanc e; Hezron rui Aram puanc e;

4 Aram rui Aminadab puanc e; Aminadab rui Nashon puanc e; Nashon rui Salmon puanc e;

5 Salmon rui Rahab khou rui Boaz puanc e; Boaz rui Rut khou rui Obed puanc e; Obed rui Jessi puanc e.

6 Jessi rui guangh David puanc e; David rui Uria now swloumeipui khou rui Solomon puanc e;

7 Solomon rui Rehoboam puanc e; Rehoboam rui Abija puanc e; Abija rui Asa puanc e;

8 Asa rui Jehoshaphat puanc e; Jehoshaphat rui Jehoram puanc e; Jehoram rui Uzzia puanc e;

9 Uzzia rui Jotham puanc e; Jotham rui Ahaz puanc e; Ahaz rui Hezekia puanc e;

10 Hezekia rui Manase puanc e; Manase rui Amaan puanc e; Amaan rui Josia puanc e; Josia rui Jehoiakhin khatni kachana nunc Babilon thangc nym tatpui ganv khou puanc e.

12 Babilon thangc rui guang datpui tangv Jekhonia rui Shealtiel puanc e; Shealtiel rui Zerubbabel puanc e;

13 Zerubbabel rui Abiud puanc e; Abiud rui Eliakim puanc e; Eliakim rui Azor puanc e;

14 Azor rui Sadok puanc e; Sadok rui Akhim puanc e; Akhim rui Eliud puanc e;

15 Eliud rui Eleazar puanc e; Eleazar rui Matthan puanc e; Matthan rui Jakob puanc e;

16 Jakob rui Khrista twna kawmei Jisu ta puanhmei Meri gaanv Josep puanc e.

17 Kurtina Abraham khou rui David nganvmei meickin ruhna padeih e, David khou rui Babilon thangc tatmei nganv meickin ruhna padeih e, khatni Babilon thangc tatmei khou rui Khrista nganvmei khou meickin ruhna padeih e.

### **Jisu Khrista Puanhmei**

*(Luk 2.1-7)*

18 Jisu Khrista puanhmei kiu mi hei kumcna pat khwan e. Kapui Meri tei Josep khaamv swna, kaney guang lunge kariu makna bam khou, Meri tei Bumaengh Nthanmei ngamv khou rui kapumc nrit the twmei thay pat the.

19 Kagaanv Josep tei ravchaptatmeipu lapui zaeng rui, Meri ta kandihmei mav khou tichangamclou nii mak lana kalat kalu maekna taanlou ni the twna kalung dinglou bam khwan e.

20 Kamei mi kumcna kakhanh bam khou, zauclo, Poubauhmei tuang baanchara akhat kamang khou guangna sa khwan e, “David nac mpouh Josep, nang Meri ta laa khang ping riu, kalam thu kamei kapumc nrit bammei tei Bumaengh Nthanmei ngamv khou rui de.

21 Kamei nac mpouh puanc puni, kumna nang rui kazanc Jisu twna phuak nina e; kalam thu kamei rui kamei nunc ta kaniw paap guay khou rui kanlou puni.”

22-23 “Zauclo, liuchang tei kapumc nrit lana nah mpouh akhat puanc puni, kumna kazanc Immanuel kaw puni,” (mi kabac kiu thu “Ravguangc aniu ta bam nduanghlou bam e” twna e) twna Poubauhmei rui muhzwng khou rui salou kanmei tei tiguang tangh khang mi guay hei patmei tuang khwan e.

24 Josep tei zipthauna, Poubauhmei tuang baanchara rui samei tei piuna Meri ta kakai khou laaguang the.

25 Tiki mi nac mpouh tei puanh mak saanv kamei kanow khou tatlou mak khwan e. Kumna kamei rui kazanc Jisu twna phuaklou the.

## **Matthiu 2**

1 Herod guangh sw bammei ganv khou, Judia kandih tuang Bethlehem namv khou Jisu puanc khwan e. Khoutei neihpat thangc rui Magi nunc Jerusalem khou guangna,

2 “Jihudimei guangc puanhmei kiu tabui thangc tei cho? Kamei puanc the twmei dinhmei gaanchuangcna ta aniw neihpat thangc how the. Kum thena kata kalum khang aniw guang tuang e,” twna Herod khou thanv the.

3 Mi tei chu la khou Guangh Herod khatni Jerusalemmei guay kaniw lung katuakc the.

4 Jihudimei tuang amuh daihmei nunc khatni Riakdanv dinhpouc nunc ta kaw kaduaina Khrista kiu tabui thangc puanc puni cho twna kamei rui kaniw khou thanv the.

5 Kaniw rui sa the, “Judia tuang Bethlehem khou e; kalam thu muhzwng rui mi kumna hylou e:

6 ‘He Juda tuang Bethlehem, nang hei Juda tuang kapy singhmei kaidai pang khou, nthyam liangmei hamh e; kalam thu, Isaraelmei amei ta gaengclou nimeipu, nang khou rui pat puni.”

7 Mi tangv tei Herod rui nkamhna Magi nunc ta tei kawna, gaanchuangcna kiu patmei ganv kiu kaniw khou rui thanv nthan the.

8 Kamei rui kaniw ta Bethlehem thangc ndiulouna sa the, “Nangniw tatna ngana ta kiu phu mincna phu zauc tho; kumna phu tow e thei akhou ni dinclou o, ai ni tatna kata kalum ni.”

9 Guangh lat tei chu lana kaniw tat the. Neihpat thangc kaniw how kanmei gaanchuangcna tei mi angana tei bammei bamv rue khou tei guang ding tangh mak saanv kaniw hu kasuakcna tat khwan e.

10 Gaanchuangcna tei how pwkhou kaniw sa dat khang thay makmei ramneila neihla the.

11 Kai lungc khou tei gut pwkhou, mi angana tei lev kapui Meri ta how the, kumna kaniw nkhum laamv keyna kata kalum the. Kaniw tuang lanvkhuk laanc patna kachaekc, agaw khatni mir kaipat swna katlou the.

12 Herod daeng thangc tat dat mak khang kaniw mang khou dincloou tina baihmei chaeng rui kaniw kandic thangc tat dat kan the.

### **Izip Thangc Kaithiley Tatmei**

13 Kaniw tei tat kanmei tangv, Poubauhmei tuang baanchara Josep mang khou guangna sa the, “Thau tho, angana lev kapui ta nduanghna Izip thangc pak tat tho. Ai rui sa dal mak saanv mi khou lei bam o, kalam thu mi nac ta tei swluai khang Herod rui phu puni the.”

14 Josep tei thauna, angana lev kapui ta nduanghna zingbangc thangc Izip thangc tat kan the.

15 Herod theih mak saanv mi khou tei bamlou kan the. Mi hei “Ai rui Izip khou rui anac mpouh ta kaw guang puni,” twna Poubauhmei tuang muczwng rui saloumei tei guang tangc nthuih khang e.

### **Alauc nunc ta Dowluamei**

16 Mi nunc tei rui kata guat the twmei thay la khou, Herod tei kareic thauna kalung puamc the, kumna kaniw khou rui thayloumei ganv tei chakna, Bethlehem khatni mi daeng khou naime, tingkwm kanei tanghmei khatni mi bangcmei nggaanvmei nac guay ta rihmei ndiulouna swluai the.

17-18 “Rama khou khwan akhat chu e, kapmei lev kangiuhmei khwan e, Rachel kanac nunc ta huayna kap bam e, swm gay dat ngam mak khe, kanac nunc theic ngam the,” twna muhzwng Jeremia rui saloumei tei mi hei kumcna guang tangc kan the.

### **Izip khou rui Guang Datmei**

19 Herod theic kan pwkhou, Izip khou Poubauhmei tuang baanchara Josep mang khou guangna,

20 “Thau tho, angana lev kapui ta nduanghna Isarael kandic thangc tat dat tho; angana ti hei swluai khang phu bammei nunc tei theic kan the.” twna sa the.

21 Kumna kamei thauna, angana lev kapui ta nduanghna Isarael kandic khou guang dat the.

22 Tiki Akhilau rui kapu Herod phaen lynna Judia khou guangh sw bam e twmei chu lana kamei mi khou tei guang khang ping the. Kamang khou dinclou tina, kamei Galili ramv thangc ley tat kan the.

23 Kumna Nazareth kawmei kaidai khou guang lunge the. “Kata Nazarethmei twna kaw puni,” twna muhzwng nunc rui saloumei tei mi hei kumcna guang tangc kan the.

## **Duiluploumei Jahon**

### **Matthiu 3**

1 Mi douc tei duiluploumei Jahon Judia tuang tazikramv khou guangna,

2 “lungh laic tho, Ravguangc guangcdic ana the,” twna dine the.

3 “Poubauhmei guang pw the, kakhang chaeng sw tho, kakhang chaeng sw ntyng tho,’ twna gaanv khat tazikramv khou kauc bam e,” twna muhzwng Isaia rui saloumei tei kamei hei the.

4 Jahon tei guaikuan hiw pheyy piu e, ramhgic bungkam kamc e, khatni nkav lev nwm khuaicdui rui kataek sw e.

5 Jerusalem, Judia kapwm, khatni Jordan duiriang gaengv zaengv kapwm khou rui meic nunc kadaeng khou guang khwan e.

6 Kaniw paap kalauhna, kaniw ta Jahon rui Jordan duiriang khou duiluplou khwan e.

7 Pharisime khatni Saddukime meic mpeyna duiluplou khang guang bammei ta how la khou, Jahon rui kaniw khou sa the, “Nangniw nrui nac nunc! Guang nime latzan khou rui pak la tho twna nangniw khou thow rui sa pwna cho?

8 Nangniw tuang paap guay khou rui lungh laih the twmei taanv rui lyan pat ro.

9 Aniw pu Abraham nai e guang nime dandi khou rui duak puni de twna nangniw ning la riu. Mi ntau guay ti hei Abraham nac nunc tiswlou nuh de.

10 Ntaw ni thing bang guay bangbi khou nrih lou bam the, kumna kathai gaymei nthai makmei bang guay ta tei gai bauna mai khou phaiclou puni

11 “Nangniw lungh laic the twmei ndauhna, ai rui nangniw ta dui rui lup- lou the. Tiki akhang suangc daihmeipu athei khou guang e; ai thu katuang phay-thuapc na sini sin tat khang biuhmei hamh e. Kamei rui nangniw ta Bumaengh Nthanmei rui khatni mai rui luplou puni.

12 Kabaanc khou nzamh sin e; kagung guay tei laudy bamv khou rui hun ganc puni. Katak guay tei saamh khou phungc guang puni; kagung guay tei amit dat makmei mai khou ntei puni.”

13 Duilup khang, Jisu Galili khou rui Jordan khou, Jahon daeng khou guang the.

14 Tiki Jahon rui kata khaamna, “Nang rui ata duiluplou khang diki, ai rui luplou khang guang tu cho?” twna sa the.

15 Jisu rui mundawna sa the, “Ntaw thu nuhlou tho; mi hei kumcna ravchap-tatmei taanv mung guay tei taanc nthuihlou nina di the.” Khoutei Jahon nuhlou the.

16 Jisu tei duiluploupui lev, dui khou rui thau dat the. Khoutei tingkauh laanc pat the, kumna Ravguangc Bumaengc akhouhna kumcna keyna kakhou towlουμεi ta kamei how the.

17 Khoutei tingkauh thangc rui, “Mi hei ai rui nzianmei alung kwnmei nac mpouh e,” twna khwan akhat rui sa the.

**Jisu ta Nthiammei** (*Mark 1.12-13; Luk 4.1-13*)

#### **Matthiu 4**

1 Mi tangv ravsic rui nthiam khang, Bumaengh rui Jisu ta tazikramv khou nduangh kulou khwan e.

2 Kalaanv riakdei, zingbangc riakdei munthianghmei tangv, kamei ndaapc the.

3 Khoutei nthiammeipu guangna kakhou sa the, “Nang Ravguangc nac mpouh e thei, mi tauc but nunc hei ntyan guanh khang sa tio.”

4 Jisu rui mundawna sa the, “Ntyan na rui meic ringh mak ge, tiki Ravguangc mwang khou rui patmei lat guay tei rui ringh khang de’ twa hylouna nai e.”

5 Mi tangv, ravsic tei rui kata nthanmei kaidai khou nduangh gutna ravkai twan pinh khou tidinglou the.

6 Khoutei ravsic tei rui sa the, “Nang Ravguangc nac mpouh e thei, cham key o, ‘Nang phay na sini ntau khou kadyang kasic mak khang, kaniw rui nang ta kapuanglou khang, kamei rui katuang baanchara nunc ta ndiulou puni,’ twa hylouna nai e.”

7 Jisu rui kakhou sa the, “Nang Racguangc Poubauhmei ta nchanv lak nina e,’ twa ni hylouna nai e.”

8 Ravsic tei Jisu ta kauh nganvmei chynghbut akhat khou nduangh kuna mbaanv guangcdic guay khatni mi tuang chingkhuihmei guay lyanlou dat re.

9 Kumna kamei rui, “Nang nkhum laamv keyna ata kalum e thei, mi guay hei nang khang tii puni,” twa kamei rui sa the.

10 Khoutei Jisu rui kakhou sa the, “Tat kan o, Seitaan! ‘Nang Racguangc Poubauhmei ta kalum nina e, katuang siamruai na sw nina e,’ twa hylouna nai e.”

11 Khoutei ravsic tei Jisu ta mpatlou the, kumna kauh baanchara nunc guang-na kasiamruai sw the.

### **Jisu Chamv Dine Kahouhmei** (*Mark 1.14-15; Luk 4.14-15*)

12 Jahon ta nym kan the twmei chu lana, Jisu Galili thangc tat dat kan the.

13 Kumna kamei Nazareth mpat- louna, Zebulun khatni Naphtali ramv khou, zehlat daeng khou naime Kapharnahum kaidai khou guang lunge kan the.

14 Hei tei muhzwng Isaia rui mi hei kumcna saloumei tei guang tangh khang e:

15 “Zebulun ramv khatni Naphtali ramv, Galili duipui biak thangc, Jordan paengc thangc naime, Zentelmei nunc bamv Galili!

16 Zinghmei khou bammei nunc, gaanhriw daihmei how the. Theihmei lim kandic khou bammei nunc khang gaanclou the.”

17 Jisu mi ganv khou tei rui thauna, “Nangniw lungh laic tho, tingkauh guang-cdic ana the,” twna dine thau the.

**Reyme Ziap nunc ta Kawmei** (*Mark 1.16-20; Luk 5.1-11*)

18 Jisu Galili zeiclat paengc khou tat guang khou, Pitar twna kawmei Simon lev kakainac Andriu zeihlat khou tei chiakc phaic bammei ta how the. Kaney tei achuanh khwan e.

19 Khoutei, “Athei lay o, ai rui nangney ta meic nymmei achuanc tiswlou puni,” twna Jisu rui kaney khou sa the.

20 Mi dyng khou tei kaney tuang chiakc guay ganclouna Jisu thei lay the.

21 Mi khou tei rui tat pat dat pwkhou, baihmei chana gaanv nei—Zebedi nac Jakob lev kakainac Jahon, kapu Zebedi lev hih lunge khou kaniw chiak kasiamh bammei ta Jisu how the. Kumna Jisu rui kaney ta kaw the.

22 Mi dyng khou tei hih tei lev kaney pu ta ganclouna Jisu thei lay the.

**Jisu rui Nnaumei ta Tigayloumei** (*Luk 6.17-19*)

23 Jisu tei sinagog guay khou nchamlouna, guanghdc tuang gaychamv dincna, khatni meic nunc tuang suan baengmei khatni sunu naunianmei guay tigaylouna Galili ramv kapwm khou ruanlou the.

24 Kachamv tei Suria kapwm khou chu lik the, kumna nnaumei guay, ravpuat kazaat baih baihmei khou rui sunu suan baengmei guay, ravsic gutmei, theilanhmei, khatni kapaek theihmei guay ta kadaeng khou phungc guang the, kumna mi guay tei kamei rui tigaylou the.

25 Galili, Dekapolis, Jerusalem, Judia khatni Jordan paengc khou rui meic kangdai Jisu thei lay the.

**Zaenggaymei nunc** (*Luk 6.20-23*)



## Matthiu 5

1 Jisu rui meic kangdai ta tei how lana, luanghbut khou ku the, kumna kamei dungkey kan pwkhou, kaziap nunc kadaeng khou guang the.

2 Khoutei kamei rui kaniw khou nchamlouna sa the:

3 “Bumaengh khou lungcsimei nunc tei zaenggaymei nunc e; tingkauh guangcdic hei kaniw khang e.

4 Zaengsi bammei nunc tei zaenggaymei nunc e; kaniw ta swmlou puni.

5 Lungh niamhmei nunc tei zaenggaymei nunc e; kandih hei kaniw laa puni.

6 Ravchap tat khang ndaapc tari bammei nunc tei zaenggaymei nunc e; kaniw ta tipianlou puni.

7 Zauzianthaymei nunc tei zaenggaymei nunc e; kaniw ta zauc-nzianlou puni.

8 Lungh nthanmei nunc tei zaenggaymei nunc e; kaniw Ravguangc ta how puni.

9 Chaguatpouc nunc tei zaenggaymei nunc e, kaniw Ravguangc nac sw puni.

10 Ravchaptatmei khang rui raimei khaengv bammei nunc tei zaenggaymei nunc e; tingkauh guangcdic hei kaniw khang e.

11 “Azaeng rui luh kasicloumei, rai riumei khatni simei nkham ndamloumei ariwmei nunc tei zanggaymei nunc e.

12 Neihla o khatni zaenggay o, kalam thu tingkauh thangc nangniw swan daic e. Nangniw hu khou lungclou kanmei muhzwng nunc ta ni hei tei kumcna sw kanmei tuang e.

**Ntey khatni Gaanhmei** (*Mark 9.50; Luk 14.34-35*)

13 “Nangniw hei kandihmei khang ntey e. Tiki ntey tei nsamv kan e thei, akumhna mi ta tei tibumc dat nina cho? Hei tei gancouna phay rui ni bin khang hamhna ramh baihmei khat na khang sini gaeng dat mak khe.

14 “Nangniw mbaanv khang gaanhmei e. chynghbut rue khou naimei kaidai tei nkamh ngam mak ge.

15 Meic nunc rui maibungc daanclouna nggiuh rui gumbinlou mak ge tiki kahyang ruc khou louna kainung kapwm tigaanclou e.

16 Hei tei kumcna, nangniw riw meic nunc hu khou tigaanc o. Kum pwkhou nangniw tuang gaymei taanv tei kaniw how lana tingkauh thangc bammei nangniw Pu hym tidaih khang e.

### **Riakdanv Ti-nthuihloumei lam khou**

17 “Ai hei Riakdanv khatni muhzwng nunc rui saloumei tei swmaan khang guang tuang e twna ning riu; hei tei swmaan khang ai guang tu hamh e, ti-nthuihlou khang de.

18 Ai rui nangniw khou kaling siakna sa tuang e: Riakdanv khou hyloumei kapwmna tei tiguang tangc nthuih mak saanv, mi khou tei hyloumei kahiak launa sini, tingpuk kandih maan mak saanv, maan ni tu hamh e.

19 Riakdanv tuang nthyam liangmei latdanv akhat tei sini ngaek makpui mei khatni ngaek mak khang nchamloupui mei ta tei tingkauh guangcdic khou nthyam liangpui mei kaw puni, tiki mi latdanv guay tei piuna khatni nchamlouna bampui mei ta tei tingkauh guangcdic khou meicdaihmei kaw puni.

20 Hei zaeng rui, ai rui nangniw khou sa tuang e: nangniw tuang ravchaptatmei tei Pharisimei nunc khatni Riakdanv dinhpouc nunc tuang suangc mbu mak ge thei, nangniw tingkauh guangcdic khat sini gut ni tu hamh e.

### **Meicdowmei lam khou**

21 “Meicdow lak nina e, meicdowmei rue khou latzan nai e,’ twna reydouc pupouh nunc khou salou kanmei tei nangniw thay the.

22 Tiki ai rui nangniw khou sa tuang e, kachana ruc khou lungh puamhpui mei ruc khou latzan nai e. Kachana ta ‘Raka’ twna kawpui mei ta tei pei khou zay guang puni, khatni ‘Nang mpangmei’ twna sapui mei tei maikwam key puni.

23 Hei zaeng rui, nang tuang puatkat katlou khang nang ravchabamv khou guang bam khou, nang chana rui nang rue khou lungh nuanclopui tuang naimei tei ningtow e thei,

24 nang tuang puatkat tei ravchabamv mav khou tei lou due lana nang chana daeng thangc tatna kamei lev guatc sw rey o; mi tangv rui nang tuang puatkat tei guang kat dat ro.

25 “Thowkumhmei rui nang rue khou latzankai khou lat phungclou e thei, latzankai ku tangh mak khou katumcna kamei lev guatc sw dat ro. Hamh e thei, nang ta latzanpouc khou tiilouna, latzanpouc rui khangtan khou tiilouna nang ta kangkai khou gut lou puni.

Ai rui nang khou kaling siakna sa tuang e: Nkhamhmei syankangh paek tei nganvna di ti mak saanv nang mi khou tei rui pat dat ni tu hamh the.

### **Lungcmaanvmei lam khou**

27 “Lungcmaanv lak nina e’ twna samei tei nangniw thay the.

28 Tiki ai rui nangniw khou sa e: Ntumei akhat ta nthahmei mikzaw rui zauhpui mei tei kalung khou mi pui tei lev lungcmaanv tang the.

29 Hei zaeng rui, nang tuang nzat mik rui nang ta paapc tisw e thei, hei tei lat ganc o. Nang pumc kapwm tei maikwam khou phaicloumei suangc nang pumc nanw akhat maan kanmei tei rui nang khang gay e.

30 Nang tuang nzat baanc rui nang ta paapc tisw e thei, hei tei dan ganc o. Nang pumc kapwm maikwam tatmei suangc nang pumc nanw maanmei tei rui nang khang gay e.

### **Nowtaanmei lam khou** (*Metthiu 19.9; Mark 10.11-12; Luk 16.18*)

31 “Thow pw ni nowtaan e thei, nowtaanmei latrik hyna kanow khang tii nina e,’ twna ni sa e.

32 Tiki ai rui nangniw khou sa e: Lungcmaanvpui zaeng rui hamhna, nowtaanpui mei tei kanow ta lungcmaanv khang tiswlou e; kumna taanloumeipui ta tei kaw datmeipu tei ni lungcmaanvmei e.

### **Latryan Swmei lam khou**

33 “Nang saraamcna latryan sw lak nina e, nang rui Poubauhmei khou swlou kanmei latryan tei ngaek nina e,’ twna reyduc pupouh nunc khou salou kanmei tei nangniw thay the.

34 Tiki ai rui nangniw khou sa e: Nangniw syangdyng ding lak nina e. Tingkauh ta zay saancna ni ding riu, mi hei Ravguangc bamv e;

35 kandih ta ni zay saancna ding riu, mi hei kaphayba bamv e; Jerusalem ta ni zay saancna ding lak nina e, mi hei Guangh Daihmei tuang kaidai e.

36 Nang py ta zay saancna ni syangdyng ding lak nina e, nang rui nang sam lu akhat na ta sini sw mphwan ni sw mphwan ngam mak, sw miw ni sw miw ngam mak ge.

37 ‘Kum ni’ tw e thei ‘kum ni’ twna taan o; ‘kum lak ge’ tw e thei ‘kum lak ge’ twna taan o. Mi khou rui twanmei guay tei simeipu khou rui e.

**Khwm Khangmei lam khou** (*Luk 6.29-30*)

38 “Mik akhat khang mik akhat, huh akhat khang huh akhat’ twna samei tei nangniw thay the.

39 Tiki ai rui nangniw khou sa e: Meicsimei ta akhangv riu. Nang biangc nzat biak kaphi pw e thei, mbai biak ni nzuhlou tio.

40 Nang ta latzankai khou phungc kuna nang tuang thiula asut khang sw pw e thei, kakhang nang tuang pheyy ni tii tio.

41 Nang ta mail akhat tat khang nym zay pw e thei, kamei lev mail kanei tatlou tio.

42 Nang khou ney pw e thei tii tio, pou khang ney pw e thei tipoulou tio.

**Nzianmei lam khou** (*Luk 6.27-28,32-36*)

43 “Nang tuang kaining kaigeimeimei ta nzian nina e, nang ta zauczihmei ta karaeng nina e,’ twna samei tei nangniw thay the.

44 Tiki ai rui nangniw khou sa e: Nang ta zauczihmei ta nzian nina e khatni nang ta sw kasicpui mei khang tei huayneylou nina e.

45 Mi hei kumcna nangniw tingkauh thangc bammei nangniw Pu nac nunc sw khang e. Kalam thu kamei thu meicsimei khou ni, meicgaymei khou ni katuang neicmik tisouclou e, ravchaptatmei khou ni, ravchap tat makmei khou ni ting tiriulou e.

46 Nangniw ta nzianmei ta na nangniw nzian e thei, nangniw khang tabui swan naina cho? Dihkhav kakhamei nunc sini kaniw ta nzianmei ta thu nzian muay de.

47 Nangniw pam ta na nangniw zaw gaanc riu e thei, meic baihmei suangc nangniw tabui mbu tuang naina cho? Zentelmei nunc ni hei tei thu sw muay de.

48 Tingkauh thangc bammei nangniw Pu nthuihmei kumcna nangniw ni nthuih nina e.”

### **Lungcsime i khang Tiime i lam khou**

#### **Matthiu 6**

1 “Nangniw tuang ravchaptatmei taanv tei meic nunc rui how khang rui taanc lyan mak khang ramhthay o.

2 Mi kumcna taanc e thei, tingkauh thangc bammei nangniw Pu khou rui nangniw swan laatow ni tu hamh e.

3 “Lungcsime i nunc khang nang rui tii patpui ganv khou, gaylwn swmei nunc rui meic nunc rui thuanclou pw khang rui sinagog khou khatni chaengdai khou sw lyanmei tei kumcna nang sw riu. Ai rui nangniw khou kaling siakna sa tuang e: kaniw tuang swan kaniw laa tang the.

3 Nang rui lungcsime i khang tiipui ganv khou, nang tuang nzat baanc rui tiime i tei mbai baanc ta tithay riu;

4 nang rui tiime i tei meic baihmei khou tithay khang hamh e. Kum pwkhou, meic thay makna taanhmei tei thaymei nang Pu rui nang khang swan tii puni.

### **Huayneyme i lam khou (Luk 11.2-4)**

5 Nangniw huayneypui ganv khou, gaylwnswmei nunc tei kumh riu; kalam thu kaniw tei meic nunc rui how khang sinagog khou khatni meic geihmei chaengdai kwn kwn khou dingna huayney nii e. Ai rui nangniw khou kaling siakna sa tuang e: Kaniw tei kaniw tuang swan laa tang the.

6 Tiki nang huayneypui ganv khou, nang kai lungc khou gutna kaikhamv mbanghlouna, mik rui how makmei nang Pu khou huayney o. Kum pwkhou, meic thay makna taanhmei ta howmei nang Pu rui tiilou puni.

7 “Kumna nangniw huayney khou, Zentelmei nunc rui kabah maekmei lat kaluaih kaluaihna suaic bammei tei kumcna sw riu;

8 kalam thu nangniw ney mak khou rui nangniw khang kage naimei tei nangniw Pu rui thay rey bam tuang de.

9 “Hei zaeng rui, mi hei kumcna huayney o: ‘Tingkauh thangc bammei aniw Pu, nang zanc nthanmei sw diu;

10 Nang guangcdic guang diu, tingkauh thangc kumc kandih khou ni, Nang ningmei sw diu.

11 Aniw khang neih khat khang biuhmei taektw aseic tiilou o.

12 Aniw rui aniw khou nkhuailoumei nunc khuay kuakloumei kumcna, aniw khuay kuaklou o.

13 Aniw ta nthiammei khou zaylou rio, tiki simeipu khou rui gaeklou o.’

14 “Kalam thu meic nunc rui nangniw khou nkhuailoumei tei nangniw rui kuaklou e thei, tingkauh thangc bammei nangniw Pu rui ni nangniw khuay kuaklou puni.

15 Tiki nangniw rui meic nunc khuay kuaklou mak ge thei, nangniw Pu rui ni nangniw khuay kuaklou lak ge.

### **Munthianghmei lam khou**

16 “Nangniw munthiangh khou, gaylwn swmei nunc kumcna nchung suipui lwn sw riu. Kalam thu kaniw munthiangc e twmei meic nunc thay kan diu khang

kaniw sw e. Ai rui nangniw khou kaling siakna sa tuang e: Kaniw thu kaniw tuang swan laa tang the.

17 Tiki nang munthiangh khou, nang py thauh tey o khatni nang zaw phi o.

18 Kum pwkhou, nang munthiangc e twmei meic nunc khou lyan makna, tiki mik rui how makmei tingkauh thangc bammei, meic thay makna taanhmei guay howmei nang Pu rui nang taanv thai tiilou puni.

### **Tingkauh thangc Lanv Ryme** (*Luk 11. 33-34*)

19 “Nangniw nthumc rui, sauhmei rui, khatni kaihouhmei rui sw maanpui bamv mi kandic khou hei nangniw khang lanv ry riu.

20 Tiki nthumc rui, sauhmei rui, khatni kaihouhmei rui swmaan dat makpui bamv tingkauh thangc nangniw khang lanv ry o.

21 Kalam thu nang tuang lanv naipui bamv khou tei nang lung ni nai puni.

### **Meic Punc tuang Thaucmai** (*Luk 11.34-36*)

22 “Mik hei meic punc tuang thaucmai e. Nang mik gay ti thei nang punc kapwm gaanc kah ka puni.

23 Tiki nang mik si ti thei nang punc kapwm zingh zing puni. Hei tei kumcna nang khou naimei gaanhmei tei zingc e thei nang punc tei adih zingc puni tha!

### **Ravguangc khatni Lanv Bangc**

24 “Meic gaanv khat na sini kaipouc kanei bangc sw nuh mak ge. Kamei rui gaanv khat ta nzian e thei, gaanv khat ta karaeng puni. Hamh e thei gaanv khat ta kungc e thei, gaanv khat ta ntaamv puni. Nangniw syan lev Ravguangc bangc sw kariu nuh mak ge.

25 “Hei zaeng rui nangniw khou sapui tuang e: Nangniw ringh khang tu zangv khang rui khatni nangniw punc khang nsuay mbaanv khang rui lungk katuakc bam riu. Ringhmei hei taektw khang suangc nthuk mak nah cho khatni meic punc hei pheyyaan khang suangc nthuk mak nah cho?

26 Kauh samhmei nruayna nunc ta tei zauc o. Kaniw nap lingh mak ge, lau tay mak ge, saamh naina ni lou mak ge; tiki tingkauh thangc bammei nangniw Pu rui kaniw ta titu nggu bam e. Nangniw thu nruayna khang suangc kunghmei hamh nah cho?

27 Thow tei lungk katuakcmei rui kapanty chowbuk akhat na sini tisaengc ngammei naina cho?

28 “Tabui swna nangniw pheymbaan khang lungk katuakc bam tu cho? Ramvpuk khou thau bammei mwnpwang guay ta tei kakhanh zauc o. Kaniw pheymbaan taanh mak ge.

29 Tiki ai rui nangniw khou samei tuang e: Lungcgay chingkhuihmei Guangh Solomon sini mi pwang tei kumcna karuh tangc kan mak ge.

30 Aseic na thaulouna nthuanh mai khou phaiclou kan nimeibang ta sini Ravguangc rui mi kumcna karuhlou e thei, he lwmmmei nthyammei thi, mi khang tei suangc nangniw ta thu mbuna karuhlou pw lak nah cho?

31 “Hei zaeng rui, ‘Aniu tabui tu ulna cho?’, ‘Tabui zangv nina cho?’, hamh e thei ‘Tabui nsuay mbaanv nina cho?’ twna lungk katuakc bam riu.

32 Zentelmei rui mi guay ti hei phu e. Mi guay hei nangniw khang kage nai e twmei tingkauh thangc bammei nangniw Pu rui thay e.

33 Tiki Ravguangc guangcdic khatni katuang ravchaptatmei tei phu rey o, kum e thei mi guay hei ni nangniw khang tii puni.

34 Hei zaeng rui nthuanh khang rui lungk kadan riu; kalam thu nthuanh rui nthuanh khang kadan puni. Tingmik akhat tuang kadanmei tei mi tingmik khang tei biuc the.”

## **Meickai ta Latzan Sw Riu**

### **Matthiu 7**

1 “Nangniw ta ni latzan sw mak khang, nangniw meickai ta latzan sw riu.

2 Kalam thu nangniw rui meickai ta swmei latzan tei rui nangniw ta ni sw dat puni, khatni nangniw rui ndatmei dath tei rui nangniw ta ni ndat dat puni.



3 Tabui swna nangniw mik khou naimei thing dangv ta tei kakhanh makna nangniw chana mik khou naimei nrouc ta tei how bam tu cho?

4 Nang mik khou thing dangv nai lana, nang chana khou 'Nang mik khou nrouc naimei tei laa ganclou pumc e' twna nang akumhna sa ngamna cho?

5 Gaylwn swmei nang, nang mik khou naimei thing dangv tei laa ganc rey o, kum e thei nang chana mik khou naimei nrouc tei laa ganh khang nang mik how nthan puni.

6 "Nthanmei puat tei si nunc khang tii riu; karih patna nangniw ta nkay puni. Khatni nangniw tuang kaphut tei guak kui nunc hu khou phaiclou riu; kaniw rui hei tei ni binna nangniw ta sow puni.

**Ney o, Phu o, Nchow o** (*Ink 11.9-13*)

7 "Ney o, tii puni; phu o, mphang puni; kaikhamv nchow o, laanclou puni.

8 Kalam thu, ney mei kathuic laatow e, phumei kathuic phu tow e, kaikhamv nchowmei kathuic khang laanclou puni.

9 Kanac rui ntyan ney tina ntau h tii nimei thow naina cho?

10 Khatni khav ney tina nrui tii nimei thow naina cho?

11 Kumna meicsimei nangniw sini nangniw nac nunc khang gaymei puat tii thay e thei, tingkau h thangc bammei nangniw Pu rui thu, mi khang suangc mbuna, kakhau ney mei kathuic khang gaymei puat tii pu lak nah cho?

12 "Hei zaeng rui, nangniw khou swlou pw tu laa niimei tei nangniw rui meic nunc khou swlou tio. Riakdanv khatni muhzwng nunc tuang latdyn kiu mi hei the.

**Nrummei lev Hamei Chaengmun** (*Luk 13.24*)

13 "Nangniw nrummei chaengmun khou gut ro. Kalam thu maanmei khou zaylou nimei chaengmun tei thu ha e, kachaeng ni daic e. Kumna mi khou tei gutmei meic geic e.

14 Tiki ringhmei khou zayloumei chaengmun tei nrum e, kachaeng ni nthyam e, kumna hei tei laatowmei meic rau e.

**Kabang khatni Kathai** (*Luk 6.43-44*)

15 “Guatmei muczwng nunc khou rui ramhthay o; kaniw tei lauziu gic runna nangniw khou guang e, tiki kalungc khou thu nrammei angiwnunc e.

16 Kaniw tuang thai khou rui nangniw rui kaniw ta thay puni. Sauh luai khou rui drakha thai nthai mak ge; raengtaw sauc bang khou rui laengkic thai nthai mak ge.

17 Hei tei kumcna, karav gaymei bang rui kathai gaymei nthai e; karav simeibang rui kathai simein nthai e.

18 Karav gaymei thing bang rui kathai simein nthai mak ge; karav simeithing bang rui ni kathai gaymein nthai ngam mak ge.

19 Kathai gaymein nthai makmei thing bang guay ta tei gai bauna mai khou phaiclou e.

20 Mi kumna, kaniw ta tei kaniw thai khou rui nangniw thay puni.

**Ai Nang ta Thai Mak ge Tw Nimein** (*Luk 13.25-27*)

21 “Ata ‘Poubauhmei, Poubauhmei’ twna kawmei kathuicna tei tingkauh guangcdic khou gut rap ni tu hamh e; tiki tingkauh thangc bammei apu rui ningmei khou tatmei kamei na tei rui gut khang de.

22 Mi nungc kiu meic mpeyna rui ‘Poubauhmei, Poubauhmei, aniw nang zanc khou ravmundinc kan tu hamhna cho, nang zanc khou ravsic nunc ta nthau ganc kan tu hamhna cho, khatni nang zanc khou charynmei taanv mpeyna taanc kan tu hamhna cho?’ twna sa puni.

23 Mi khou kiu, ‘Ai nangniw ta thay mak ge, nangniw latliammein nunc, akhou rui tat kan o’ twna ai rui kaniw khou sa puni.

**Ningtyngmei khatni Mpangmei** (*Luk 6.47 49*)

24 “Hei zaeng rui, alat guay hei chuna piupui mei tei ntau rue khou kakai swmei ningtyngpui mei tei kumhmei tuang e.

25 Ting bun keyna dui daic key the, pwanzingh guangna kai ta tei guang thui the; tiki kai tei bow mak ge, kalam thu hei tei ntau rue khou lingclouna swlou the.

26 “Tiki alat guay hei chu lana piu makpui mei tei thu sypung ruc khou kakai swmei mpangpui mei tei kumhmei tuang e.

27 Ting bun keyna dui daic the, pwanzingh guangna mi kai ta tei thui the. Mi kai tei pun kasic karoucna pun kan the.”

### **Jisu Ngamv**

28 Jisu rui mi guay hei sa luai key pwkhou, katuang latdyn tei meic nunc khang tei charyn sih the.

29 Kalam thu kaniw tuang Riakdanv dinhpouc nunc tei kumh makna, ngamv naimeis gaanv khat kumcna kamei rui nchamlou khwan e.

### **Mphaanhmeipu ta Tigayloumei** (*Mark 1.40-45; Luk 5.12-16*)

#### **Matthiu 8**

1 Jisu luanghbut thangc tei rui key dat khou, meic kangdai kathei lay key khwan e.

2 Khoutei mphaanhmeipu gaanv khat guangna kahu khou khuksun keyna “Poubauhmei, nang rui nuh e thei, ata sw nthanlou ngam e,” twna sa the.

3 Jisu kabaanc haamv patna mi pu ta tei kahilouna, “Ai nang ta sw nthanlou nii the, nthan tho,” twna sa the. Mi dyng khou tei mi pu tei mphaanhmei gay dat kan the.

4 Khoutei Jisu rui kakhau sa the, “Nang meic gaanv khat na khou sini mi hei salou nuh mak ge. Tiki amuh khou tei lyan tat tho, kumna nang gay dat the twmei meic guayna thay khang, Mousi tuang latdanv thei layna khaengmei taanv tei taanc tho.”

**Rihpy Gaanv Khatpu Bangc ta Tigayloumei** (*Luk 7.1-10*)

5 Jisu Kapharnahum khou gut pwkhou, Rommei rihpy gaanv khat kadaeng khou guangna kakhou huaychana,

6 “Poubauhmei, abangc gaanv khat kapaek theicna ryanra sihna kai thangc zip bam e,” twna sa the.

7 Khoutei, “Ai guangna tigaylou puni,” tuna Jisu rui sa the.

8 Mi pu tei rui mundawna sa the, “Poubauhmei, nang guanglou bam khang akai kumhmei hei thu biuh mak ge. Nang tuang latkaeng na sa patlou o, kum e thei abangc tei gay dat puni de.

9 Kalam thu, ai hei ngamv naimei bangc khou bammei akhat re, khatni abangc khou ni rihmei nunc nai e. Ai rui rihmei gaanv khat ta ‘Tat ro’ tw ti thei kamei tat re, khatni rihmei gaanv khat ta ‘Guang o’ tw ti thei kamei guang e. Ai rui abangc ta ‘Mi hei taanc o’ tw ti thei kamei taanc e.”

10 Jisu rui hei tei chu la khou, kakhang kadath dat the, kumna kathei lay bammei nunc khou tei sa the, “Ai nangniw khou kaling siakna sa tuang e: Mi pu hei kumcna lwmmei Isaraelmei pang khou nganvna ai gaanv khat na sini ariw mak ge.

11 Ai rui nangniw khou samei hei e: Tingkauh guangcdic tuang ngai khou neihpat neihkey thangc rui meic mpeyna guangna Abraham, Isak, khatni Jakob lev dungc nchamc puni.

12 Mi ganv khou kiu guanghdc nac nunc ta tei kapaengc zinghmei khou phaiclou tina, mi khou tei kapna huh khaic ndyang kariak riak bam puni.”

13 Khoutei Jisu rui Rommei rihpypu khou tei sa the, “Tat tho, nang rui lwmmei thei layna tigaylou puni the.” Mi dyng khou tei kabangc tei gay dat kan the.

**Jisu rui Meic Mpeyna ta Tigayloumei** (*Mark 1.29-34; Luk 4.38-41*)

14 Jisu Pitar kai khou guang pwkhou, Pitar now pui ravmancna kalaeng khou zip bammei ta how the.

15 Jisu rui mi pui baanc tei kahlou tina ravmanhmei tei gay dat kan the, kumna kamei thauna Jisu siamruai sw the.

16 Mi nungc zingbangc tei, ravsic gutmei meic mpeyna ta kadaeng khou laaguang khwan e. Jisu rui ravsic nunc ta tat pat khang latdanv patna alay ganclou khwan e, khatni nnaumei guay ta tigaylou khwan e.

17 Mi hei “Kamei rui aniu tuang sunu guay laa ganclou the khatni aniu tuang ravpuat guay phungc ganclou the” twna muhzwng Isaia rui saloumei tei guang tangh khang the.

**Jisu Thei Laymei Thukh** (*Luk 9.57-62*)

18 Jisu rui meic kangdai kadaeng khou bammei ta how lana, zehlat paengc akhat thangc pat khang kaziap nunc khou sa the.

19 Khoutei Riakdanv dinhpouc gaanv khat kadaeng khou guangna, “Dinhpouc, nang tatpui bamv kathuic ai nang thei lay ni,” twna sa the.

20 Jisu rui kakhou sa the, “Asacsi nunc khang kakai nai e, kauh samhmei nruayna nunc khang ni kabou nai e, tiki Meic Nac Mpouh khang thu kapy mbaeng keyna zaengswloupui bamv maek ge.”

21 Baihmei ziap gaanv khat rui Jisu khou, “Poubauhmei, ai akai tatna apu ta mbeihlou rey ni he,” twna sa the.

22 Tiki Jisu rui, “Athei lay o, theihmei ta thu theihmei nunc rui mbeih khang ganclou ti tho.” twna sa the.

**Jisu rui Puanzingh Khaamloumei** (*Mark 4.35-41; Luk 8.22-25*)

23 Khoutei kamei hih akhat khou gut the, kumna kaziap nunc kathei lay tat the.

24 Zehlat khou tei puanzingh tanhmei guang the, kumna hih tei dui luat rui liak bin guang the; tiki Jisu thu zipri bam khwan e.

25 Ziap nunc tei kadaeng khou guangna kata nchyang thauna, “Poubauhmei, aniu ta kanlou o! Aniu theic puni the!” twna sa the.

26 Kamei rui kaniw khou sa the, “Lwmmei nthyammei nunc, tabui swna nangniw heidi ping bam tu cho?” Khoutei kamei thauna puanzingh khatni dui luat ta tei luh the. Khoutei rimh rim key kan the.

27 Khoutei kaniw tei ngak the. Kumna, “Puanzingh khatni duipui rui nganvna kalat piu bammeipu hei akumhpui mei lana cho?” twna kaniw rui sa the.

### **Ravsic Gutmei Nei ta Tigayloumei** *(Mark 5.1-20; Luk 8.26-39)*

28 Jisu zeihlat paengc akhat thangc, Gadarammei ramv khou guang pwkhou, ravsic gutmei gaanv nei taroulang khou rui patna kata ariw khwan e. Kaney tei heidikamv kheih si e, twmei thu, mi chaeng tei meic tat ruan bauh mak bam khwan e.

29 Zauclo, kaney rui kaucna sa the, “Ravguangc Nac Mpouh, nang aney ta tabui sw nina cho? Kaganv tangh mak khou aney ta dandi tii ni the twna guang tu cho?”

30 Kaniw khou rui duc hak mak thangc guak kangdai akhat kataek mpac bam khwan e.

31 Ravsic nei tei rui Jisu khou huaychana, “Nang rui aney ta nthau pat re thei, guak nunc khou tei ndiulou o,” twna sa the.

32 Khoutei, “Tat tho,” twna Jisu rui kaney khou tei sa the. Kumna patna guak nunc khou tei gut kan the. Guak pang tei dui khuangc khou saeng keyna zeihlat khou tei saenglouna theic ngam kan the.

33 Guak gaenghmei nunc tei mi kaidai thangc tei pak tatna guak nunc khou khatni ravsic gutmeipu nei khou tei pat kanmei guay tei poulou the.

34 Khoutei mi kaidai mei guay tei Jisu ta ariw khang pat the. Kaniw rui kata ariw pwkhou kaniw tuang ramv khou tei rui tat pat kan khang huaycha the.

### **Kapaek Theihmeipu ta Tigayloumei** *(Mark 2.1-12; Luk 5.17-26)*

#### **Matthiu 9**

1 Jisu hih tuangcna zeihlat tei kaan pat datna karamc kaidai khou guang dat the.

2 Khoutei meic gaanvsaekc rui kapaek theihmeipu gaanv khat ta kazy khou nzilouna Jisu daeng khou puanc guang khwan e. Jisu rui kaniw ramlum tei how la khou, kamei rui kapaek theihmeipu khou tei, “Abungle, ping dat ri tho, nang paap guay kuaklou the,” twna sa the.

3 Mi khou tei, Riakdanv dinhpouc gaanvsaekc rui kaniw rana kaniw khou, “Mi pu hei Ravguangc ta ramhsak makpui lat sa e!” twna sa the.

4 Kaniw lungning tei thay lana, Jisu rui sa the, “Tabui swna nangniw lung khou simeilungning kakhanh bam tu cho?”

5 ‘Nang paap guay kuaklou the,’ twna samei chiw ni, ‘Thauna tat tho,’ twna samei chiw cho? Meic

6 Nac Mpouh khou hei paapc kuaklou khang kandih khou ngamv nai e twmei nangniw thay khang lyanlou puni,” khoutei kamei rui kapaek theihmeipu khou tei, “Thau tho, nang tuang zybam lai thauna nang kai thangc tat tho,” twna sa the.

7 Mi pu tei thauna kakai tat kan the.

8 Meic kangdai tei hei tei how la khou, kaniw khou pingmei padik the, kumna mi kumhmei ngamv hei maansei nunc khou tiiloumei Racguangc ta kaniw thuanc the.

**Metthiu ta Kawmei** (*Mark 2.13-17; Luk 5.27-32*)

9 Jisu mi bamv khou tei rui tat pat khou, kazanc Metthiu kawmeipu dihhav laamei bamv khou dungc bammei ta how lana, “Athei lay o,” twna sa the. Metthiu thauna kathei lay the.

10 Jisu mi pu kai khou tei kaziap nunc lev nap tu bam khou, dihhav kakhamei nunc khatni paapcmei nunc mpeyna ni guangna tu nchamc bam khwan e.

11 Hei tei Pharisimeil nunc how lana, kaniw rui Jisu ziap nunc khou, “Tabui swna nangniw tuang kaipouc hei dihhav kakhamei nunc khatni paapcmei nunc lev tu kariu bam tu cho?” twna sa the.

12 Hei tei chu lana, Jisu rui sa the, “Karav gaymei nunc khang thu ravgaw amuc kage maek ge, nnaumei nunc khang de.

13 ‘Ai rui kahawmei thu zauzian ta de, khaengmei ta hamh e,’ twmei kabac hei kathai tat ro. Kalam thu, ai guangmei hei ravchaptatmei nunc ta kaw khang hamh e, paapcmei nunc ta kaw khang de.”

**Munthianghmei lam khou Thanvmei** (*Mark 2.18-22; Luk 5.33-39*)

14 Mi tangv tei, Jahon ziap nunc guangna, “Aniw khatni Pharisimei nunc thu munthiangc bam ki, tabui swna nang ziap nunc thu munthiangh mak tu cho?” twna Jisu khou thanv the.

15 Khoutei Jisu rui kaniw khou sa the, “Akumhna newsuanh gin nunc tei, nowpouc bam khou latlu bam nina cho? Nowpouc ta tei kaniw khou rui laa tat kanmei ganv guang puni. Mi tangv thu kaniw munthiangc puni.

16 “Meic gaanv khat na rui sini pheyy raan khou pheyy thanh khuamlou mak ge. Kalam thu pheyy thanh tei rui zay kaek kasic ranvlou puni.

17 Ramh gic muanc raan khou ni drakha zouc thanh lou mak ge. Hei tei lou ti thei, muanh tei puak bakna drakha zouc tei maan puni, kumna muanh tei ni sw kasic puni. Tiki muanh ni drakha zouc ni maan mak khang drakha zouc thanh thu muanh kathanc khou lou tuang de.”

**Sinagog tuang Kapypu Nac Aluhpui khatni Jisu Pheyy Tin Kahimeipui** (*Mark 5.21-43; Luk 8.40-56*)

18 Jisu mi lat hei sa bam khou, sinagog tuang kapy swmei gaanv khat guangna, Jisu hu khou khuksun keyna, “Anac aluhpui ntaw na hei theic nina bam the. Nang guangna karuc khou nang baanc kabouclou o. Kum ti thei kamei ringc dat puni de,” twna sa the.

19 Khoutei Jisu ding thauna kathei lay tat the, kumna kaziap guay ni lay tat the.

20 Khoutei, tingkwm ruhna kanei zeina bammeipui gaanv khat Jisu thei khou guangna katuang pheyy tin kahi the.

21 Kalam thu, “Katuang pheyy tei kahilou rap ti thei, ai gay dat rap puni de,” twna kamei ning the.

22 Khoutei Jisu kathei karih pat pwkhou kata how lana, “Alucle, nang ramlum rui nang ta tigaylou the,” twna sa the. Mi dyng khou tei mi pui tei gay dat kan the.



23 Jisu sinagog tuang kapypu kai khou tei gut pwkhou, alim muanmei nunc khatni meic kangdai kachin karo bammei ta how lana,

24 “Nangniw tat pat kan o. Mi nac hei theih mak ge; zip bam tu de,” twna sa the. Khoutei kaniw kata nuic the.

25 Meic nunc ta tei mpaeng thangc tipat lana, kamei kainung khou gutna mi nac baanc tei zay the. Khoutei mi nac tei thau the.

26 Mi chamv hei, mi ramv kapwm khou tei chu lik kan the.

### **Mik Tiatmei Gaanv Nei ta Tigayloumei**

27 Jisu mi khou tei rui tat pat dat khou, mik tiatmei gaanv nei kathei lay tatna, “Aney ta zauc nzianlou o, he David nac mpouh!” twna kauc the.

28 Jisu kainung gut pwkhou, mik tiat-meipu nei tei kadaeng khou guang the. Khoutei Jisu rui, “Ai rui nangney ta tigaylou ngam puni de twmei nangney lwm dai?” twna Jisu rui thanv the. “Ngguay, Poubauhmei,” twna kaney rui daw the.

29 Khoutei kabaanc rui kaney mik khou kahilouna, “Nangney rui lwmmei thei layna how dat tho,” twna sa the.

30 Khoutei kaney mik rak pat the. “Mi hei meic gaanv khat na khou sini tithay nuh mak ge,” twna Jisu rui kaney khou kadylou the.

31 Tiki kaney tat pat lana mi ramv kapwm khou tei Jisu chamv dinc liklou the.

### **Lat Sa Thay Makmeipu ta Tigayloumei**

32 Mi pu nei tei tat dat kan khou, ravsic gutmei, lat sa thay makmeipu gaanv khat ta Jisu daeng khou nduangh guang khwan e.

33 Kumna ravsic ta tei nthau ganclou pwkhou, lat sa thay mak bammeipu tei sa dat the. Meic kangdai tei ngakna “Isarael khou mi kumhmei hei pat zat mak he,” twna sa the.

34 Tiki, “ravsic guay kaipouc ngamv khou rui kamei rui ravsic nunc ta nthau pat tu de,” twna Pharisimei nunc rui sa the.

## **Jisu Meic nunc khang Kalung Kabiumei**

35 Jisu kaidai guay khatni namv guay khou tat liklou khwan e. Kamei kaniw tuang sinagog guay khou nchamlouna, guanghdic tuang gaychamv dinclou khwan e, khatni ravpuat phunghmei khatni nnaumei nunc ta tigaylou khwan e.

36 Kamei rui meic kangdai ta tei how pwkhou kaniw ta ningngam mak khe, kalam thu gaengcloumei maekmei lauziu nunc kumcna kaniw lak the khatni ramh sw la khang thay mak khe.

37 Khoutei kamei rui kaziap nunc khou sa the, “Lau tay khang thu geic the, tiki tay nimei mei thu rau the.

38 Hei zaeng rui, lau taymei nunc laupuk khou ndiulou khang laupouc khou ney o.”

## **Jisu Ziap Ruhna Kanei Zanc** (*Mark 3.13-19; Luk 6.12-16*)

### **Matthiu 10**

1 Kamei rui kaziap ruhna kanei ta kaw patna simei bumaengc guay ta nthau ganh khang khatni ravpuat guay khatni sunu guay tigay khang kaniw khou ngamv tiilou the.

2 Latdiutatmei ruhna kanei zanc kiu mi hei e: reymei khou, Pitar twna kawmei

3 Simon khatni kakainac Andriu; Zebedi nac Jakob khatni Jahon; <sup>3</sup> Philip khatni Bartholomiu; Thomas khatni dihkhav kakhamei Metthiu; Alphia nac Jakob khatni Thaddia;

4 Kananai kawmei Simon khatni Jisu ta zuanctumei Juda Iskariot.

## **Ziap nunc ta Ndiu Patmei** (*Mark 6.7-13; Luk 9.1-6*)

5 Mi ruhna kanei ti hei Jisu rui ndiulouna, kaniw khou mi kumcna kadylou the: “Nangniw Zentelmei khou tat riu, Samariamei tuang kaidai guay khou ni tat riu;

6 tiki maan kanmei lauziu— Isaraelmei khou tat ro.

7 Nangniw tatna, ‘Tingkauh guangcdic ana the,’ twna dine tat ro.

8 Nnaumei ta tigay o, theihmei ta tiringcthau o, mphaanhmei ta tigay o, ravsic guay ta nthau ganc o. Nangniw kamanv tii makna laa the, kamanv laa makna tii o.

9 Nangniw bungkam khou syan—kachaekc tuang ni, daandi tuang ni, kuanri tuang ni phungh riu.

10 Nggin khau ni phungh riu; thiula saplai lev phaythuapc ni phungh riu; builwang ni sin riu. Taanv taanhpuu mei khang thu kabung khang tiilou puni.

11 “Kaidai khou pw ni, namv khou pw ni, nangniw gut pwkhou, nangniw bangvloumei kai khang phu o, kumna nangniw tat dat mak saanv mi kai khou tei bam o.

12 Mi kai khou tei nangniw gut pwkhou chuzaenghmei suaihiam suaiclou o.

13 Mi kai tei nangniw ta riulou e thei, nangniw tuang chuzaenghmei tei mi kai khou tei nai bam kan diu; tiki nangniw ta riulou mak ge thei nangniw tuang chuzaenghmei tei nangniw khou hanc guang dat kan diu.

14 Nangniw ta laalou mak ge thei khatni nangniw lat nkinglou mak ge thei, nangniw mi kai khou tei rui hamh e thei mi kaidai khou tei rui tat pat dat ni khou, nangniw phay niang tei kadiw keylou ducna tat ro.

15 Ai rui nangniw khou kaling siakna sa tuang e: latzan tingmik nungc kiu mi kaidai tuang latzan tei Sodom lev Gomora tuang latzan suangc nrit puni.

**Rairiumei Guang Nime** (*Mark 13.9-13; Luk 21.12-17*)

16 “Zauclo, nangniw ta, lauuiu ta angui pang khou ndiulou kumc ndiulou tuang e. Hei zaeng rui nangniw nrui kumc ntak nrak go khatni akhouhna kumc nriakc go.

17 Nangniw suriak thay o; meic nunc rui nangniw ta peikai khou tiilou puni khatni kaniw tuang sinagog khou bai puni.

18 Alam khou rui nangniw ta guanghkhyn nunc khatni guangh nunc hu khou zay guang puni. Hei tei rui kaniw khou khatni Zentelmei nunc khou nangniw alam khou dinclou khang e.

19 Kaniw rui nangniw ta latzan bamv khou zay guang pwkhou, tabui lat sa nina cho khatni tabui kumhna sa nina cho twna lungk katuakc riu. Nangniw sa nimeit lat kadyng khou tiilou puni.

20 Kalam thu, nangniw rui sa nina hamh e; nangniw Pu tuang Bumaengc tei rui nangniw ta tisa nina de.

21 “Chana rui kachana ta, khatni pu rui kanac ta swluai khang tii pat puni. Nah nunc rui kapui kapu ta akhangv adangvna swluai puni.

22 Nangniw ta meic guay rui, azaeng rui karaeng puni, tiki katwan nganvna khaengv ngampui mei ta tei kanlou puni.

23 Nangniw ta kaidai akhat khou rai pw e thei, baihmei kaidai akhat thangc pak tat ro. Ai rui nangniw khou kaling siakna sa tuang e: Meic Nac Mpouh guang makmei hu khou nangniw Isarael tuang kaidai guay khou taanc liklou ngam ni tu hamh e.

24 “Ziap akhat tei kata nchamloumeipu suangc mbu mak ge; bangh tei ni kakaipouc suangc mbu mak ge.

25 Ziap akhat tei kata nchamloumeipu khatni bangh tei kakaipouc kumc e thei biuc the. Tamvypouc ta Bilzebul twna kaw e thei, kakai kaikhunhmei nunc ta thu mi suangc adih sina kaw puni tha!

### **Thow ta Ping Nina Cho?** (*Luk 12.2-7*)

26 “Hei zaeng rui, kaniw ta ping riu. Ntaw gum binlou bammei hei laanc pat pu ni, khatni nkamhlou nkhamhlou hei ndauh pat puni.

27 Ai rui nangniu khou zingh khou saloumei hei, nangniw kalaanv gaanv khou sa nina e; nangniw nukuanc khou suaina saloumei hei, kainam khou rui kauc nina e.

28 Mei pumc ta swluai ngam sini bumaengh ta thu swluai ngam makmei nunc ta tei ping riu; tiki pumh ta ni bumaengh ta ni maikwam khou swmaan ngammeipu ta ping o.

29 Tingkavna kanei manv paic akhat na hamhna cho? Kum sini, nangniw Pu rui nuhloumei maekna tingkavna akhat na sini kandih khou taek key ni tu hamh e.

30 Nangniw ta thu nangniw tuang sam lu guay nganv kasing chaklou bam tuang de.

31 Hei zaeng rui, ping riu; nangniw thu tingkavna mpeyna khang suangc sini kamanv kunghmei de.

**Khrista ta Sa-ndauhmei** (*Luk 12.8-9*)

32 “Thowkumhmei, kamei amei e twna meic nunc hu khou sa ndauihui mei ta tei, ai rui ni tingkauh thangc bammei aPu hu khou kata amei e twna sa puni.

33 Tiki meic nunc hu khou kamei amei hamh e twna sapui mei ta tei, ai rui ni tingkauh thangc bammei aPu hu khou kamei amei hamh e twna sa puni.

**Chuzaenghmei Hamhna Sue Rih de** (*Luk 12.51-53; 14.26-27*)

34 “Ai guangmei hei kandih khou chuzaenghmei phungc guang tuang e twna ning riu. Ai guangmei hei chuzaenghmei phungc guang khang hamh e; suc-rih phungc guang khang de.

35 Kalam thu ai guangmei hei kanac lev kapu kak khou, kanac aluh lev kapui kak khou, kamauc lev kaneic kak khou tizauczihlou khang de.

36 Kaikhunh akhat na khou khat khat ta zauczih puni the.

37 “Ata suangc kapui kapu ta nzian mbupui mei tei amei sw khang biuh mak ge; ata suangc kanac mpouh aluh ta nzian mbupui mei tei amei sw khang biuh mak ge.

38 Khatni katuang kros phungcna athei lay makpui mei tei amei sw khang biuh mak ge.

39 Thow pw ni karingcpaan daekloupui mei tei, hei tei maan puni; tiki thow pw ni akhang rui karingcpaan maanloupui mei tei ringhpaan laatow puni.

**Swan** (*Mark 9.41*)

40 “Nangniw ta laaloupui mei tei ata laalou tu e, khatni ata laaloupui mei tei ata ndiu guangmeipu ta laalou tu e.

41 Muhzwng akhat ta muhzwng e twna laaloupui mei tei muhzwng tuang swan lay laa puni, khatni ravchaptatmeipu ta kamei ravchaptatmei e twna laaloupui mei tei ravchaptatmeipu tuang swan lay laa puni.

42 Mi nthyammei nunc ti hei sini kamei aziap be twna duichu buangc sini tiiloupui mei tei, ai rui kaling siakna sa tuang e: Katuang swan khat sini maan lak ge.”

**Duiluploumei Jahon rui Ndiu Guangmei nunc** (*Luk 7.18-35*)

## **Matthiu 11**

1 Mi kumna pat khwan e: Jisu kaziap ruhna kanei khou tei dinclou tang lana, kaniw tuang kaidai guay khou nchamlou khang khatni chamv dinh khang mi khou tei rui tat pat khwan e.

2 Jahon Khrista tuang taanv guay tei kangkai khou rui chu lana kaziap nunc ta ndiu guangna,

3 “Guang nimeipu kiu nang the ni, hamh e thei mi kiu baihmei di he cho?” twna kakhou thanv the.

4 Jisu rui mundawna sa the, “Nangniw rui chu kanmei khatni how kanmei tei Jahon khou guang salou ti tho:

5 Mik tiatmei nunc how dat bam the, phay baumei nunc tat dat bam the, mphaanhmei nunc ta sw nthanlou-i dat bam the, nu ndymeis nunc chu dat bam the, theihmei nunc ta tiringcthaulou dat bam the, khatni lungcsimeis nunc khou gaychamv dinclou bam the.

6 Akhou phaysuy makpui mei tei sangaymei e.”

7 Jahon ziap nunc tei tat dat kan khou, Jisu rui Jahon lam khou, meic kangdai khou tei sa the, “Nangniw tazikramv khou tei tabui ta zauh khang pat tu cho? Mpwan aliu kalung bammei ntou bang ta zauh khang cho?

8 Hei tei hamh e thei, tabui ta zauh khang nangniw pat tu cho? Pheynuaih piumei ta zauh khang cho? Zauclo, pheynuaih piumei nunc thu guanghkai nunc khou bam tuang de.

9 Kum e thei, tabui ta zauh khang pat tu cho? Muhzwng ta zauh khang cho? Nnguay, ai rui nangniw khou sa tu e: muhzwng suangc daihmei ta zauh khang e.

10 ‘Zauclo, ai rui atuang latdiumei nang hu khou ndiulou e, kamei rui nang hu khou nang khang chaeng kasiamhlou puni,’ twna hyloumei tei mi pu lam khou hei the.

11 “Ai rui nangniw khou kaling siakna sa tuang e: ntumei rui puanhmei pang khou Duiluploumei Jahon suangc daihmei lunge guang mak he; tiki tingkauh guangcdic khou nthyam liangmei tei kakhang suangc daic e.

12 Jahon rui duiluploumei khou tei rui thauna ntaw nganv, tingkauh guangcdic hei baantan patna adow gut bam e, kumna pumtan naimei nunc rui mi hei asutna laa the.

13 Kalam thu Jahon guang mak saanv muhzwng nunc khatni Riakdanv rui dine kasuakclou the.

14 Nangniw laalou nii e thei, guang punimei Elija kiu kamei hei the.

15 Nukuanc naimei kathuic chu kan diu.

16 “Mi meikin ti hei tabui lev kida nina cho? Kaniw hei alauc nunc kaithyan bamv bamv khou dungcna,

17 ‘Aniw nangniw khang alim muanlou e, tiki nangniw alaamh mak ge; aniw rui theih lu suanlou e, tiki nangniw latlu mak ge,’ twna khat khat khou kauc bammei tei di the.

18 Kalam thu Jahon tei guangna tu mak zangv makna lunge tiki, ‘kakhau ravsic gut tina e,’ twna kaniw rui sa e.

19 Meic Nac Mpouh guangna tu zangvna lunge tiki, ‘Zauclo, tu nii zangv niipui mei, zouh mbamei, dihkxav kakhamei khatni paapcmei nunc pam’ twna kaniw rui sa e. Tiki Ravguangc tuang ningting ta thu nchumh e twmei kataanv rui lyan e.”

**Lungh Laih Makmei Kaidai nunc Sansi e dav! (Luk 10.13-15)**

20 Khoutei Jisu rui katuang ngamv daihmei taanv geihmei taanclou kanmei kaidai nunc ta luh thau the. Kalam thu kaniw lungh laih mak khwan e.

21 “He Korazin, nang hei sansi e dav! He Bethsaida, nang hei sansi e dav! Nangney khou taanclou kanmei ngamv daihmei taanv guay tei Tur lev Sidon kaidai khou taanclou bam khwan e thei, kaney thu pheiga piuna, mbut lowna theidouc rui lungh laic kan ni tuang di the.

22 Ai rui nangney khou sa e: latzan tingmik nungc kiu nangney tuang latzan hei Tur lev Sidon tuang latzan suangc nrit puni.

23 He Kapharnahum, nang ta tingkauh puanc ku tangcloumei ta nang kahaw bu cho? Nang ta taruaih khou zay keylou puni. Nang khou taanclou kanmei ngamv daihmei taanv guay tei Sodom khou taanclou bam khwan e thei, mi kaidai tei ntaw nganv nai bam kan ni tuang e.

24 Ai rui nangniw khou sa tuang e: Latzan tingmik nungc kiu nangniw tuang latzan hei Sodom tuang latzan suangc nrit puni.”

**Akhou Guangna Zaeng Nthaekc go (Luk 10.21-22)**

25 Mi ganv khou tei Jisu rui sa the, “He apu, tingkauh khatni kandih kaipouc, nang rui mi guay hei ningtyngmei nunc khou nkamhlouna angana nunc khou ndauhloumei khang rui nang ta thuancku e.

27 Nngguay apu, mi hei nang rui ningmei e. “Kaguayna apu rui akhou tiilou the. Pu tei hamhna gaanv khat na sini Nah Mpouh ta thay mak ge khatni Nah Mpouh tei rui kata ndauhlou khang kapahloumei nunc tei hamhna gaanv khat na sini Pu ta tei thay mak ge.

28 “Taanv ranvna taancna khatni puat nritmei phungcna lakmeithiu, nangniw akhou guang o, ai rui nangniw ta ti- nthaekclou puni.

29 Atuang puat hei nangniw laa thauna phungc o, kumna akhou rui ncham o. Kalam thu ai hei lungh nzaenghmei e khatni lungh niamhmei e, kumna nangniw zaeng nthaekcmei laatow puni.

30 Kalam thu, ai rui nangniw ta tiphungc nime i puat hei chiw e khatni nthaan e.”



**Sabbathneic lam khou Dincloumei** (*Mark 2.23-28; Luk 6.1-5*)

**Matthiu 12**

1 Kaganv akhat khou Jisu Sabbathneic laupuk khou tat ruan pat khwan e. Kaziap nunc tei ndaapc khwan the, kumna gehu chuncna tu thau khwan the.

2 Hei tei Pharisimei nunc rui how lana Jisu khou, “Zauclo, nang ziap nunc Sabbathneic taan nupui taanv taanc bam e,” twna sa the.

3 Khoutei Jisu rui kaniw khou sa the, “David khatni kamei nunc tei ndaapcpui ganv khou David rui tabui sw kan tu cho twmei hylou bammei tei nangniw pah makna cho?

4 Akumhna kamei Ravguangc kai khou gutna amuh nunc na hamhna kamei ni, kamei nunc ni tu numei khaengloupui tyan tei tu kan tu cho?

5 Sabbathneic ravkai lunge khou bammei amuh nunc rui Sabbathneic ngaek mak sini nkhuai mak ge twmei nangniw Riakdanv khou tei pah mak he nah cho?

6 Ai rui nangniw khou sa tuang e: Ravkai khang suangc daihmei mi khou hei bam e.

7 ‘Ai kahawmei thu zauzian ta de, khaengmei ta hamh e,’ twna samei kabac hei nangniw thay khwan e thei, kakhuay maekmei nunc ta nkhuai e twna nangniw sa bam lak ni tuang e.

8 Kalam thu, Meic Nac Mpouh hei Sabbathneic tuang kaipouc e.”

**Kabaanc Theihmeipu ta Tigayloumei** (*Mark 3.1-6; Luk 6.6-11*)

9 Jisu mi bamv khou tei rui tat pat lana kaniw tuang sinagog khou gut khwan e.

10 Kumna zauclo, mi khou tei kabaanc kabiak khat theihmeipu gaanv khat bam khwan e. Khoutei, “Sabbathneic tigaymei hei kariak thei layna nuh ni nuh mak cho?” twna kaniw rui Jisu khou kakhuay phuna thanv khwan e.

11 Khoutei Jisu rui kaniw khou sa the, “Nangniw thowkumhmei tuang lauзию akhat Sabbathneic khunh khou keylou bam e thei, kamei hei tei zay thau dat pu lak nah cho?

12 Kum e thei, maansei hei thu lauziu khang suangc adih kungc kan tha? Hei zaeng rui, Sabbathneic gaymei taanv taanhmei hei kariak thei layna nkhuai mak ge.”

13 Khoutei Jisu rui mi pu khou tei, “Nang baanc ntyng pat ro,” twna sa the. Khoutei kabaanc ntyng pat the. Kumna kabaanc akhat tei kumcna gay dat the.

14 Khoutei Pharisimei nunc tei tat pat lana Jisu ta swluai khang kaphianh the.

### **Ravguangc rui Kapahloumei Bangc**

15 Hei tei thay lana, Jisu mi khou tei rui tat pat kan the. Khoutei meic mpeyna kathei lay tat the, kumna kamei rui kaniw guay ta tigaylou the.

16 Kalam khou rac tat nuh mak ge twna kaniw khou kadylou the.

17 Mi hei muhzwng Isaia khou mi kumcna saloumei tei guang tangh khang the:

18 “Zauclo, ai rui kapahloumei abangc ta, ai pianmei ai nzianmeipu ta. Ai rui kakhou abumaengc tiilou puni; kamei rui zaatc guay khou, nchumhmei latzan kauc ndauh puni.

19 Kamei agina ni kaucna ni bam ni tu hamh e; Meic gaanv khat na sini, kakhwan chaengdai khou chu ni tu hamh e.

20 Buap bammei ntou bang ta kamei sw bau ganc lak ge; khou luih lui na bammei mairiang ta kamei sw amit ni tu hamh e, kamei rui nchumhmei latzan rui tingamlou mak saanv;

21 kumna zaatc guay rui kakhou lwmlou bam puni.”

### **Jisu ta Ravsic Gutmei khang Nkhammei ( Mark 3.20-30; Luk 11.14-23)**

22 Mi tangv kamik tiat, lat sa thay mak twmei, ravsic gutmeipu gaanv khat ta Jisu daeng khou phungc guang khwan e. Jisu rui tigaylou tina mi pu tei lat sa dat the khatni how dat the.

23 Khoutei meic guay tei ngak the, kumna “Kamei hei David Nac Mpouh kiu lana the ny?” twna sa the.

24 Pharisimei nunc rui hei tei chu lana, “Mi pu hei rui ravsic nunc ta nthau patmei hei ravsic guay tuang kaipouc Bilzebul ngamv rui de,” twna sa the.

25 Jisu rui kaniw lungning tei thay lana kaniw khou sa the, “Kalangv patna khat khat ta howthou kanmei guangcdic tei mut re, khatni khat khat ta howthouna kalangv pat kanmei kaidai hamh e thei kaikhunc tei ding ngam ni tu hamh e.

26 Kumna Seitaan rui Seitaan ta nthau pat re thei karana kata sw bak the; kum e thei akumhna kaguangcdic ding ngam nina cho?

27 Ai rui Bilzebul paan rui ravsic nunc ti hei nthau pat tuang e thei, nangniw nac nunc thu tabui paan rui ravsic nunc ta nthau ganh tu cho? Hei zaeng rui kaniw rui nangniw tuang latzanpouc nunc sw puni the.

28 Tiki ai rui ravsic nunc ta nthau ganhmei hei Ravguangc tuang Bumaengc rui e. Mi rui lyanmei thu Ravguangc guangcdic nangniw khou guang tangc the twmei tuang e.

29 “Hamh e thei kapumc tanhmei meic gaanv khat kai khou gutna kai nuam ni tw e thei, kapumc tanhmeipu ta tei karakclou rey mak ge thei kakai gut ngam mak ge. Karakclou rey tang khou rui kakai nuam nina de.

30 “Abiak liangh makpui mei tei ata howmumei e, khatni ai khuam kaduaime i khou kazauh makpui mei tei hac ganhmei nunc e

31 Hei zaeng rui ai rui nangniw khou sa tuang e: Meic nunc paap guay khatni Ravguangc ta sa kasicmei' guay tei kuaklou nuh de. Tiki Bumaengh ta sa kasicpui mei ta tei thu kuaklou mak ge.

32 Meic Nac Mpouh rue khou sina samei ta tei thu kuaklou nuh de, tiki Bumaengh Nthanmei ruc khou sina samei ta tei thu ntaw ni, guang nime i zuk thangc ni, kuaklou dat mak khe.

### **Kabang lev Kathai** (*Luk 6.43-45*)

33 “Kabang tei karav gay ti thei kathai gay the; kabang tei karav si ti thei kathai si the. Kabang ta tei kathai khou tei rui thay the.

34 Nangniw nrui nac nunc! Nangniw sina akumhna gaymei lat sa ngam nina cho? Kalam thu lungning khou padikna naime i khou tei rui mwang rui sa pat tuang e.

35 Meicgaymeipu tei katuang gaymei lanvkhuk khou rui gaymei nrou pat re, khatni meicsimeipu tei katuang simei lanvkhuk khou rui simei nrou pat re.

36 “Ai rui nangniw khou sa tuang e: Latzan tingmik nungc kiu meic nunc rui kakhanh makna saloumei lat kathuic lam tei ni kaniw daw dat puni.

37 Kumna nang tuang lat thei layna nang ta latzan sw puni.”

**Sw-nchinmei Lyanlou khang Samei** (*Mark 8.11-12; Luk 11.29-32*)

38 Khoutei mundawna Riakdanv dinhpouc nunc khatni Pharisimei gaanvsaekc nii Jisu khou, “Dinhpouc, sw-nchinmei taanv akhat taancloumei ta aniw kahaw e,” twna sa the.

39 Khoutei mundawna kamei rui kaniw khou sa the, “Meicsimei khatni ravchap tat makmei mei nunc hei rui sw nchinmei ta phu e. Muhzwng Jona khou swlou kanmei sw-nchinmei tei hamhna baihmei sw-nchinmei lyanlou ni tu hamh e.

40 Jona tei khavdaih bung lungc khou zingbangc kathumh kalaanv kathumh bam kanmei tei kumcna, Meic Nac Mpouh hei zingbangc kathumh kalaanv kathumh kandih lungc khou bam puni.

41 Ntaw kin tuang mei nunc ti hei latzan sw pwkhou Ninevemei nunc thauna mi meikin ti hei nkhuamei e twna sa puni; kalam thu kaniw thu Jona rui latdinc pwkhou lungc laic kan the. Kumna zauclo, Jona khang suangc daihmei mi khou hei bam e.

42 Mi meikin ta latzan swpui nungc kiu, dihba thangcmei liammavpui thauna mi meikin ti hei nkhuamei e twna sa puni. Kalam thu kamei Solomon tuang ningting tei nking khang kamei kandih tin thangc rui guang khwan e. Kumna zauclo, Solomon suangc daihmei mi khou hei bam e.

**Simei Bumaengc Hanc Guang Datmei** (*Luk 11.24-26*)

43 “Nthan makmei bumaengc akhat meic gaanv khat khou rui tat pat lana, zaeng nthaeckcloupui bamv khang phuna dui maekpui bamv khou ruan tat the, tiki phu tow mak pwkhou,

44 ‘Ai tat patmei akai khou tei hanc guang dat ni the’ twna sa the. Kumna kamei guang pwkhou mi kai tei gey nthanlouna, lunghpui nanw lou chuy rih rina kairaeng ding bammei ta ariw the.

45 Khoutei kamei tat lana kakhang suangc simei bumaengc chanei ta nduangh guangna mi kai khou tei gut lungc the Kumna mi pu tuang nkhamhmei lwnlung tei rey khou lwnlung khang tei suangc si the. Mi simei meikin khou hei ni mi hei kumcna guanglou puni.”

### **Jisu Pui khatni Kachana nunc** (*Mark 3.31-35; Luk 8.19-21*)

46 Jisu rui meic kangdai khou tei lat sa bam khou, kapui lev kachana nunc kata kachuc niina kaizaeng khou ding bam khwan e.

47 Kumna meic gaanv khat rui kakhou, “Zauclo, nang pui lev nang chana nunc nang ta kachuc niina kaizaeng khou ding bam e,” twna sa the.

48 Mundawna Jisu rui mi pu khou tei sa the, “Thow tei apui cho? Thow tei achana cho?”

49 Khoutei kaziap nunc rue khou kabaanc haamv patna sa the, “Zauclo, apui khatni achana nunc kiu mi hei the.

50 Kalam thu tingkauh thangc bammei apu rui ningmei taanhpui mei tei achana the khatni apui the.”

### **Napphwn Nroumei Latgiam** (*Mark 4.1-9; Luk 3.4-8*)

#### **Matthiu 13**

1 Mi nungc tei Jisu mi kai khou tei rui tat pat lana Galili zeiclat paengc khou dungckey the.

2 Khoutei meic kangdai kadaeng khou huamc guang ti khou kamei hih akhat khou gutna dungc the; kumna meic kangdai tei dui paengc khou tei ding bam the.

3 Khoutei kamei latgiam swna lat mpeyna dinclouna sa the: “Zauclo, lau taanhmeipu gaanv khat napphwn nrou khang tat pat the.

4 Kamei rui nrou pat khou, nap thw asaekc chaengluang khou keylou the, kumna nruayna nunc guangna hei tei khuaic tu kan the.

5 Baihmei asaekc rui taniang geih makmei ntau rou ding khou keylou the, kumna taniang chalah tipui zaeng rui katumcna kak pat the.

6 Tiki neih suc pat pwkhou mi bwan nunc ta tei nggaan the, kumna kamaan zangc key ti mak khena, hei tei theic kan the.

7 Napthw asaekc sauh bwan ding khou keylou the, kumna sauh bwan pang tei daic thauna zyn luai the.

8 Asaekc rui kandih gaymei khou keylou the, kumna kathai nthai the. Nggway asaekc rui kathw phay khat, asaekc rui riakcharuk, asaekc rui tamruc nthai the.

9 “Nukuanc naimei kathuic chu kan diu.”

**Latgiam Swna Samei lam** (*Mark 4.10-12; Luk 8.9-10*)

10 Khoutei kaziap nunc tei Jisu daeng khou guangna sa the, “Tabui swna nang kaniw khou latgiam swna sa tu cho?”

11 Khoutei kamei rui mundawna sa the, “Kalam kiu thu, Ravguangc guangcdic tuang nthaihloumei tei nangniw thay khang dinclo tuang e, kaniw khou thu hamh e.

1 2 Kalam thu, asaekc naipui mei khang tei, liamh laihna nai khang tiilou puni; tiki khat sini maekpui mei khang tei thu, kakhau katitna naimei tei sini laa pat kan puni.

13 Kaniw howna howna how makpui zaeng rui, chuna chuna chu makpui zaeng rui, khatni kabah thay makpui zaeng rui, kaniw khou latgiam swna sa tuang e.

14-15 ‘Kaniw chuna chuna kabah thay mak puni; Kaniw zaucna zaucna how mak puni. Kalam thu kaniw lungning mpang the, kaniw nu nkat ngam the, khatni kaniw mik ni tiat ngam the, hamh e thei kaniw mik rui how ni tuang e, kaniw nu rui chu ni tuang e, khatni kaniw lungning rui kabah thay ni tuang e,

kumna kaniw akhou hanc guangna, ai rui kaniw ta tigaylou ni tuang e,' twna  
Isaia rui dine kasuakcloumei tei kaniw khou guang tangc the.

16 “Nangniw thu adih sangay cho! Nangniw mik how the, nangniw nu chu the.

17 Ai rui nangniw khou kaling siakna sa tuang e: muhzwng nunc khatni  
ravchaptatmei nunc mpeyna nangniw howmei hei how nii khwan e, tiki kaniw  
how tow kan mak khe khatni nangniw chumei hei chu nii khwan e, tiki kaniw  
chu tow kan mak khe.

**Napphwn Nroumei Latgiam Kabac** *(Mark 4.13-20; Luk 8.11 -15)*

18 “Hei zaeng rui, napphwn nroumei latgiam kabac hei nking o.

19 Guanghdic tuang latdyn hei chu laki kabah thay makpui mei khou tei rui  
kalungc khou nrouloumei lat ta tei simeipu rui guangna laa tat kan the.

20 Ntauh rou ding khou keyloumei thw kiu thu, lat tei chupui lev neihlana  
laaloupui mei tei e.

21 Tiki hei tei kalung syng khou laalou mak ge, kumna hei tei tingsaengh mak  
ge. Kumna lat zaeng khou tei rui ryanramei hamh e thei rai riumei guang  
pwkhou kamei hei tei mpat dat nuangc the.

22 Sauh bwan ding khou keyloumei kiu thu, kamei lat tei chu the, tiki mi panty  
khang kapaamvmei khatni lanv ta kahawmei rui lat ta tei zyn luai the. Kumna lat  
tei kathai nthai mak khe.

23 Kandih gay khou keyloumei thw kiu thu, lat tei chu lana kabah thaypui mei  
ta tei e. Kaniw kathai nthai e - asaekc rui kathai phay khat, asaekc rui  
riakcharuk, khatni asaekc rui tamruc nthai e.”

**Napriak Latgiam**

24 Jisu rui kaniw khou latgiam baihmei akhat sa dat re, “Tingkauh guangcdic  
hei, mi hei kumh tuang e: Lau taanhmeipu gaanv khat rui kalaupuk khou  
gaymei napphwn nroulou the.

25 Meic nunc zip kan khou, kata zauczihmeipu gaanv khat guangna gehu ding  
khou tei napriak thw nroulou ducna tat kan the.

26 Mi bang nunc tei thau patna kagwam ngguam pwkhou napriak tei how pat the.

27 “Khoutei kabangc nunc kaipouc khou tei guangna, ‘Kaipouc, nang tuang laupuk khou gaymei napphwn nroulou kan tu hamhna cho? Napriak bang nunc hei thu tabui thangc rui cho?’ twna sa the.

28 Khoutei kamei rui kaniw khou sa the, ‘Mi hei ata zauczihmei rui swlou tina the,’ Khoutei bangh nunc tei rui, ‘Kum e thei aniw tatna napriak bang guay tei phuai ganclou o cho?’ twna thanv the.

29 Tiki, ‘Phuai ganc nangh e, napriak bang phuai khou rui gehu bang ni phuai pat puni de,’ twna daw the.

30 ‘Lau tay mak saanv thau kariu bam kan di tho. Mai ntei khang napriak guay tei khuam kaduaina bang rey tho kumna gehu guay tei thu saamh khou laa guanglou tho,’ twna lau tay pwkhou ai rui lau taymei nunc khou sa puni.”

**Gannaeng Thw Latgiam** (*Mark 4.30-31; Luk 13.18-19*)

31 Latgiam baihmei akhat ni Jisu rui kaniw khou sa dat re: “Tingkauh guangcdic hei laupuk khou nrouloumoi gannaeng thw tei kumh tuang e.

32 Mi thw tei ramh thw pang khou nthyam liangmei bam khwan sini, hei tei thau pwkhou thu laupuk khou thaumei bang guay pang khou hei tei daic liangmei thing bang mbaih the. Kumna nruayna nunc rui kachy khou kabou guang duanv the.”

**Khay Latgiam** (*Luk 13.20-21*)

33 Baihmei latgiam ni Jisu rui kaniw khou sa the: “Tingkauh guangcdic hei meicpui akhat rui zousunc giupaekc kathumh laa lana mi guay tei puang thau khang loumei khay tei kumh tuang e.”

**Jisu rui Latgiam Swna Samei lam** (*Mark 4.33-34*)

34 Jisu rui meic nunc khou mi guay hei latgiam swna salou the; latgiam hamhna ramh baihmei kaniw khou sa mak ge.



35 Mi hei, “Ai rui kaniw khou latgiam sa puni, kandih nai thau rap khou rui meic thay makmei tuang ai sa puni,” twna muhzwng khou rui salou kanmei tei guang tangh khang the.

### **Napriak Latgiam Kabac Dinhmei**

36 Jisu meic kangdai ta tei mpatlou lana kainung khou gut the. Khoutei kaziap nunc kadaeng khou guangna, “Laupuk khou napriak thaumei tuang latgiam kabac tei aniw khou dinclou o,” twna sa the.

37 Khoutei kamei rui mundawna sa the, “Gaymei napphwn nrouloumeipu tei Meic Nac Mpouh hei e.

38 Laupuk kiu mi kandih hei e; gaymei napphwn kiu thu guanghdic nac nunc hei e; napriak kiu thu simeipu nac nunc tei e.

39 Kata zauczihmei napriak nrouloumeipu kiu thu ravsic e. Lau taymei ganv twmei kiu zuk luai mei ganv ta e; khatni lau taymei nunc kiu kauh baanchara nunc e.

40 Zuk hei luai pwkhou, napriak guay tei khuam kaduaina mai nteimei tei kumcna pat puni.

41 Meic Nac Mpouh rui katuang baanchara nunc ta thouc pat puni, kumna kaniw rui meic nunc ta tiphaysuymeis nunc khatni simei taanhmei guay ta kanguangcdic khou rui khuam kaduai puni.

42 Kumna maikwam khou phaiclou puni. Khou kiu kaniw huc nkay ndyang kariak riakna pui huay bam puni.

43 Mi ganv khou kiu ravchaptatmei guay neihmik kumcna kaniw Pu guangcdic khou gaanc puni. Kanukuanc naimeis kathuic rui chu kan diu!

### **Ryloumei Lanv Latgiam**

44 “Tingkauh guangcdic hei laupuk khou phuplou bammei lanv kumhmei tuang e. Hei tei gaanv khat pu rui ariw pwkhou, kakuam binlou ducna, neihlana kakai tatna, katuang naimeis guay zuanc lana, mi laupuk tei liu the.

### **Kaphut Latgiam**

45 “Tingkauh guangcdic hei lanvguanhmeipu akhat rui gaymei kaphut phumei kumh tuang ni e.

46 Kamei kamanv kunghmei kaphut akhat phu tow pwkhou, tat lana katuang naimei guay zuanc lana hei tei liu the.

### **Chiakc Phaihmei Latgiam**

47 “Tingkauh guangcdic hei duipui khou phaic gutna khav zaat guayna phaic binmei chiak tei kumh tuang e.

48 Chiakc tei padik pwkhou dui paengc khou zay patna, gaymei guay nggiuh khou khuaiclou the, tiki tu nuh makmei guay ndat ganc the.

49 Zuk luai pwkhou hei tei kumc puni. Kauh baanchara nunc patna ravchaptatmei pang khou rui meicsimei nunc ta kadah pat puni,

50 kumna maikwam khou phaiclou puni. Mi khou kiu kaniw huh nkay ndyang kariak riakna pui huay bam puni.

### **Latdyn Thanh khatni Latdyn Guangc Thaymei Dinhpouc nunc**

51 “Mi latgiam guay tuang kabac hei nangniw thay dai cho?” twna Jisu rui kaniw khou thanv ti khou, “Ngguay” twna kaniw rui daw the.

52 Kum tina kamei kaniw khou sa the, “Hei zaeng rui, tingkauh guangcdic khou ziap sw kanmei Riakdanv dinhpouc nunc tei thu kakai lanvkai khou rui lanv thanh khatni lanv guangc laa pat bammei tei kumh tuang e.”

### **Jisu ta Nazareth khou Laalou Makmei** *(Mark 6.1 -6; Luk 4.16-30)*

53 Jisu mi latgiam guay hei salou tang lana, mi khou tei rui tat pat kan the.

54 Kumna karamc kaidai khou guang lana kaniw tuang sinagog khou nchamlou the. Khouitei kaniw ngakna, “Tabui thangc rui mi pu hei mi ningting khatni ngamv daihmei taanv taanhmei pumtan hei laa lana cho?

55 Mi pu hei thing taanv taanhmeipu nac tei hamh nah cho? Kapui tei Meri hamh nah cho khatni Jakob, Josep, Simon, khatni Juda hei kachana nunc hamh nah cho?

56 Kakainac aluh nunc tei aniu lev lungc nchamc tuang hamh nah cho? Kum e thei, kamei mi guay hei tabui thangc rui laa lana cho,” twna sa the.

57 Kumna kaniw kakhou phaysuy the. Khoutei Jisu rui kaniw khou, “Muhzwng ta thu karamc khou khatni kakai kaikhunc khou thu chakhwang swlou mak ge,” twna sa the.

58 Kamei mi khou tei charynmei taanv taanclou geih mak khe.

**Duiluploumei Jahon Theihmei** (*Mark 6.14-29; Luk 9.7-9*)

## **Matthiu 14**

1 Mi ganv khou tei, Galili ramvlangv sinmeipu Herod rui Jisu lam khou chu lana,

2 kabangc nunc khou sa the, “Kamei hei duiluploumei Jahon tei e. Kamei hei theihmei khou rui ringethau dat lana di the. Kum lana kamei mi kumhmei taanv guay hei taanh khang pumtan nai lana the.”

3 Kalam thu, kachana Philip now Herodia zaeng rui kamei rui Jahon ta nymna ntana kangkai khou lou khwan e.

4 Tabui cho tiki, Herod kamei mi pui ta tei kariak thei layna kaw nuh mak ge twna Jahon rui kata sa khwan e.

5 Kum tina Herod rui kata swluai nii khwan e, tiki kamei meic nunc ta ping e, kalam thu kaniw rui kata muhzwng akhat re twna laa bam khwan e.

6 Herod kamei puanhpui ngai khou Herodia nac aluhpui mathiuc mav khou alaamhna Herod ta tipianlou the.

7 Kum tina kamei rui ney neymeitii ni twna Herod rui mi pui khou tei latryan swlou the.

8 Khoutei kapui rui choulou tina “Duiluploumei Jahon py tei mi kuak khou hei louna akhang tii o,” twna mi pui tei rui sa the.

9 Khoutei guangh tei kalung kabiw the, tiki kamei rui kakuak paeng khou dungc nchamc bammei mathiuc mav khou latryan swlou lapui zaeng rui hei tei tii khang latdanv pat kan the.

10 Kumna meic ndiulouna kangkai khou rui Jahon py dangv the.

11 Jahon py tei syandaih kuak khou puanc guangna tunacpui khou tei tiilou the. Kumna kamei rui kapui khou puanc guang the.

12 Khoutei Jahon ziap nunc guangna kapumc tei laana mbeih the; kumna kaniw Jisu daeng thangc tatna mi chamv tei dinclou the.

**Meic Ching Panguh ta Titumei** ( *Mark 6.30-44; Luk 9.10-17; John 6.1-14*)

13 Mi chamv tei chu lana, Jisu mi bamv tei mpatlouna hih tuangcna meic maekma bamv thangc tat khang karana tat kan the. Meic guay tei Jisu tat kanmei chamv tei chu lana kaidai guay khou rui patna phay chaeng kathei lay nzwan the.

14 Kamei hih khou rui pat pwkhou meic kangdai ta how the. Khoutei kaniw ta nzianmei pat the, kumna kaniw tuang sunu tigaylou the.

15 Tingzyn key pwkhou kaziap nunc kadaeng khou guangna, “Mi hei meic lung h makmei bamv de, kumna neih ni maek khe. Kum thena kaniw namv namv thangc tatna tu zangv khang kaphianh tat kan diu khang meic nunc ti hei mpatlou ti tho,” twna sa the.

16 Khoutei Jisu rui kaniw khou, “Kaniw tat khang kage maek ge. Kaniw tu khang nangniw tii tio.” twna sa the.

17 “Aniw khou ntyan dwm panguh lev khav kanei na nai e,” twna kaniw rui daw the.

18 “Mi guay kiu adaeng khou laanguang o.” twna Jisu rui sa the.

19 Khoutei meic kangdai ta tei phuai riaw ruc khou dungckey khang sa the. Kumna ntyan dwm panguh lev khav kanei tei sinna tingkauh thangc zauc kuna thuancku the. Ntyan dwm guay tei by bakna kaziap nunc khou tiilou the. Kumna kaziap nunc tei rui meic kangdai khou tei nzanhlou the.

20 Khoutei meic guayna kaniw bung tu nggu the. Kumna tu nsaekcloumei khuam kaduai dat pwkhou nggiuh ruhna kanei padik the.

21 Mi khou tei tumei tei ntumei lev alauc ta pah makna nggaanvmei meic ching panguh dou e.

**Jisu Dui Rue khou Tatmei** (*Metthiu. 6.45-52; John 6.15-21*)

22 Jisu kamei rui meic kangdai ta tei titat ntamv dat bam kan khou, kaziap nunc tei hih tuangcna zeihlat paengc akhat thangc kaan pat khang tat hu kan the.

23 Kamei meic kangdai ta tei ndiu ganclou ngam lana huayney khang karana chynghbut thangc ku the, kumna zingc key pwkhou mi khou tei karana bam the.

24 Mi ganv khou tei hih tei zeihlat chung rambiuc dou khou puanzingh akhangvna bam khwan the. Kalam thu puanzingh tei hih hu biak thangc rui guang riu the.

25 Khoutei, khwanpaengc pat pwkhou, Jisu dui ruc khou kaphay rui tatna kaniw daeng khou guang the.

26 Kamei dui ruc khou tat bammei ta tei how lana, kaniw ping the. “Mi hei rav di the” twna sana pingna kauc thau the.

27 Khoutei Jisu rui kaniw khou sa the, “Diw si riu, ai de; Ping nangh e!”

28 Mundawna Pitar rui sa the, “Poubauhmei, nang de tw e thei, ai ni dui ruc khou tatna nang daeng khou guang khang latdanv patlou o.”

29 Khoutei, “Guang tho” twna Jisu rui sa the. Khoutei Pitar hih khou rui keyna dui rue khou tatna Jisu daeng thangc tat guang the.

30 Puanzingh ta tei howna kamei ping the, kumna lime key khang sw the. Khoutei, “Poubauhmei ata kanlou o,” twna kamei rui kauc the.

31 Khoutei kaluak kalat kabaanc haamv patna kata zayna, “Lwmmmei nthyammei, tabui swna nang lwmsi tu cho?” twna Jisu rui sa the.

32 Kaney hih khou tei ku rappui lev, puanzingh tei nthaeke kan the.

33 Hih khou bammei nunc tei rui, “Nang hei Ravguangc Nac changh dyng the,” twna sana kata kalum the.

**Jisu rui Gennesaret khou Nnaumei ta Tigayloumei** (*Mark 6.53-56*)

34 Kaniw zeihlat tei kaan patna Gennesaret ramv khou guang the.

35 Khoutei meic nunc tei Jisu ta thay lana, mi gaengv zaengv khou bammei guay khou sa liklou the. Kumna nnaumei nunc ta kadaeng khou phungc guang geic the.

36 Nnaumei nunc tei katuang pheyy tin na sini kahi khang guang the, kumna kahitowmei guay gay nthan thiak kan the.

**Pupouh nunc tuang Latdyn** (*Mark 7.1-13*)

**Matthiu 15**

1 Mi tangv Jerusalem thangc rui Pharisimei lev Riakdanv dinh-pouc nunc Jisu daeng khou guangna,

2 “Tabui swna nang ziap nunc pupouh nunc tuang latdyn khou tat mak tu cho? Kalam thu ntyan tu ni khou baanh khiupui riak tei kaniw sw mak ge,” twna sa the.

3 Jisu rui mundawna kaniw khou sa the, “Tabui swna nangniw tuang pupouh nunc tuang latdyn tei ngaek khang rui nangniw Ravguangc tuang latdyn ngaek mak tu cho?

4 Kalam thu ‘Nang pui nang pu ta chakhwang sw o’, kumna ‘Kapui ta hamh e thei, kapu ta latsic sapui mei ta tei swluai nina e,’ twna Ravguangc rui sa e.

5 Thowkumhmei rui kapui kapu khang tii nimeiy puat tei ‘Mi hei Ravguangc khang the,’ twna salou kan e thei,

6 “kamei kapui” kapu ta zauclou dat bam khang kage maek khe’ twna nangniw rui nchamlou e. Mi kumna nangniw rui nangniw pupouc nunc tuang latdyn khang rui Ravguangc lat ta ganc the.

7 Gaylwnswmeithiu, nangniw lam khou Isaia rui mi kumna saloumei hei nchumh the:

8 ‘Mi mei nunc hei kaniw mwang rui thu ata chakhwang sw e, tiki kaniw lung thu akhou rui due the.

9 Nsa kaniw ata kalum e, maansei lat ta Ravguangc lat kumcna nchamlou the.”

**Maansei ta Sw Mphuammei** (*Mark 7.14-23*)

10 Jisu rui meic kangdai ta kadaeng khou kaw guangna kaniw khou sa the, “Nangniw mi hei nkingna kabah thay o.

11 Mwang khou rui tu gutmei puat tei rui maansei ta sw mphuam tuang hamh e, tiki mwang khou rui patmei tei rui de.”

12 Khoutei Jisu daeng khou kaziap nunc guangna, “Nang rui samei tei chu lana Pharisimei nunc lungk kabi kanmei tei nang thay khuang de cho?” twna sa the.

13 Khoutei Jisu rui mundawna, “Tingkauh thangc bammei aPu rui lingclou makmei bang guay tei phuai ganc puni.

14 Kaniw khang lungk ryanra bam nangh e. Kaniw hei mik tiatmei ta chaengzaymei mik tiatmei nunc e. Mik tiatmei rui mik tiatmei ta chaengzay e thei gaanv neime khunh khou keylou puni,” twna sa the.

15 Mundawna Pitar rui Jisu khou, “Mi latgiam kabac hei aniw khou dinclou o,” twna sa the.

16 Khoutei Jisu rui kaniw khou sa the, “Nangniw ni kabah thay mak muay di thena cho?

17 Mwang khou rui tu gutmei tei thu bung khou gut lana mpaeng thangc tat dat kan the twmei nangniw thay mak nah cho?

18Tiki mwang khou rui patmei tei thu lungk khou rui patmei tuang e. Kumna maansei ta sw mphuammei kiu mi guay tei rui the.

19 Kalam thu lungkhonh khou rui simeil lungning, meicdowmei, newsowmei, lungcmaanvmei, kaihoughmei, saraamcna sakhi swmei, meickai ta sakasicmei, mi guay hei pat re.

20 Maansei ta sw mphuammei kiu mi guay hei rui the; baanh khiu makna tumei rui maansei ta sw mphuam mak ge.”

### **Kanaanmeipui Ramlum** *(Mark 7.24-30)*

21 Jisu mi khoun tei rui tat pat lana Tur lev Sidon kaidai tuang ramvrei gei thango tat the.

22 Khoutei zauclo, mi ramv khoun tei bammei Kanaanmeipui gaanv khat patna kaucna, “Poubauhmei, David Nac Mpouh, ata zauc-nzianlou o. Anac aluhpui khoun ravsic gutna si sihna bam e.” twna sa the.

23 Kum e tiki Jisu mundawlou mak ge. Khoutei kaziap nunc kadaeng khoun guangna zaenghuayna, “Kamei aniu thei khoun kaucna tat bammei hei, kata titat dat ti tho,” twna sa the.

24 Tiki mundawna Jisu rui sa the, “Ata thu Isaraelmei kai tuang maan kanmei lauziu pang khoun na ndiulou tuang de.”

25 Tiki mi pui tei guangna kalumna, “Poubauhmei, ata nkhavlou o,” twna sa the.

26 Khoutei Jisu rui mundawna, “Alauc nunc tu nimeil tyan tei laana si nunc khang phaicloumei thu gay mak dyng e cho,” twna sa the.

27 Khoutei mi pui tei rui, “Kiuc dyng e, tiki Poubauhmei, si nunc ni kakaipouc tuang kuak paeng khoun rui tu kathow keyloumei tei thu khuaic tu kan dyng e cho,” twna sa the.

28 Khoutei mundawna Jisu rui sa the, “He meicpui, nang ramlum hei daic the! Nang kahawmei tei swlou pw di tho.” Kumna mi dyng khoun tei kanacpui ta tei tigaylou kan the.

### **Jisu rui Meic Mpeyna ta Tigayloumei**

29 Jisu mi bamv khoun tei rui tat pat lana Galili zeiclat paengc khoun tat guang the. Kumna luanghbut rue khoun kuna dungkey the.



30 Khoutei meic kangdai kadaeng khou guang the. Kaniw rui phay baumei, chuanchaymei, mik tiatmei, lat sa thay makmei, khatni baihmei mpeyna ta kadaeng khou laaguang the. Kamei rui mi guay ta tei tigaylou kan the.

31 Lat sa thay makmei nunc rui lat sa datmei, chuanchaymei nunc nthuih dat bammei, phay baumei nunc tat dat bammei, khatni mik tiatmei nunc how dat bammei tei how lana meic kangdai tei ngak the. Kumna kaniw Isaraelmei Racguangc hym thuanc the.

**Jisu rui Meic Ching Padeih ta Titumei** (*Mark 8.1-10*)

32 Khoutei Jisu rui kaziap nunc ta kadaeng khou kaw guangna sa the, “Ai meic nunc ti hei howlouna nzian the. Kalam thu kaniw adaeng khou bam guangmei ntaw thu zaeng neih thumh tangc the. Kaniw tu khang ramhkhat sini maek khe. Titu makna kaniw ta titat dat nii mak khe. Kaniw chaeng dak khou daapmumanc pung di the.”

33 Khoutei kaziap nunc rui kakhou sa the, “Meic kangdai heizumei ta titu biuh khang mi tazikramv khou hei tabui thangc rui aniu ntyan laa nina cho?”

34 Khoutei, “Nangniw khou ntyan azuh nai tu cho?” twna Jisu rui kaniw khou thanv the. “Ntyan dwm chanei lev khav asaekc na nai e,” twna kaniw rui daw the.

35 Jisu rui meic nunc ta tei kandih khou tidungc keylou the.

36 Kumna ntyan dwm chanei tei lev khav guay tei laana thuanckulou the, kumna kaziap nunc rui meic kangdai khou tei nzanhlou the.

37 Kaniw meic guayna tu ngguna tu tang pwkhou tu nsaekcloumei giupaekc chanei padikna kaniw rui khuam guang dat the.

38 Mi khou tei tumei tei ntumei lev alauc ta chak makna meic ching padeih e.

39 Meic kangdai ta tei titat ntamvlou lana, kamei hih tuangcna Magadan tuang ramv khou guang the.

**Sw-nchinmei Taanv Taanclou khang Samei** (*Mark 8.11-13; Luk 12.54-56*)

## Matthiu 16

1 Khoutei Pharissimei nunc khatni Saddukimei nunc Jisu daeng khou guangna, kata nchanvna, Ravguangc tuang ngamv khou rui sw-nchinmei taanv kaniw khou lyanlou khang sa khwan e.

2 Khoutei mundawna Jisu rui kaniw khou sa the, “ Neih key khou tingpuk haengc ti thei ‘ting gay puni the’ twna nangniw sa e.

3 Lauthwan thwanzingh tingpuk haengc zingc ti thei 'tingpwanzingh guang puni the’ twna nangniw sa e. Kumna tingpuk zaw khou rui guang nimei ting neih lwnlung nangniw how pat thay e thei, ntaw hei nangniw khou sw- nchinlou bammei guay tuang kabac thu nangniw how pat thay mak khe nah cho?

4 Meicsimei khatni ravchaptat makmei mei nunc hei rui sw-nchinmei ta phu e. Tiki Jona khou swlou kanmei sw-nchinmei tei hamhna baihmei lyanlou lak ge.” Kumna kaniw ta ganclouna kamei tat kan the.

### **Pharissimei khatni Saddukimei tuang Khay** *(Mark 8.14-21)*

5 Ziap nunc tei zeihlat paengc akhat thangc kaan pat the. Khoutei kaniw ntyan phungc amuc the.

6 Khoutei Jisu rui kaniw khou sa the, “Pharissimei khatni Saddukimei nunc tuang khay khou rui ramhthay o khatni suriak thay o.”

7 “Aniu ntyan phungc ti makna sa bam tu khuang the,” twna kaniw kaphianh bam the.

8 Hei tei thay lana Jisu rui sa the, “He lwmmei nthyammei nunc, ntyan maekmei lam khou nangniw tabui swna kaphianh bam tu cho?

9 Nangniw kabah thay mak he nah cho? Ntyan dwm panguh rui meic ching panguh ta tituna giupaekc azuh nsaekclou cho twmei nangniw amuc dat the nah cho?

10 Ntyan dwm chanei rui meic ching padeih ta tituna tu nsaekcloumei giupaekc azuh khuam guang cho twmei amuc dat the nah cho?

11 Ai ntyan lam khou sa bam tu hamh e twmei akumhna nangniw thay makna cho? Pharissimei khatni Saddukime i tuang khay khou tei rui suriak thay o.”

12 Khoutei kamei ntyan tuang khay lam khou sa bam tuang hamh e, tiki Pharissimei nunc khatni Saddukime i nunc tuang latdyn khou tei rui suriak thay o twpui tuang e twmei kaniw kabah thay the.

**Pitar rui Jisu lam khou Sa Ndauhmei** (*Mark 8.27-30; Luk 9.18-21*)

13 Mi tange Jisu Kaisaria Philippi kaidai tuang ramv khou guang khou, “Meic Nac Mpouh hei thow e twna meic nunc rui sa bu cho?” twna kamei rui kaziap nunc khou thanv the.

14 Khoutei kaniw rui sa the, “Meic gaanvsaekc rui ‘duiluploumei Jahon tei e,’ meic gaanvsaekc rui ‘Elija e,’ meic gaanvsaekc rui ‘Jeremia e,’ hamh e thei ‘muhzwng akhat re’ twna sa e.”

15 Kamei rui kaniw khou sa the, “Nangniw rui thu ata thow e twna sa tu cho?”

16 Khoutei mundawna Simon Pitar rui, “Nang thu ringhmei Racguangc Nac Mpouh Khrista e,” twna sa the.

17 Khoutei Jisu rui kakhou sa the, “Jona nac mpouh Simon, nang sangay e! Mi hei nang khou tithayloumei hei maansei rui hamh e, tingkauh thangc bammei aPu rui e.

18 Ai rui nang khou kadylou tuang e: Nang hei Pitar the, mi taudaic ruc khou hei atuang phwamling kasiamh thau puni. Kumna taruaih raengckat rui ni mi ti hei ngam dat lak khe.

19 Tingkauh guangcdic kaikhambv laanhmei khatni mbanghmei ngamv ai rui nang khou tiilou puni. Kumna nang rui kandih khou karakcloumei tei tingkauh thangc ni karakclou puni khatni nang rui kandih khou ricloumei tei tingkauh thangc ni riclou puni.”

20 Khoutei kamei hei Khrista e twmei meic gaanv khat na khou sini raclou mak khang kaziap nunc khou kadylou the.

**Jisu Kamei Theic Nime i lam khou Dincloumei** (*Mark 8.31-9.1; Luk 9.22-27*)

21 Mi khou tei rui thauna, Jisu Khrista kamei Jerusalem thangc tat puni kumna gaanvthaih nunc, amuh daihmei nunc, khatni Riakdanv dinhpouc nunc baanc khou ryanramei mpeyna ariw puni, kumna kata swluai puni, tiki zaeng neih thumhpui nungc ringcthau dat puni twmei kaziap nunc khou ndaw sa thau the.

22 Pitar rui kata nduangh langc patna kata kakhimna, “Poubauhmei, mi kumhmei tei nang khou tipatlou makmei sw kan diu, mi kumhmei tei nang khou patlou ni tuang hamh e,” twna sa the.

23 Khoutei Jisu Pitar biak thangc karih patna, “Athei thangc tat kan o, Seitaan! Nang hei akhang chaeng khamvmei de. Nang Ravguangc tuang lungning ning mak ge, maansei tuang de,” twna sa the.

24 Khoutei Jisu rui kaziap nunc khou sa the, “Thow pw ni athei lay nii e thei karana kata nuh mak nina e, kumna katuang kros phungcna athei lay nina e.

25 Kalam thu karingcpaan kan khang swpui mei tei, hei tei maan puni; tiki akhang rui karingcpaan maanloupui mei tei ringhpaan laatow puni.

26 Tabui cho tiki, thowkumhmei rui mbaanv kapwm kakhang laatow sini, mi khang tei rui karingcpaan maanlou e thei, kakhang tabui gaengna cho? Karingcpaan thuak dat nuhpui puat tabui naina cho?

27 Kalam thu Meic Nac Mpouh hei Ravguangc tuang baanchara nunc ta nduanghna kaPu tuang hym khou guang puni. Mi khou kiu meic kathuic khang kataanv kataanv thai tii puni.

28 Ai rui nangniw khou kaling siakna sa tuang e: Meic Nac Mpouh kaguangcdic khou guangmei ta how mak saanv theic lak nimei mei gaanvsaekc mi khou ding bammei pang khou hei nai e.”

**Jisu Kalwn Gwanlihmei** (*Mark 9.2-13; Luk 9.28-36*)

## **Matthiu 17**

1 Zaeng charuk tangv, Jisu Pitar khatni Jakob lev Jahon kai chana nei ta nduanghna kaniw rana chynghbut kauhmei khou ku the.

2 Khoutei Jisu kaniw hu khou kalwn guanlih pat the. Kumna kazaw neih kumc ti tah ta the khatni kapheybaan mphwan kariph rip the.

3 Khoutei Mousi lev Elija rui kata kachuc bammei ta kaniw how the.

4 Khoutei Pitar rui Jisu khou, “Poubauhmei, aniu mi khou hei bammei gay the. Nang rui nuhlou e thei, mi khou hei zypuikai kathumh - nang khang khat, Mousi khang khat, Elija khang khat ai swlou ni the,” twna sa the.

5 Pitar rui mi kumcna sa bam khou, ti tah tamei muangc rui kaniw ta gumbin the. Khoutei muangh khou tei rui khwan akhat rui, “Mi hei alung kwnmei, ai rui nzianmei aNac Mpouh e. Nangniw kalat chu o,” twna sa the.

6 Ziap nunc tei mi khwan tei chu lana ping kadunhna kaniw zaw kandih khou sow nkhum khuak key the.

7 Khoutei Jisu kaniw daeng khou guangna kaniw ta kahina, “Thau tho, ping riu,” twna sa the.

8 Khoutei kaniw zauc thau pwkhou Jisu karana bam khwan the.

9 “Meic Nac Mpouh hei theihmei khou rui ringcthau dat mak saanv, mi ndawman hei meic gaanv khat na khou sini nangniw raclou nuh mak ge,” twna kaniw chyangbut khou tei rui key datmei chaenglwan khou Jisu rui kaniw khou sa the.

10 Khoutei, “Kum e thei tabui swna ‘Elija guang rey puni,’ twna Riakdanv dinhpouc nunc rui sa bam tu cho?” twna ziap nunc rui thanv the.

11 Jisu rui mundawna, “Elija guang rey changh ni tina the, kumna kamei rui ramh guayna chamdaanvlou puni tina the.

12 Ai rui nangniw khou saloupui tuang e: Elija kiu guang tang the. Tiki kaniw rui kata thay mak khe. Kumna kaniw rui karuc khou sw niimei guay swlou kan the. Hei tei kumc muayna Meic Nac Mpouh ni kaniw baanc khou ryanra khaengv puni.”

13 Khoutei kamei duiluploumei Jahon lam khou sa bam tuang e twmei ziap nunc tei thay the.

**Jisu rui Ravsic Gutmei Alauc Gaanv khat ta Tigayloumei** (Mark 9.14-29; Luk 9.37-43)

14 Jisu khatni kaziap nunc tei meic kangdai bammei bamv khou tei key dat pwkhou, meic gaanv khat Jisu daeng khou guangna khuksun keyna,

15 "Poubauhmei, anac mpouh ta zauc nzianlou o. Kakhau theilanhmei ravpuat naina katupc sihna kamei mai khou khatni dui khou bowlouna ryanra sihna bam e.

16 Ai kata nang tuang ziap nunc khou nduangh guang the, tiki kaniw rui kata tigaylou ngam mak khe," twna sa the.

17 Khoutei mundawna Jisu rui sa the, "He lwm makmei khatni zay mbianghloumeithiu, ai nangniw pang khou asaanh bam bam nina cho? Kata mi bamv khou hei nduangh guang o."

18 Jisu rui ravsic ta tei luh the. Khoutei ravsic tei mi nac khou tei rui pat kan the. Kumna mi dyng khou tei mi nac tei gay dat kan the.

19 Khoutei ziap nunc tei Jisu daeng khou kaniw rana guangna, "Tabui sw tina aniw mi ta tei nthau pat ngam mak tu cho?" twna thanv the.

20 Khoutei Jisu rui kaniw khou sa the, "Mi hei nangniw lwmmei nthyam tina e. Ai rui nangniw khou kaling siakna su tuang: nangniw lwmmei gannaeng thw di na sini nai e thei nangniw rui mi chynghut ti hei, "Mi khou rui mi thangc tei kalaic tat kan o,' tw ti thei kalaic tat kan puni de. Nangniw khang ngam lak tuang khat sini nai ni tu ham e."

**Jisu rui kamei Theic Nimeilam khou Sa Datmei** (Mark 9.30-32; Luk 9.43-45)

22 Ziap guay tei Galili khou guang kaduai datpiu ganv khou Jisu rui kaniw khou sa the, "Meic nac Mpouh ta meic nunc baanc khou tii patlou puni the,

23 kumna kaniw rui kata swluai puni. Tiki zaeng neih thumhpui nungc kata tiringcthaulou dat puni." Khoutei kaniw mpeyna lungh kabiou the.

**Ravkai tuang Syankhav Tiimeil**

24 Jisu khatni kaziap nunc Kapharnahum khou guang khou, ravkai tuang synkhav kakhamei nunc Pitar daeng khou guangna, "nangniw tuang dinhpouc hei ravkai tuang syankhav tii daih?" twna thanv the.

25 Khoutei, "Nngway twna Pitar rui daw the. Pitar tei kainung khou gut pwkhou, Jisu rui sa reyna kakhau sa the, "Simon nang akumhna kakhanh tu cho? Kandih tuang guangc nunc rui syan thaengv khatni dihkha laamei tei thow hou rui laa tu cho? Kaguangcdih nac nunc khou rui ni, guanghdc baihmei nac nunc khou rui cho?"

26 "Guanghdc baihmei nac nunc khou rui de," twna Pitar rui daw the. Khoutei Jisu rui kakhau sa the," Kum e thei, kaguangcdih nac nunc tei thu tii khang hamh the ni?

27 Kum khwan sini, aniu rui kaniw lung tipuamclou mak khang, nang zeihlat thangc tatna khavkhuay mphaan tho. Kumna manc reyme khav mwan tei phaek pat ti thei shekel akhat nei puni. Hei tei anei thaengv khang tiilou tho."

### **Thow tei Daic liangmei Cho? ( Mark 9.33-37; Luk 9.46-48)**

1 Mi ganv khou tei ziap nunc tei Jisu Daeng khou guangna, "Thow tei tingkauh guangcdih khou daic liangmei cho?" twna thanv the.

2 Khoutei alauc khat ta kaw guangna kaniw hu khou tidinglouna

3 sa the, "Ai rui nangniw khou sa tuang e:nangniw lung laicna alauc nunc kumh mak ge thei, nangniw tingkauh guangcdih khou gut zat ni tu hamh e.

4 Hei zaeng rui thow puni niamh keyna, mi nac launa hei kumhpui mei tei tingkauh guanghdc khou daic liangpui mei.

5 Kumna thow pw ni mi kumhmei alauc gaanv khat ta azanc khou laaloupui mei tei, ata laalou tu e."

### **Paapc taanh khang Nthiammei (Mark 9.42-48; Luk 17.1-2)**

6 Thow pw ni akhou lwmmmei mi kumhmei alauc akhat ta tiphaysuyloupui mei ta thu kaguang khou napriaktauc daihmei ntalouna duipui syng thangc phaicloumei rui kakhang gay e.

7 Meic nunc ta tiphaysuypui tuang mpeyna naime mbaanv kandic hei sansi e dav! Nthiammei thu guang puni di the, tiki kakhau rui nthiammei guang bampui mei tei sansime e.

8 “Nang phay rui hamh e thei nang baanc rui nang ta tiphaysuy e thei, hei tei dan tapna nang khou rui ganc o. Kalam thu nang phay nang baanc ntanghna tingsaeng mai khou gutmei suangc, nang phay nang baanc ntangh mak sini ringhmei khou gutmei rui nang khang gay e.

9 Nang mik rui nang ta tiphaysuy e thei, hei tei lat patna ganc o. Kalam thu nang mik kanei naina maikwam mai khou gutmei suangc nang mik akhat na naina ringhmei khou gutmei rui nang khang gay e.

### **Maanmei Lauziu Latgiam** (*Luk 15:3-7*)

10 “Mi nthyammei nunc ti hei thouth sw makpui tuang sw mak khang nangniw ramhthay o. Ai rui nangniw khou sapui tuang e: tingkauh thangc kaniw luang baanchara nunc tingkauh thangc bammei aPu daeng khou guang tanh tan bam e.

11 (Kalam thu Meic Nac Mpouh hei maanmei ta kanlou khang guang luang e.)

12 “Thowkumhmei lauziu phay khat naimei gaanv khatpu katuang lauziu akhat ruan maan tat kan ti thei kamei a kumh puni cho? Riakchakiuna chakiu ta tei chyangbut khou ganc lou ducna ruan maan kanmei akhat ta tei phu tat pw lak nah cho?

13 Ai rui nangniw khou kaling siakna sa tuang e: kamei rui hei tei ariw dat pwkhou maan makmei riakchakiuna chakiu naimei khang tei suangc maan kanmei akhat ta phu tow datmei khou tei neihla diangc e.

14 Hei tei kumcna, mi nthyammei pang khou rui akhat na sini maan kanmei ta tingkauh thangc bammei nangniw pu laa nii mak ge.

### **Nkhuaimei Chana**

15 “Nang chana rui nang khou nkhuailou tuang nai e thei, tatna kamei rui nkhuailoumei tei nangney rana rac o. Kamei rui nang lat tei chulou e thei, nang rui nangney chana kiang riang tigaylou dat the.

16 Tiki kamei rui chulou mak ge thei, gaanv nei gaanv thumh mwang khou rui kiuc dyng e twmei thay khang gaanv khat gaanv nei ta nduanghna tat ro.



17 Kamei rui kaniw tuang lat tei ni chulou mak ge thei, phwamling khou phungclou ti tho. Kamei rui phwamling tuang lat tei nganvna chulou mak ge thei, kata tei Zentelmei khatni dihhav kakhamei nunc ta kumcna khaclou ti tho.

### **Bangcloumei khatni Ricloumei**

18 “Ai rui nangniw khou kaling siakna saloupui tuang e: nangniw rui kandih khou bangcloumei tei tingkauh thangc ni bangclou puni khatni nangniw rui kandih khou ricloumei tei tingkauh thangc ni riclou puni.

19 “Ai rui nangniw khou sa dat re: Kandih khou bammei nangniw gaanv nei rui tabui lam khou pw ni chwnchamhna ney e thei tingkauh thangc bammei aPu rui swlou puni.

20 Kalam thu gaanv nei gaanv thumh azanc khou guang kariuna bammei bamv khou tei ai bam e.”

### **Kuaklou Makmei Bangc Gaanv Khat Latgiam**

21 Khoutei Pitar guangna Jisu khou sa the, “Poubauhmei, akhou nkhuamei swlou bammei chana gaanv khat ta ai kuaklou azuh nina cho? Chanei ny?”

22 Jisu rui kakhou sa the, “Chanei na hamh e, kuaklou luan chanei tei riakchanei nina de.”

23 “Kalam thu, tingkauh guangcdic hei guangh khat rui katuang bangc nunc tuang syan chak sw nthan khang swmei kumhmei tuang e.

24 Rey liangmei khou talent ching ruh pow phunghmei bangc akhat ta nduangh guang the.

25 Mi pu tei tii dat ngam timak khena, kanow kanac nunc khatni katuang naimeimei guay zuancna khangh khang guangh tei rui sa the.

26 Khoutei banghpu tei pun nkhum laamv keyna kalumna, ‘Nang lung puamclou ri tho, kaguayna ai khangclou ni de,’ twana sa the.

27 Khoutei guangh tei kabangcpu ta tei ning ngam makna kapow guay tei kuaklouna mpatlou kan the.

28 “Mi bangcpu tei tat pat pwkhou guangh bangc sw nchamcmei katuang denari phay khat pow phunghmei kapammei gaanv khat ta ariw the. Khoutei mi pu ta tei nymna kakhac gayna ‘Apow tei tii tho’ twna sa the.

29 Mi pu tei rui, pun nkhum laamv keyna, ‘Nang lung puamclou ri tho, ai khangclou ni de,’ twna sa the.

30 Khoutei kamei tei nuh mak khe, kumna kapow tei khangclou mak saanv lou khang kangkai khou tiilou kan the.

31 Kapammei guangh bangc nunc tei hei tei how pwkhou kaniw lung mpeyna kabiw the. Kumna kaniw guangh daeng khou guangna pat kanmei guayna tei poulou the,

32 Khoutei mi bangcpu ta tei kaw guangna guangh tei rui kakhou sa the, ‘Meicsime bangc, nang rui zaenghuaypui thei layna nang pow guayna tei ai kuaklou kan the.

33 Ai rui nang ta zauc nzianloumei kumcna nang ni nang pammei ta zauc nzianlou nina hamh nah cho?’

34 Khoutei guangh tei kalung puamcna kapow guayna tei khangc ngam mak saanv rai khang kangkai kaipouc baanc khou tiilou kan the.

35 “Nangniw chana makaamv khat khat ta nangniw lung syng khou rui kuaklou mak ge thei, tingkauh thangc bammei aPu rui ni nangniw khou hei tei kumcna swlou puni.”

**Nowtaanmei lam khou Dincloumei** (*Mark 10.1-12*)

## **Matthiu 19**

1 Jisu mi guay hei salou tang lana Galili mpatlouna Jordan paengc thangc Judia tuang ramvrei lungc khou gut the.

2 Khoutei meic kangdai kathei lay the, kumna mi khou tei kaniw ta tigaylou the.

3 Khoutei Pharisime nunc guangna kata nchanvna, “Nggaanvmei rui kanow ta ramh lam akhat zaeng rui taan khang Riakdanv rui nuh daih?” twna thanv the.

4 Jisu rui mundawna sa the, “Puakthau puaksiak khou rui Damhmeipu rui kaney ta nggaanvmei khatni ntumei swna damclou the twmei nangniw pah mak he nah cho?”

5 Khoutei Ravguangc rui sa the, ‘Hei zaeng rui nggaanvmei rui kapui kapu ta mpatlouna kanow lev guang kariu nina e, kumna kaney pumh akhat sw nina e.’

6 Hei zaeng rui kaney tei kanei hamh the, pumh akhat di the. Hei zaeng rui Ravguangc rui zay kariulou kanmei tei maansei rui sw ntamv dat nuh mak khe.”

7 Kaniw rui Jisu khou sa the, “Mi kumc e thei tabui swna now taan latryan hyna tii e thei taan nuh e twna Mousi rui sa tu cho?”

8 Jisu rui kaniw khou mundawna sa the, “Nangniw nowtaan nuh khang Mousi rui nuhloumei tei thu nangniw lung tanc langv tipui zaeng rui e; puakthau puaksiak khou thu mi kumh mak ge.

9 Ai rui nangniw khou samei thu: lungmaanvpui zaeng rui hamhna kanow ta taan lana meic baihmei ta kaw datmei kamei tei lungmaanvmei e.”

10 Kaziap nunc tei rui kakhou sa the, “Nggaanvmei khang mi kumhmei sih nai e thei thu, nowkaw mak rapmei rui gay the cho!”

11 Khoutei Jisu rui kaniw khou sa the, “Ai ntaw samei hei meic kathuic na kabah laa thay ni tu hamh e, kabah thay khang Ravguangc rui tiiloupui mei na tei rui laa thay khang de.

12 Nowkaw makmei lam mpeyna nai e: gaanvsaekc rui kapui bungpuak khou rui nggaanvmei paek pat makmei nai e, gaanvsaekc rui kapumc siammei nai e, gaanvsaekc rui Ravguangc guangcdic khang rui nggaanvmei chwn ganhmei nai e. Mi kabac hei laa thay thaymei rui laa la tho.”

**Jisu rui Alauc nunc ta Suaihiamloumei** (*Mark 10.13-16; Luk 18.15-17*)

13 Mi tangv tei, kaniw py khou kabaanc bouclouna huayneylou khang alauc nunc ta meic nunc rui Jisu daeng khou laaguang khwan e. Khoutei ziap nunc tei rui meic nunc ta tei luh the.

14 Khoutei, “Alauc nunc tei adaeng khou guang kan diu, kaniw ta khaam riu. Kalam thu tingkauh guangcdic hei mi kumhmei nunc khang e,” twna Jisu rui sa the.

15 Khoutei Jisu rui kaniw py khou kabaanc bouclouna tat kan the.

**Lungcgaymei Chabwan Gaanv Khat** (*Mark 10.17-31; Luk 18.18-30*)

16 Khoutei meic gaanv khat Jisu daeng khou guangna, “Dinhpouc, ringsuangmei laa khang ai tabui tuang gaymei taanc nina cho?” twna thanv the.

17 Jisu rui kakhau sa the, “Tabui swna nang akhou gaymei lam khou thanv bam tu cho? Gaymei gaanv khat nai e; nang ringhmei khou gut nii e thei kalatdanv guay tei piu o.”

18 “Tabui latdanv tei cho?” twna kamei rui thanv the. Khoutei Jisu rui sa the, “Nang meicdow lak nina e, Nang lungcmaanv lak nina e, Nang kaihouc lak nina e, Nang saraamhmei sakhi tii lak nina e,

19 Nang pui nang pu ta chakhwang sw nina e, Nang tuang kaining kaigeimei ta nang rana nang ta nzianmei kumcna nzian nina e twmei guay hei the.”

20 “Mi guay hei thu ai piu the. Ai tabui tuang nthuih mak tuang nai bu heh cho?” twna mi pu tei rui sa the.

21 Khoutei Jisu rui kakhau sa the, “Nang nthuih nii e thei, tat lana nang tuang naimeimei guay tei zuanc lana lungcsimeimei khang tii tio. Kum e thei tingkauh thangc nang tuang lanv nai puni. Kumna guangna athei lay o.”

22 Mi chabwanpu tei hei tei chu la khou, neihla makna tat kan the. Kalam thu katuang lanv mpeyna nai khwan e.

23 Khoutei Jisu rui kaziap nunc khou sa the, “Ai rui nangniw khou kaling siakna sa tuang e: Lungcgaymei thu tingkauh guangcdic gut khang kungc puni.

24 Ai rui nangniw khou sa dat re: Lungcgaymei rui Ravguangc guangcdic gutmei suangc guaikuan mpinh mai khou gutmei rui chiw e.”

25 Ziap nunc tei hei tei chu la khou kaniw ngakna, “Kum e thei ringsuangmei kiu thow rui laa ngam nina cho?” twna sa the.

26 Khoutei Jisu rui kaniw ta zaucna sa the, “Mi hei maansei khang thu ngam mak khe, tiki Ravguangc khang thu ngam tu rana de.”

27 Khoutei Pitar rui mundawna sa the, “Zauclo, aniw ramh guayna ganclouna nang thei lay tat bam the. Kum e thei aniw khang tabui tuang nai puni tha?”

28 Jisu rui kaniw khou sa the, “Ai rui nangniw khou kaling siakna sa tuang e: Athei laymei nangniw hei thu kandih kathanc thangc Meic Nac Mpouh rui hymdaihmei katuang guangc bamvpaeng khou dungc pwkhou guangh bamvpaeng ruhna kanei khou dungc nchamcna Isaraelmei kaikhwang ruhna kanei ta sin bam puni.

29 Kumna thow pw ni kakai, kalau, kachaic, kakainac, kapui, kapu, khatni kanac ta azaeng khang rui gancloumei thai tei hei tei suangc geihna kamei laatow dat puni, kumna ringcsuangmei ni laa puni.

30 Kumna ntaw reymeisw bammei mpeyna hei nkhamhmei sw puni, khatni ntaw nkhamhmei sw bammei mpeyna hei reymeisw puni.”

## **Lauphihmei Latgiam**

### **Matthiu 20**

1 “Tingkauh guangcdic kiu mi hei kumh tuang e. Drakha lau taanhmei gaanv khatpu rui taanv taanhpu mei phu khang lauthwan khuanzingh pat the.

2 Zaeng neih khat phy denari' akhat khang nuhna meic gaanvsaekc katuang drakha lau thangc ndiulou kan the.

3 Tingchung zaengc khou tat pat dat pwkhou meic gaanvsaekc taanv taanh makna kaithyan khou ding bammei ta how the.

4 Khoutei kamei rui kaniw khou, ‘Nangniw ni atuang drakha lau tat ro, phy gayna tii puni,’ twna sa the.

5 Khoutei kaniw tei ni tat kan the. Neih ndyng khou ni, neih nchiangh key khou ni kamei tat pat dat muayna hei tei kumcna ndiulou dat muay the.

6 Kumna tingzyn ramvgei kamei tat pat dat pwkhou meic baihmei ni ding bammei ta ariw the. Khoutei, ‘Nangniw tabui swna taanv taanh makna mi khou hei nsa ding zingc bam tu cho?’ twna sa the.

7 ‘Aniw ta thu meic rui lanvloumei maekna the,’ twna kaniw rui daw the. Khoutei kaniw khou, ‘Nangniw ni atuang drakha lau tat ro.’ twna sa the.

8 “Tingzyn drakha lau kaipouc tei rui katuang taanvypu khou sa the, ‘Taanv taanhmei guay ta kaw tho, kumna kaniw phy tei tat nkhamh liangmei khou rui tii thauna tat rey liangmei khang nkhamh liangmei khou tii ti tho.’

9 Khoutei tingzyn ramvgei tatmei nunc khang denari akhat akhat tiilou the.

10 Tat rey liangmei nunc tei kaniw khang thu geic pwng the twna ningna guang the. Tiki kaniw khang ni denari akhat akhat tiilou the.

11 Hei tei tiilou pwkhou laupouc ta pian makna sa thau the,

12 ‘Mi nkhamhmei nunc thu ganvdak akhat na taanh tuang de. Aniw neih ndaengna neihmaryn taanhmei nunc phy lev nchamcna nang tii bammei thu tabui thiak cho?’ twna sa the.

13 Khoutei kamei rui kaniw pang khou gaanv khat khou, ‘Champanv, ai nang ta guat mak ge. Denari akhat khang nang nuhna taanh de.

14 Nang tuang phy laana tat tho. Mi nkhamhmeipu khang ni nang khang lev nchamcna ai tii nii na de.

15 Atuang tei thu ai anyng sw nuh mak nah cho? Alung daicna tiime i ti hei nang mamav bu cho?’

16 “Mi hei kumcna nkhamhmei nunc hei reyme i sw puni, khatni reyme i nunc hei nkhamhmei sw puni.”

**Jisu Kamei Theic Nime i lam Sa Luan Kathumhme i** (*Mark 10.32-34; Luk 18.31-34*)

17 Jisu Jerusalem thangc nganghme i chaenglwan khou, kaziap ruhna kanei ta nduangh langc patna kaniw rana tat bam khou kamei rui kaniw khou sa the,

18 “Zauclo, aniu Jerusalem khou ngangh puni the. Mi khou tei Meic Nac Mpouh ti hei amuh daihme i nunc khatni Riakdanv dinhpouc nunc baanc khou tii pat puni the. Kumna kaniw rui kakhuay nkhamlouna kata swluai khang,

19 Zentelme i nunc khou tiilou tina kaniw rui kata sinnui puni, bai puni, kumna kros khou thaengluai puni. Tiki zaeng neih thumhpui neic kata tiringcthau dat puni.”

**Zebedi Now rui Kanac Nei Bamv** khang **Neymei** (*Mark 10.35-45*)

20 Mi tangv Zebedi now kanac nei ta nduanghna ramhkhat ney khang Jisu daeng khou guangna kalum khwan e.

21 Khoutei, “Nang tabui tuang kahawna cho?” twna Jisu rui thanv the. “Anac nei ti hei nang guangcdic khou kiu nang tuang baanzat baandaw khou tidungh khang latdanv patlou o,” twna sa the.

22 Mundawna Jisu rui sa the, “Nangney tabui tuang ney bam tu cho twmei nangney thay mak ge. Ai rui zangv nimei buangc hei nangney zangv diw nah cho?” “Aney zangv diw e,” twna kaney rui kakhau daw the.

23 Khoutei Jisu rui kaney khou sa the, “Nangney atuang buangc zangv puni de, tiki atuang baanzat baandaw khou dungc nimei thu ai rui tii nina hamh e. Mi bamv hei thu aPu rui kamei mi chandaanvloumei nunc khang tii kan ni tuang de.”

24 Hei tei baihmei ziap ruh tei rui chu la khou kakai chana nei ta kaniw lung puamc the.

25 Khoutei Jisu rui kaniw ta kaw guang kaduaina sa the, “Nangniw thay bammei tei the: Zentelmei guangc nunc thu kaniw tuang mei nunc ruc khou kaipou sw e, khatni kaniw tuang meicdaihmei nunc tei meic nunc ruc khou ngamv sin e.

26 Tiki nangniw thu hei tei kumc nina hamh e. Nangniw thowkumhmei rui meicdaihmei sw nii e thei, kamei meic guayna siamruaimei sw nina de.

27 Thowkumhmei rui daic liangmei sw nii e thei, kamei tei nangniw bangc sw nina e.

28 Zauclo, Meic Nac Mpouh hei kasiamruai swlou khang guang tu hamh e, tiki siamruai sw khang khatni meic mpeyna ta thuak pat khang theiclou khang guang tuang de.”

**Jisu rui Mik Tiatmei Gaanv Nei ta Tigayloumei** (*Mark 10.46-52; Luk 18.35-43*)

29 Jisu lev kaziap nunc Jeriko khou rui tat pat dat khou, meic kangdai kathei lay tat bam khwan e.

30 Khoutei chaeng daeng khou dungc bammei mik tiatmei gaanv nei Jisu guang e twmei chu lana, “Poubauhmei, David Nac Mpouh, aney ta zauc nzianlou o,” twna kauc the.

31 Khoutei meic nunc tei rui kaney ta “Reih rei o” twna luh the. Tiki kaney kauc ranv hay hayna, “Poubauhmei, David Nac Mpouh, aney ta zauc nzianlou o,” twna kauc the.

32 Khoutei Jisu dingna kaney ta kawna, “Ai rui nangney khang tabui swlou tu laa niina cho?” twna thanv the.

33 Khoutei, “Poubauhmei, aney mik tihowlou dat ro,” twna sa the.

34 Jisu kaney khang ningngam mak khe, kumna kaney mik tei kahilou the. Mi dyng khou tei kaney how dat the, kumna kathei lay the.

**Jisu Jerusalem khou Guangh Swna Gutmei** (*Mark 11.1-11; Luk 19.28-40; John 12.12-19*)

## **Matthiu 21**

1 Jisu lev kaziap nunc Jerusalem ana guangna, Laengkic Chyng khou naime i Bethphage khou guang pwkhou, Jisu rui kaziap gaanv nei ta ndiulouna

2 sa the, “Nangney hu khou naime i namv khou hei gut tho. Mi khou hei nangney gut rappui lev kuanniam kui akhat bangclou bammei ta ariw puni. Kanac ni kadaeng khou bam puni. Hei tei ricna adaeng khou laanguang o.

3 Thow rui pw ni nangney ta sa pw e thei, ‘Kaipouc khang mi nei hei kage naina de,’ twna sa tio. Kum ti thei kaneih makna kamei mpatlou puni de.”

4-5 “Zaion nac aluhpui khou sa tio, Zauclo, nang guangc kuanniam tuangcna, kuanniam nay launa khou tuangcna, nzaenghna nang khou guang e,” twna muhzwng rui saloumei tei guang tangh khang mi hei pat tuang e.

6 Ziap nei tei tatna Jisu rui saloumei kumcna taanc the:

7 Kaney rui kuanniam kui akhat lev kanac akhat laa guangna mi kanei nam khou tei kaniw phey bamclouna Jisu dungc the.



8 Meic kangdai rui kaniw phey chaeng khou bamclou the. Baihmei gaanvsaekc rui thingnuy laana chaeng khou bamclou the.

9 Khoutei kathei kahu lwan tatmei meic kangdai tei rui, “David Nac Mpouh khang Hosanna! Poubauhmei zanc khou guangmeipu hei sangaymei sw diu!” twna kauc the.

10 Jisu Jerusalem khou gut pwkhou, kaidai kapwm tei kachin karo the, kumna, “Mi pu hei thow lana cho?” twna meic nunc rui thanv the.

11 “Mi pu hei Nazarethmei muhzwng Jisu e,” twna meic kangdai tei rui sa the.

**Jisu Ravkai khou Gutmei** (*Mark 11.15-19; Luk 19.45-48; John 2.13-22*)

12 Jisu Ravkai khou gutna Ravkai khou puat zuanc bammei khatni hu bammei guay ta nthau pat the, syan akhiak bammei nunc tuang paeng guay khatni aphyna zuanc bammei nunc tuang bamv guay thui nkhanlou the.

13 Kumna kaniw khou sa the, “Akai ta huayneypui kai kaw pu ni,’ twna hylou e, tiki nangniw rui mi ti hei kwamtumei nunc duppui bamv tiswlou the.”

14 Mik tiatmei nunc khatni phay baumei nunc Ravkai khou tei kadaeng khou guang the. Khoutei kamei rui kaniw ta tigaylou the.

15 Kamei rui taancloumei charynmei taanv guay khatni “David Nac Mpouh khang Hosanna,” twna alauc nunc rui Ravkai khou kauc bammei tei amuh daihmei nunc khatni Riakdanv dinhpouc nunc tei how lana kaniw lung puamc the.

16 Khoutei kaniw rui kakhou, “Mi alauc nunc hei rui sa bammei hei nang chu daih?” twna sa the. Khoutei Jisu rui kaniw khou, “Ai chu e, ‘Ngasatna nunc khatni puanc nouc bammei nunc mwang khou rui nang rui nthuihna tithuanc pat the,’ twna hyloumei tei nangniw pah mak he nah cho?” twna Jisu rui daw the.

17 Kumna kaniw ta ganclouna, Jisu kaidai paengc thangc patna Bethani khou pat ziplou the.

**Jisu rui Tadut Bang ta Siangloumei** (*Mark 11.12-14, 20-24*)

18 Jisu kaidai thangc tei ngangh thuan dat khou kamei ndaapc the.

19 Chaeng daeng khou tadut bang akhat how lana hei tei guang zauc pwkhon kanuy nsyn bam khwan the. Khoutei, “Nang thai nthai dat zat mak kan di tho,” twna Jisu rui salou the. Mi dyng khon tei mi tadut bang tei ngguaih key kan the.

20 Hei tei how lana ziap nunc tei ngak- na, “Mi tadut bang hei akumhna kadyng khon ngguaih bam tu cho,” twna sa the.

21 “Ai rui nangniw khon kaling siakna sa tuang e: nangniw lwm e thei khatni lwmsi zat mak ge thei, ai rui tadut bang khon swlou kanmei hei nangniw ni taanc ngam puni de. Mi na hei hamh e, nangniw rui mi chyangbut ti hei, ‘nang thauna duipui thangc gut kan o,’ twna sa ti thei gut kan ni de.

22 Nangniw lwm ti thei nangniw huayney khon tabui pw ni neymer tei nangniw laatow puni.”

**Jisu Ngamv lam khon Thanvmer** (*Mark 11.27-33; Luk 20.1-8*)

23 Jisu Ravkai khon guang datna nchamlouna bam khon, amuh daihmer nunc khatni kaniw tuang gaanvthaih nunc kadaeng khon guangna, “Tabui ngamv khon rui nang mi guay hei taanc bam tu cho khatni thow rui nang khon mi ngamv hei tiilou pwna cho?” twna thanv the.

24 Mundawna Jisu rui kaniw khon sa the, “Ai ni nangniw khon lat akhat thanv puni. Hei tei nangniw daw e thei, tabui ngamv khon rui mi guay hei ai taanc bam tu cho twmer ai ni nangniw khon sa puni:

25 Jahon khon duilupmer ngamv tei thow rui tiilou tu cho? Ravguangc rui ny maansei rui cho?” Kaniw rana kaphianhna sa the, “Ravguangc rui e twna sa ti thei, ‘kum e thei nangniw tabui swna kata lwm mak tu cho?’ twna kamei rui sa puni.

26 ‘Maansei rui de,’ twna sa khang ni meic nunc ta ping e; kalam thu meic guay rui thu kata muhzwng e twna laa bam di the.”

27 Kumna, “Aniw thay mak ge,” twna kaniw daw the. “Mi guay hei tabui ngamv khon rui ai taanc bam tu cho twmer ai ni nangniw khon salou lak ge,” twna Jisu rui kaniw khon mundaw the.

**Alauc Gaanv Nei Latgiam**

28 “Nangniw akumhna ning bo? Gaanv khat pu nac alauc gaanv nei nai khwan e. Gaanvthaihmeipu daeng khou guangna, ‘Abung, nang aseic drakha lau tat ro,’ twna sa the.

29 ‘Apu, ai tat zih e,’ twna kamei daw the, tiki kamei katangv thange lunglun laic datna tat dat kan the.

30 Alaucmeipu daeng khou tei ni guangna hei tei kumcna sa muay the. Khoutei, ‘Ai tat puni’ twna kamei daw the, tiki tat mak khe.

31 Mi nei khou tei thow rui kapu rui ningmei taanc kan tu cho?” “Reymeipu tei e,” twna kaniw rui daw the. Jisu rui kaniw khou sa the, “Ai rui nangniw khou kaling siakna sa tuang e: dihhkhav kakhamei nunc khatni mangsangmeiluc nunc rui Ravguangc guangc dic khou nangniw khang suangc gut hu bam the.

32 Kalam thu Duiluploumei Jahon tei nangniw khou guangna nchumhmei chaeng dincloou tisini nangniw thu kata lwm kan mak ge; tiki dihhkhav kakhamei nunc khatni mangsangmeiluc nunc thu kata lwm kan the. Nangniw hei tei how khou nganvna lunglun laic datna kata lwm kan mak ge.

**Drakha Lau Saanvmei Latgiam** (*Mark 12.1-12.Luk 20.9-19*)

33 “Latgiam baihmei akhat nking dat ro. Laupouc gaanv khat rui drakha lau akhat taancloou lana hei tei karaengv raenglou the, drakha dui sunhmei bamv kasiamhlou the, lauphaan kai kasiamhlou the, kumna hei tei lau nngemei nunc khang saanvlou ducna tat kan the.

34 Drakha thai reipui ganv guang pwkhou, kathai laa khang kabangc nunc ta lau nngemei nunc khou tei ndiu guang the.

35 Khoutei lau nngemei nunc tei rui kabangc nunc ta tei nymna gaanv khat ta bai the, gaanv khat ta swluai the, gaanv khat ta ntauw kwam the.

36 Kamei rui reymeimei kang khang tei suangc geihmei kabangc kang akhat ndiu guang dat di he. Khoutei lau nngemei nunc tei rui kaniw ta ni hei tei kumcna swlou dat muay the.

37 ‘Kaniw anac ta thu chakhwang swlou puni muay di the,’ twna ningna nkhamh khou kanac mpouh ta ndiu guang the.

38 Tiki kaniw rui kanac mpouh ta tei how pwkhou kaniw rana sa the, ‘mi hei tampy laa nimeipu the, guang tho, kata swluaina aniu katuang dam tei laa di kho.’

39 Kumna kaniw rui kata nymna drakha lau paengc thangc siauc gancna swluai the.

40 “Kumna drakha lau kaipouc tei guang pwkhou tabui tuang sw puni tha?”

41 Kaniw rui kakhau sa the, “Kamei rui meicsimeis nunc ta tei swluai kasic karouclou puni, kumna drakha lau tei kathai reipui ganv kathuic kathai laaguang bam punimeis baihmeis nunc khou tiilou dat kan puni.

42 ‘Kai swmeis nunc rui ganc patloumeis tauc tei, kaikwnpy tauc sw kan puni. Mi hei Poubauhmeis rui swloumeis tuang e, Mi hei aniw mikzaw khou charyn tuang e,’ twna hyloumeis tei nangniw pah mak he nah cho?

43 “Hei zaeng rui ai rui nangniw khou sameis tuang e: Ravguangc guangcdic tei nangniw khou rui laa dat lana kathai nthai nimeis zaat akhat khang tii kan puni.

44 “(Mi tauc ruc khou bow keypui meis tei puat paruat puni, khatni mi tauc hei rui karuc khou key simpui meis tei mbut mbaih puni.)”

45 Amuh daihmeis nunc khatni Pharisimeis nunc rui Jisu tuang latgiam guay hei chu la khou kaniw lam khou sa bam tuang e twmeis kaniw thay the.

46 Kumna kata nym khang kaniw sw the, tiki meic nunc rui kata muhzwng akhat re twna laa bam tipui zaeng rui meic nunc ta tei kaniw ping the.

## **Nowsuanh Ngai Latgiam**

### **Matthiu 22**

1 Khoutei mundawna Jisu rui latgiam swna kaniw khou sa dat re,

2 “Tingkauh guangcdic hei guangh akhat rui kanac now suanhpui ngai raengc patmeis kumhmeis tuang e.

3 Ngay khang tei kabailoumeis guay ta tei kaw khang kameis rui kabangc nunc ta ndiu pat the, tiki kaniw guang nii mak khe.

4 Kamei rui kabangc gaanvsaekc ta ndiu pat datna, ‘kameigaymei guaichic nunc downa ngay taektw chamdaanv luailou the, ramh kaguayna chamdaanv luai the, guang tho, twna kabailoumei guay khou tei tatna sa tho’ twna kamei rui sa the.

5 Tiki hei tei thouhswlou makna kaniw tat ngam kan the: gaanv khat rui kalau thangc tat kan the, baihmei rui katuang lanvguanhpui bamv thangc tat kan the,

6 baihmei gaanvsaekc tei rui kabangc nunc ta tei nymna sw changamclouna swluai the.

7 Khoutei guang tei kalung puamc the, kumna katuang ricmei nunc ta ndiu patna mi meicdowmei nunc ta tei swluai the, khatni kaniw tuang kaidai tei mailou the.

8 “Khoutei kamei rui kabangc nunc khou tei sa the, ‘Nowsuanh ngai thu chamdaanv luai the, tiki kabailoumei nunc tei thu guang khang biuh mak khe.

9 Hei zaeng rui nangniw chaeng khaek dai khou pat lana meic ariwmei guay ta nngay khang tei kabai tho’.

10 Kumna mi bangc guay tei chaengdai khou pat lana, meic si meicgay kapah makna, ariw riwmei ta khuam guangna newsuanh kai tei maansei rui padik the.

11 “Khoutei guangh tei gutna, guang bammei guay ta tei zauc pwkhou newsuanh pwan piu makmei gaanv khat ta how the.

12 Khoutei ‘Champanv, newsuanh pwan piu makna akumhna nang mi khou hei gut bam tu cho?’ twna guangh tei rui kakhou sa the. Khoutei kamei ramh lat sa mak khe.

13 Khoutei, ‘Kati hei kaphay kabaanc karakcna kapaengc thangc zinghmei khou ganc pat kan o,’ twna guangh tei rui siamruaimei nunc khou tei sa the. Mi khou tei kamei huh khaic ndyang kariak riakna puihuayna bam puni.

14 “Kalam thu meic mpeyna ta kaw e, tiki meic katitna ta kapah e.”

**Dihkhav Tiimeilam khou Thanvmei** (*Mark 12.13-17; Luk 20.20-26*)

15 Khoutei Pharisimeilam nunc tei tat pat lana Jisu ta kalat khou timanh khang kaphianh the.

16 Kumna kaniw rui kaniw tuang ziap nunc lev Herodmei nunc ta ndiulou tina kaniw rui Jisu khou sa the, “Dinhpouc, nang hei lading sameipu e twmei aniw thay e. Nang thu maansei ta rouh tuang maekna Ravguangc ningmei kaling dinhmeipu e; kalam thu nang thu maansei ta zawkhu zawru zauh mak ge.

17 Hei zaeng rui Kaisar khang dihhav tiimeis hei Riakdanv thei layna nchumh ni nchumh mak cho? Nang ningmei aniw khou dincloou o.”

18 Kaniw tuang simeis raeng tei thay lana Jisu rui kaniw khou sa the, “Gaylwn swmeithiu, tabui swna nangniw ata nchanv bam tu cho?

19 Dihkhav tii nimeis syan kiu akhou lyan o.” Khoutei kaniw rui denari akhat Jisu khou laanguang the.

20 Khoutei, “Mi hei thow maengc cho, khatni hyloumeis hei tabui lat cho?” twna Jisu rui kaniw khou thanv the.

21 “Kaisar tuang,” twna kaniw rui daw the. Khoutei Jisu rui kaniw khou sa the, “Kum e thei Kaisar tuang tei Kaisar khang tii tio, Ravguangc tuang tei Ravguangc khang tii tio.”

22 Hei tei chu lana kaniw mav maek khe, kumna kakhou rui tat pat kan the.

**Theihmeis khou rui Ringcthaumeis lam khou Thanvmeis** (*Mark 12.18-27; Luk 20.27-40*)

23 Mi nungc tei, theihmeis ringcthau dat mak ge twna sameis Saddukimeis nunc Jisu daeng khou guangna kakhou thanvna,

24 sa the, “Dinhpouc, ‘thowkumhmeis gaanv khat rui kanac maekna theic kan e thei, kakainac rui kachaic now ta kakhauhna kachaic kiksa tinailou nina e,’ twna Mousi rui salou e.

25 Chana gaanv chaneis aniw pang khou lungclou khwan e. Gaanvdaihmeipu tei kanow kaw the, tiki kanac maekna kanow tei kakainac khang ganclou ducna theic kan the.

26 Kaneimeis, kathumhmeis tei ni hei tei kumc muayna chaneimeipu khou tei nganvna key tangc the.

27 Nkhamh khou ntumei tei ni theic the.

28 Kum e thei, ringcthau dat khou kiu mi pui tei kakai chana gaanv chanei khou tei thow now sw puni cho? Kaniw meic guayna kata kaw ntangh the.”

29 Mundawna Jisu rui kaniw khou sa the, “Hylou bammei ta tei khatni Ravguangc ngamv ta thay makpui zaeng rui nangniw nkhuai the.

30 Theihmei khou rui ringcthau dat khou thu nowkaw mihmei nai dat mak khe, kaniw tingkauh baanchara nunc kumc kan ni the.

31 Theihmei rui ringcthau datmei lam khou thu, Ravguangc rui nangniw khou samei tei pac zat mak he nah cho? Ravguangc rui sa e,

32 ‘Ai hei Abraham Racguangc, Isak Racguangc khatni Jakob Racguangc e.’ “Kamei hei theihmei nunc Racguangc hamh e, ringc bammei nunc Racguangc de.”

33 Hei tei chu la khou meic nunc tei kamei rui nchamloumei khou tei ngak the.

**Daihmei Latdanv** (*Mark 12.28-34; Luk 10.25-28*)

34 Jisu rui Saddukimei mwan daw thimlou kan the twmei Pharisimei nunc tei chu lana kaniw guang kaduai the.

35 Khoutei kaniw pang khou Riakdanv dinhpouc gaanv khat rui kata nchanvna,

36 “Dinhpouc, Riakdanv khou tabui tei daic liangmei latdanv cho?” twna thanv khwan e.

37 Khoutei Jisu rui kakhou sa the, “Nang Racguangc Poubauhmei ta nang lung kapwm rui, nang tuang ringcpaan kapwm rui khatni nang lungning kapwm rui nzian nina e,’

38 twmei hei daic liangmei khatni nthuk liangmei latdanv the.

39 Kaneimei daic liangmei latdanv kiu thu: ‘Nang kai kaining kaigeimei ta nang pumc kahak ta kumcna nzian nina e,’ twmei hei e.

40 Riakdanv khatni muhzwng nunc tuang latdyn kapwm kiu mi khou hei nai the.”

**Khrista lam khou Thanvmei** (*Mark 12.35-37; Luk 20.41-44*)

41 Pharisimei guay tei guang kariu pwkhou, Jisu rui kaniw khou thanvna,

42 “Khrista lam khou nangniw akumhna ning tu cho? Kamei thow nac cho?” twna sa the. Khoutei, “David Nac Mpouh e,” twna kaniw rui daw the.

43 Kamei rui kaniw khou sa the, “Kum e thei David rui akumhna Bumaengh paan rui kata ‘Poubauhmei’ twna kaw tu cho? David rui sa e,

44 ‘Ringhpouc rui apoubauhmei khou sa e, Nang ta zauczihmei guay ta, ai rui nang phaypav bangc khou lou mak saanv, a baanzat khou dungc bam o.’

45 “Hei zaeng rui, David rui kata ‘Poubauhmei’ twna kaw e thei, akumhna kamei kanac nina cho?”

46 Khoutei meic gaanv khat na sini lat akhat na sini daw dat ngam mak khe khatni mi nungc tei rui thauna meic gaanv khat na sini lat thanv dat bauh mak khe.

**Riakdanv Dinhpouc nunc khatni Pharisimei nunc khou rui Suriak Thay o**  
(*Mark 12.38-39; Luk 11.43, 46; 20.45-46*)

## **Matthiu 23**

1 Khoutei Jisu rui meic kangdai khatni kaziap nunc khou sa the,

2 “Riakdanv dinhpouc nunc khatni Pharisimei nunc hei Mousi bamv khou dughmei nunc e.

3 Hei zaeng rui kaniw rui samei guay tei taanc o khatni ngaek go, tiki kaniw rui taanhmei tei thu lay taanh riu. Kalam thu kaniw hei sa e tiki taanh mak ge.

4 Kaniw hei rui puat nritmei bang lana meic nunc bou khou tipuanclou e, tiki kaniw baanc zung na rui sini hei tei kapuang nkhaulou nii mak ge.



5 Kaniw rui sw bammei guay hei meic nunc how khang na sw bam tuang de. Kaniw sanpiang khatni kaniw baanc pwam khou kamclou bammei phulaktari ramdai tei khatni kaniw tuang pheychuanh phaam ramsaeng tei!

6 Kaniw hei khumngai bamv khou chakhwang bamv khou khatni sinagog khou bamvdaih khou dungc nii e.

7 Kaithyan bamv bamv khou chakhwang sw lyanloumei ta khatni meic nunc rui 'Rabbi' twna kawloumei ta kaniw kahaw e.

8 Nangniw ta thu 'Rabbi' twna tikaw riu. Kalam thu nangniw tuang kaipouc akhat nai e, nangniw thu chana nunc de.

9 Kandih maansei gaanv khat na ta sini 'Pu' twmei zancphuakh hei kaw riu, kalam thu tingkauh thangc bammei nangniw 'Pu' akhat na nai e.

10 Nangniw ta 'Zayloumeipu' twna ni tikaw riu, kalam thu nangniw ta Zayloumeipu akhat na naimei kiu Khrista hei e.

11 Nangniw pang khou daic liangmei kamei tei nangniw tuang siamruaime sw nina e.

12 Karana kata tidaihpui mei ta tiliw keylou puni, khatni niamhpui mei ta tidaiclou puni.

**Kaniw tuang Gaylwn Swmei ta Nuh Makmei** (*Mark 12.40; Luk 11.39-42,44,52; 20.47*)

13 "Gaylwn swmei Riakdanv dinhpouc nunc khatni Pharisime nunc, nangniw sansi e dav! Kalam thu nangniw rui meic nunc gut mak khang tingkauh guangcdic kaikhamv mbangh the. Nangniw ni gut mak khe, gut nime nunc ta ni nangniw rui thingc the.

14 (Gaylwn swmei Riakdanv dinhpouc nunc khatni Pharisime nunc, nangniw sansi e dav! Nangniw rui maypui nunc tuang asut tu e, kumna nangniw tuang ravsuai saenghpui lwn sw e. Mi rui nangniw khuay daic the.)

15 "Gaylwnswmei Riakdanv dinhpouc nunc khatni Pharisime nunc, nangniw sansi e dav! Kalam thu meic gaanv khat ta Jihudime tiguahlou khang nangniw duipui ramkiang ruan likna tat the, kumna kamei Jihudime sw pwkhou

nangniw rui kata nangniw maikwam key guay khou key liang kanei biuhmei nac tiswlou the.

16 “Mik tiatmei chaengzaymeithiu, nangniw sansi e dav! ‘Ravkai ta zay saancna latryan swmei tei thu ramhkhat sini hamh e, tiki ravkai tuang kachaekc ta zay saancna sw kanmei tei thu kuak dat mak khe,’ twna nangniw rui sa e.

17 Mpangmei mik tiatmeithiu, kachaekc tei nthuk ni, kachaekc ta tei nthanmei tiswloumei ravkai tei nthuk cho?

18 ‘Ravchabamv tei zay saancna latryan swmei tei thu ramhkhat sini hamh e, tiki mi khou tei katloumei ravcha ta tei zay saancna swlou kanmei tei thu kuak dat mak khe,’ twna ni nangniw rui sa dat re.

19 Mik tiatmeithiu, puatkat tei nthuk ni puatkat ta tei nthanmei tiswloumei ravchabamv tei nthuk cho?

20 Hei zaeng rui, ravchabamv ta zay saancna latryan swmei hei ravchabamv ta ni ravcha ta ni zay saancna swmei tuang di the.

21 Ravkai ta zay saancna latryan swmei hei ravkai khatni mi khou tei bammeipu ta zay saancna swmei tuang di the;

22 khatni tingkauh ta zay saancna latryan swmei tei Ravguangc tuang guangh bamvpaeng khatni mi khou tei dungc bammeipu ta zay saancna swmei tuang di the.

23 “Gaylwn swmei Riakdanv dinhpouc nunc khatni Pharisimei nunc, nangniw sansi e dav! Nangniw rui riangtu, maki-khuamc, khatni backhuanh tuang kadam ruh khou akhat tii lana Riakdanv tuang nthuk dianghmei nchumhmei, zauzian thaymei khatni lwm nuhmei ta ntaamvlou the! Kadam ruh tuang tiimeit tei ni ntaamv makna mi guay hei nangniw piu ni tuang e.

24 Mik tiatmei chaengzaymeithiu, simangna ta sini singe gancna zangv lana guaikuan zangv binmei thiui!

25 “Gaylwn swmei Riakdanv dinhpouc nunc khatni Pharisimei nunc, nangniw sansi e dav! Nangniw tuang buangc khatni nkuakc guay tei kapaengc thu nthanna kalungc khou tei thu asut guangmei khatni agaamvna laa guangmei tuang rui padik ge.

26 Mik tiatmei Pharisimei! Buangh lungc tei sw nthan rey o; kum e thei, kapaengc tei ni nthan puni.

27 "Riakdanv dinhpouc nunc khatni Pharisimei nunc, gaylwn swmeithiu, nangniw hei sansi e dav! Nangniw hei thut mphwanloumei tarou kumhmei e. Hei tei mpaeng khou thu how gay e, tiki kalungc khou thu meic rou khatni rumh rianghmei rui padik ge.

28 Hei tei kumcna, kapaengc khou thu nangniw hei meic kathuic khou ravchap tatmei kumc dyng the; tiki kalungc khou thu nangniw hei saraamhmei khatni nkhuamei rui padik ge.

**Kaniw tuang Dandi lam Sa Kasuakcmei** (*Luk 11.47-51*)

29 "Riakdanv dinhpouc nunc khatni Pharisimei nunc, gaylwn swmei thiu, nangniw hei sansi e dav! Nangniw rui muhzwng nunc tarou kasiamh e, kumna ravchap tatna lungcloumei nunc ta ningtowpui kai guay tei kapwan swlou e.

30 Kumna nangniw rui, 'Rey nungc aniw pupouc nunc hak khou tei aniw lung tu khwan e thei, aniw rui kaniw taanc kanmei tei khatni muhzwng guay ta swluai kanmei tei taanc lak ni tuang e,' twna sa e.

31 Kumna nangniw hei muhzwng nunc ta dowluaimei nunc kikta e twmei nangniw rue khou nangniw kahak rui sakhi e.

32 Taanc key tho, kumna nangniw pupouc nunc rui taanc thaulou kanmei tei taanc suak key tho!

33 Nruithiu khatni nrui nacthiu! Maikwam gut nime khou rui duak khang tu kumhna nangniw ning lana cho?

34 Hei zaeng rui ai nangniw khou sa tuang e: ai rui nangniw khou muhzwng nunc ta, ningtyngmei nunc ta khatni Riakdanv dinhpouc nunc ta ndiu guang puni. Nangniw rui kaniw gaanvsaekc ta swluai puni, gaanvsaekc ta kros khou hian bin puni, gaanvsaekc ta nangniw tuang sinagog khou kathamv kasiclou puni. Kaniw ta rai kasic khang kaidai akhat khou rui akhat khou nthau tat puni.

35 Mi thai kiu, ravchaptatmei Abel ta dowluaime khou rui thauna nangniw rui Ravkai tuang Nthanmei Bamv lev ravchapaeng kak khou Barakia nac mpouh

Zekaria ta dowluai kanmei nganvna, ravchaptatmei kapwmna ta dowluai kanmei ze tei nangniw rue khou keylou puni.

36 Ai rui kaling siakna nangniw khou sa tuang e: mi lam kapwmna hei mi meikin ruc khou hei keylou puni!

### **Jisu Jerusalem ta Nzianmei** (*Luk 13.34-35*)

37 “He Jerusalem, Jerusalem! Nang rui muhzwng guay ta swluai e khatni Ravguangc rui nang khou ndiu guangmei latdiu tatmei guay ta ntauw kwamluai e! Nruay kui rui kaswkaeng bangc khou kanac nunc ta gungcloumei kumcna, abaanc pwam rui nang mei kapwmna ta pamclou nii e, tiki nang rui ata nuhlou mak khe!

38 Zauclo, nang kai ta ganclou the, kumna kairaeng ganclou puni the.

39 Ai rui nangniw khou kadylou mei tuang e: ‘Poubauhmei zanc khou guangmeipu kamei hei sangaymei e,’ twna nangniw rui sa mak saanv ntaw khou rui thauna nangniw ata how dal ni tu hamh the.”

### **Ravkai Swmaan Nime lam khou Dincloumei** (*Mark 13.1-2; Luk 21.5-6*)

#### **Matthiu 24**

1 Jisu Ravkai mpatlouna tat pat pwkhou kaziap nunc kadaeng khou guangna Ravkai tuang kai guay tei kata tiphaengc khwan e.

2 Khoutei Jisu rui kaniw khou sa the, “Mi kai guay hei nangniw how bo? Ai rui nangniw khou kaling siakna sa tuang e: mi khou hei ntauw akhat rue khou ntauw akhat nsaplou bam dat ni tu hamh the; pangv key makmei nai dat ni tu hamh the.”

### **Ryanramei khatni Rairiumei** (*Mark 13.3-13; Luk 21.7-19*)

3 Jisu Laengki Chyng khou dungc bam khou, kaziap nunc kadaeng khou kaniw rana guangna sa the, “Mi guay kiu tabui ganv khou pat puni cho? Khatni nang guang puni the khatni zuk luai puni the twmei thay nuhmei tuang tabui tuang pat puni cho? Aniw khou dinclou o.”

4 Khoutei mundawna Jisu rui kaniw khou sa the, “Nangniw ta meic gaanv khat na rui sini zay mbiangh mak khang suriak thay o.

5 Kalam thu, ‘Ai Khrista the’ twna meic mpeyna azanc khou guang puni, kumna meic mpeyna ta zay mbiangh puni.

6 Nangniw rih khwan khatni rih chamv chu puni; tiki nangniw ping riu. Mi kumhmei guay hei pat puni, tiki hei tei luai nimei hamh e.

7 Kalam thu zaatc khat rui zaatc khat ta khatni guanghdic khat rui guanghdic khat ta rih sw puni, nap nkowmei guang puni khatni kabamv kathuic khou baengla zay puni.

8 Tiki mi guay hei narui kahouhmei di he.

9 “Mi ganv khou kiu nangniw ta nymna rai khang tii pat puni, kumna swluai puni. Azaeng khou rui nangniw ta zaatc guayna rui karaeng puni.

10 Mi khou kiu meic mpeyna athei lay taan puni, kaniw khat khat ta tinym kary puni, kumna khat khat ta karaeng puni.

11 Mi khou kiu kaling hamhmei muhzwng mpeyna pat puni, kumna meic mpeyna ta zay mbiangh puni.

12 Mi kumna simei hei mbu thau tina meic mpeyna nzianmei nchu key puni.

13 Tiki katwan nganvna akhaengvpui mei ta tei kanlou puni.

14 Zaatc guayna thay lik khang mi guanghdic tuang gaychamv hei kandih kapwm khou dinc lik puni. Mi tangv thu zuk luaimei kiu guang puni the.

**Ravchabamv Sw Mphuammei tuang Meic Ping Karaengmei** (*Mark 13.14-23; Luk 21.20-24*)

15 “Muhzwng Daniel rui saloumei ‘sw kamut kamaimei tuang sw mphuammei puat tei nthanmei bamv khou ding bammei ta nangniw how puni. (Pahpui mei tei rui kabah thay kan diu.)

16 Mi khou kiu Judia khou bammei rui chying thangc pak tat tho.

17 Kainam khou bammei rui kainung khou naimei puat laa khang key dat ri tho.

18 Laupuk khou bammei rui pheyy laa khang hanc guang dat ri tho.

19 Mi ganv khou kiu kapumc nritmei pui nunc khatni nah puanc nouc bammei pui nunc tei sansi e dav.

20 Tingsei khou hamh e thei Sabbathneic pak mak khang huayney o.

21 Mi khou kiu mbaanv nai thau rap khou rui pat zat kan makmei, pat ni pat dat lakmei ryanramei ariw puni.

22 Mi ganv dak tei tiduilou mak khwan e thei, meic gaanv khat na sini ringc pat ni tu hamh e; tiki kapahioumei nunc khang rui mi ganv dak tei tiduilou puni.

23 “Mi ganv khou kiu ‘Zauclo, mi khou hei Khrista bam the,’ hamh e thei ‘mi thangc tei bam the,’ twna thowkumhmei rui sa pwsini lwm riu.

24 Kalam thu guatmei Khrista nunc khatni guatmei muczwng nunc pat puni. Nuh e thei kapahioumei nunc ta nganvna zay mbiangh khang sw-nchinmei khatni charynmei taanv daih mpeyna taanc puni.

25 Chu la tho, mi hei ai rui nangniw khou sa kasuakcloumei tuang e.

26 “Kamei tazikramv khou bam the’ twna meic nunc rui sa pwsini nangniw tat riu; ‘Kamei kainung khou bam e’ twna sa pwsini lwm riu.

27 Kalam thu, Meic Nac Mpouh guang nimei hei neihpat thangc tingpalik tina neihkey thangc gaanc tanghmei tei kumc puni de.

28 Charumc naimei bamv khou tei moucphou guang kaduai puni de.

**Meic Nac Mpouh Guangmei** (*Mark 13.24-27; Luk 21.25-28*)

29 “Mi ryanramei tingmik guay tei luai rappui lev neihmik tizingc puni, bw gaanc dat lak khe, gaanchuangcna guay tingkauh thangc rui taek key puni, khatni tingpuk tuang ngamv guay ta kanuk puni.

30 Mi tangv Meic Nac Mpouh guang nimei tuang kiu tingpuk khou lyan pat puni. Mi khou kiu kandihmei zaatc guayna ngaengv kazwmna kap puni khatni Meic

Nac Mpouh tei ngamv phungcna hymdaicna muangh khou tuangcna keymei ta kaniw how puni.

31 Kauh baanchara akhat rui bianggun daihmei muanna kamei rui katuang baanchara nunc ta kandih kwn padeih khou ndiulou puni. Kumna kamei rui kapahioumei nunc ta kaniw rui kandih kapwm khou rui khuam kariu puni.

**Tadut Bang khou rui Thay khang** (*Mark 13.28-31; Luk 21.29-33*)

32 “Tadut bang khou rui nangniw latgiam akhat thay o. Hei tei kazik kasatna kanuy thanh pat dat re thei laylum ana the twmei nangniw thay e.

33 Hei tei kumcna mi guay hei nangniw how pwkhou kamei kaimun daeng khou na bam the twmei nangniw thay o.

34 Ai rui nangniw khou kaling siakna sa tuang e: Mi guay hei pat mak saanv mi meikin hei maan ni tu hamh e.

35 Tingpuk kandih thu maan puni, tiki atuang lat thu maan dat ni tu hamh the.

**Gaanv Khat na Sini Rating Kaneic tei Thay Mak ge** (*Mark 13.32-37; Luk 17.26-30, 34-36*)

36 “Tiki mi tingmik khatni khuangh ganv tei thu gaanv khat na sini thay mak ge, Pu na tei hamhna tingkauh baanchara guay ni, Nah Mpouh<sup>1</sup> hei ni thay mak ge.

37 Meic Nac Mpouh guang nimei hei Nouha hak khou pat kanmei tei kumc puni e.

38 Mi ganv khou tei dui daih makmei hu khou, Nouha hy lungc khou gut kan mak saanv, meic nunc tei tuna zangvna, nowkawna, micna lungc bam khwan e.

39 Dui daic guangna kaniw ta nzuan ganh mak saanv, tabui pat puni cho twmei kaniw thay mak khwan e. Meic Nac Mpouh guang khou ni hei tei kumc puni.

40 Mi khou kiu laupuk khou gaanv nei bammei khou gaanv khat ta laa tat puni, gaanv khat ta ganclou duc puni;

41 gaanv nei nap riakpaan riak bam khou gaanv khat ta laa tat kan puni, gaanv khat ta ganclou duc puni.

42 Hei zaeng rui nangniw nkhwan bam o, kalam thu nangniw tuang Kaipouc tabui nungc guang puni cho nangniw thay mak ge.

43 Zingbangc akumhmei ganv khou kaihouhmei guang puni cho twmei kai kaipouc tei rui thay khwan e thei, kamei zip makna nkhwana kakai tibi lak ni tuang e twmei nangniw thay e.

44 Hei zaeng rui nangniw ni chamdaanv bam o. Kalam thu Meic Nac Mpouh tei nangniw ning makmei ganv khou guang puni

**Lwm Nuhmei khatni Lwm Nuh Makmei** (*Luk 12.41-48*)

45 “Kakai tuang bangc guay khang kaganv chana titu tizangv bam khang thouh nsinloumei bangc khou thow tei lwm nuhmei khatni ningtyngmei cho?

46 Kakaipouc tei guang datpui ganv khou kathouc taanc bammei bangc tei sangaymei e.

47 Ai rui nangniw khou kaling siakna sa tuang e: Kaipouc tei rui katuang naime kapwm kakhou nsinlou puni.

48 Tiki meicsime bangc tei rui ‘akaipouc guang riu ni tu hamh e’ twna ningna,

49 kapammei bangh guay ta baina, zouh mbamei nunc lev tuna zangvna bam khou,

50 kamei ning makmei nungc, kamei thay makmei ganv khou kakaipouc tei guang nangc e thei,

51 kata dan puat paruatlou puni khatni gaylwn swmei nunc lev nchamcna dandi mphang puni. Mi khou tei kapna kahuc nkay ndyang kariak riak bam puni.”

**Tuna Gaanv Ruh Latgiam**



## Matthiu 25

1 “Mi khou kiu tingkauh guangcdic kiu, tunac gaanv ruh kaniw tuang thauh mairam sinna nowpouc ta riu khang patmei kumc puni.

2 Kaniw pang khou gaanv panguh rui mpangmei e, gaanv panguh rui ningtyngmei e.

3 Mpangmei nunc tei thauh mairam thu sin the tiki thauh phungh mak khe.

4 Tiki ningtyngmei nunc tei thu kaniw tuang thauh mairam khang tei thauh haan khou thauh sin tat the.

5 Nowpouc tei guang nyan tina kaniw guay tanguih the, kumna zipri tat kan the.

6 “Mi khou kiu zipchwng ganv khou ‘Nowpouc guang the! Pat riw tho!’ twna kauc the.

7 Khoutei tunac guay tei zipthau lana kaniw tuang mairam ntou the.

8 Khoutei mpangmei nunc tei rui, ‘Nangniw tuang thauc aniw khang ni tiilou na ro, aniw tuang mairam amit puni the,’ twna ningtyngmei nunc khou tei sa the.

9 Tiki, ‘Tii mak khe. Aniu meic guayna khang thu biuh mak ge. Zuanhmei bamv thangc nangniw khang liu tat tho,’ twna ningtyngmei nunc tei rui sa the.

10 Kaniw liu khang tat kan khou rui nowpouc tei guang the, kumna chamdaanvmei nunc tei nowpouc thei nowsuanh ngai bamv khou tei gut kan the; kumna kaikhamv mbangh kan the.

11 “Katang thangc baihmei tunac gaanv panguh tei guangna, ‘Kaipouc, kaipouc, aniw khang kaikhamv laanclou o,’ twna sa the.

12 Khoutei, ‘Ai nangniw ta khat sini thay mak ge,’ twna kamei rui mundawna sa the.

13 “Hei zaeng rui nangniw nkhwanha bam o, kalam thu nangniw katingmik khatni kaganv tei thay mak ge.

**Bangh Gaanv Thumh Latgiam** (*Luk 19.11-27*)

14 “Mi hei kumc puni, twmei thu, gaanv khatpu rui kamei nggin tat kan ni khou kabangc nunc ta kaw guangna katuang lanv kaniw khou nsinlou the.

15 Kamei rui gaanv khat khou talent panguh, gaanv khat khou kanei, khatni baihmei gaanv khat khou akhat twna kamei kamei rui ngam nime thei layna tiilou lana kakai khou rui tat kan the.

16 Talent panguh laameipu tei kaluak kalat lanvguanh tat lana talent panguh tuangc guang the.

17 Hei tei kumc muayna talent kanei laameipu tei ni kanei tuangc muay the.

18 Tiki talent akhat laameipu tei thu tat pat lana kakaipouc tuang syan tei chau phuplou the.

19 “Kaganv tingsaengc sihmei tangv, mi bangc nunc kaipou tei guang datna kaniw khou tiilou kanmei syanchakh tei chak the.

20 Khoutei talent panguh laamei bangc tei talent ruh phungc guangna, ‘Kaipouc, nang rui akhou talent panguh tiilou the, ai rui guanh tuangc patmei panguh lou nkuanna laa guangmei tuang the,’ twna sa the.

21 Khoutei kakaipouc tei rui kakhou sa the, ‘Taanc chuy the, gaymei khatni lwmnuhmei bangc. Katitna nsinloumei khou lwm nuhmei taanv taanclou the. Nang khou mpeyna nsinlou puni the. Nang kaipouc tuang neihlamei bamv khou gut tho.”

22 Talent kanei laameipu tei ni guangna, ‘Kaipouc, nang rui akhou talent kanei tiilou e, ai talent kanei guanh tuangc patna phungc guangmei tuang e,’ twna sa the.

23 Kaipouc rui kakhou sa the, ‘Taanc chuy the, gaymei khatni lwmnuhmei bangc. Katitna nsinloumei khou lwmnuhmei taanv taanclou the. Nang khou mpeyna nsinlou puni the. Nang kaipouc tuang neihlamei bamv khou gut tho.’

24 Talent akhat laameipu tei ni guangna, ‘Kaipouc, nang hei thu nang rui lingclou makmei thai reimei, nang rui phuncclou makmei lau taymei, meic ta nzian thay makmei mei e twmei ai thay e.

25 Kumna ai ping thena, nang tuang syan tei kandih khou chau phuplou tuang the. Zauclo, mi hei nang tuang tei the.'

26 Khoutei kaipouc tei rui kakhou sa the, 'Simei khatni aliauhmei bangc, ai hei ai rui lingclou makmei thai reimeipu khatni ai rui phuncloou makmei lau taymeipu e twmei nang thay la bu dyng the.

27 Kum e thei, nang rui mi syan tei syanthuay khang tiilou e thei, ai guang dat khou kathuay kazauhna laa dat ni tuang e.'

28 Hei zaeng rui, talent akhat tei kakhou rui laa lana talent ruh naimeipu khang tei tii tio.

29 Kalam thu, naipui mei khang tei tiilou nkuan puni, kumna kakhang mbu nlaina nai puni, tiki maekpui mei khou tei rui kakhou katitna naimei tei sini laa tat kan puni.

30 Mi gaeng makmei bangc ti hei nymna kapaengc zinghmei khou phaic pat the. Khoutei puihuayna huh nkay ndyang kariak riak bam puni.

### **Nkhamhmei Latzan**

31 "Meic Nac Mpouh tei kauh baanchara guay ta nduanghna kahym daicna guang pwkhou, kamei katuang hymdaihmei guangc bamvpaeng khou dungc puni.

32 Kumna zaatc guayna ta kahu khou khuam guang kaduai puni. Mi khou kiu lauziu gaenghmeipu rui kalauziu ta zihuh pang khou rui gaengc langc patmei kumcna kaniw ta tei kakang kanei khang khak langc pat puni.

33 Mi khou kiu lauziu ta katuang baanzat thangc, khatni zihuh ta katuang baandaw thangc lou puni.

34 Mi khou kiu, guangh tei rui katuang baanzat thangc bammei nunc khou tei mi kumcna sa puni, 'Guang tho, apu rui suaihiamloumeithiu, mbaanv damclou rap khou rui nangniw khang chamdaanvloumei guangcdic tei guang laa tho.

35 Kalam thu ai ndaapc khou nangniw rui ata titulou khwan e, ai tari khou nangniw rui ata tizangvlou khwan e, ai gin swna guang khou nangniw rui ata laalou khwan e,

36 ai pumtang bam khou nangniw rui pheymbaan tiilou khwan e, ai nnau bam khou nangniw zauclou khwan e, khatni ai kangkai khou bam khou nangniw adaeng khou guang khwan e.'

37 "Khoutei, ravchaptatmei nunc tei rui sa puni, 'Kaipouc, tabui nungc nang ndaapc bammei ta howna aniw titulou kanna cho, khatni nang tari bammei ta howna tizangvlou kanna cho?

38 Khatni tabui nungc nang gin swna guangmei ta howna laalou kanna cho khatni nang pumtang bamna pheymbaan tiilou kanna cho?

39 Hamh e thei, tabui nungc nang nnau bammei khatni kangkai khou bammei ta howna zauclou kanna cho?'

40 Tiki, 'Ai rui nangniw khou kaling siakna sa tuang e: achana pang khou nthyam liangmei gaanv khat khou nangniw rui swloumei tei akhou swlou tu the,' twa guangh tei rui daw puni.

41 "Khoutei katuang baandaw thangc bammei nunc khou tei ni mi kumna sa puni, 'Siangloumei nunc, akhou rui tat pat kan o. Ravsic lev katuang baanchara nunc khang chandaanvloumei tingsaeng mai thangc tat kan o.

42 Kalam thu ai ndaapc bam khou nangniw ata titulou mak ge, ai tari bam khou nangniw ata tizangvlou mak ge,

43 ai gin swna guang khou nangniw ata laalou mak ge, ai pumtang bam khou akhang pheymbaan tiilou mak ge, nnau bam khou khatni kangkai khou bam khou ata zauclou mak ge.'

44 Khoutei kaniw rui ni mundawna sa puni, 'Kaipouc, tabui nungc nang ndaapc bammei ta, tari bammei ta, gin swna guangmei ta, pumtang bammei ta, nnau bammei ta, khatni kangkai khou bammei ta aniw howna nang tuang siamruai swlou mak kanmei tuang naina cho?'

45 Khoutei mundawna, 'Ai rui nangniw khou kaling siakna sa tuang e: Mi nthyam liangmei nunc pang khou gaanv khat khou nangniw rui swlou mak kanmei tei akhou swlou kan makmei luang e,' twa sa puni.

46 Mi nunc hei tingsaeng dandi khou tat puni, liki ravchaptatmei nunc tei ringcsuangmei khou tat puni."

**Jisu ta Swluai Nimei Raeng** (*Mark 14.1-2; Luk 22.1-2; John 11.45-53*)

## **Matthiu 26**

1 Jisu mi lat guay hei sa tang key lana kamei rui kaziap nunc khou sa the,

2 “Zaeng neih nei tangv Kaanpatpui Ngai guang puni the twmei nangniw thay e, kumna Meic Nac Mpouh ta kros khou thaengcluai khang tii pat puni.”

3 Mi tangv amuh daihmei nunc khatni charuangc gaanthaic nunc kazanc Kaia-pha kawmei tingkuh kai khou guang kaduaina,

4 Jisu ta nkamhna nymna swluai khang kaphianh the.

5 Tiki nngay lungc khou thu hei tei sw ti thei lat geic lat lungc pat pungh di the twna kakhanh the.

**Jisu khou Thauh Teyloumei** (*Mark 14.3-9; John 12.1-8*)

6 Jisu Bethani khou mphaanhmei gay datmeipu Simon kai khou,

7 nap tu bam khou meic pui gaanv khat alabastar haan khou loumei kamanv kunghmei mwndui thauc sin guangna kapy khou bunlou the.

8 Hei tei how lana ziap nunc tei kaniw lung h puamcna,

9 “Tabui khang mi hei swmaan bam tu cho? Mi hei kamanv mpeyna khang zuanc lana lungcsimeimei nunc khang tii nuh di ki,” twna sa the.

10 Hei tei thay lana Jisu rui kaniw khou sa the, “Tabui swna nangniw mi pui ti hei sw kaguakc bam tu cho? Kamei rui akhang taanv gaymei akhat taanclou the.

11 Lungcsimeimei nunc thu nangniw lev bam nchamc tanv tan bam puni de, tiki ai thu nangniw lev bam nchamc tanv tan bam ni tu hamh e.

12 Kamei rui apumc khou thauh bunloumei hei ata mbeihlou ni khou swlou nimei tuang tei kamei rui swlou tuang the.

13 Ai rui nangniw khou kaling siakna sa tuang e: Mi gaychamv hei dine likloumei kandih kapwm khou, kamei rui taancloumei hei racna, kata ningtow bam puni.”

**Jisu ta Tinym Nime Raeng** (*Mark 14.10-11; Luk 22.3-6*)

14 Mi tangv ziap ruhna kanei pang khou gaanv khat, kazanc Juda Iskariot kawmeipu rui amuh daihmei nunc daeng thangc tatna.

15 “Ai rui Jisu ta tinym lou e thei nangniw akhang tabui tii diw cho?” twna sa the. Khoutei kaniw rui kakhang daandi paek tamruc phuclou the.

16 Mi tangv tei rui kata tinym nuh khang kadouchamei phu thau the.

**Jisu Kaziap nunc lev Kaanpatpui Ngai Taektw Tumei** (*Mark 14.12-21; Luk 22.7-13, 21-23; John 13.21-30*)

17 Khay lou makmei Ngai tuang reyme nungc, Jisu daeng khou kaziap nunc guangna, “Kaanpatpui taektw nang khang tabui khou swloumei ta kahaw cho?” twna thanv the.

18 Jisu rui kaniw ta kaidai khou tei ndiulouna, mi kumhmeipu khou tatna mi hei kumcna sa o twna sa the, “Dinhpouc rui katuang ganv guang the, kumna nang kai khou kaziap nunc lev Kaanpatpui taektw tu nchamclou ni twna sa e’ twna sa tio.”

19 Jisu rui samei kumcna kaniw taanc the, kumna Kaanpatpui taektw tei chandaanvlou the.

20 Kumna, zingbangc key pwkhou Jisu kaziap ruhna kanei tei lev tu khang dungckey the.

21 Kaniw tu bam khou Jisu rui kaniw khou sa the, “Ai nangniw khou kaling siakna sa tuang e: Nangniw gaanv khat rui ata zuanctu puni.”

22 Khoutei kaniw tei lungh kabiuh sih the, kumna gaanv khat gaanv khat swna, “Ata hamh e ni, Poubauhmei?” twna thanv thau the.

23 Khoutei mundawna Jisu rui sa the, “Ai lev kamkuak akhat na khou num nchamcmei kamei tei rui ata zuanctu puni.

24 Meic Nac Mpouh hei thu kakhang hyloumei thei layna tat bam tuang de, tiki Meic Nac Mpouh ti hei zuanctupui mei tei mu kasan si e dav! Mi pu tei mu puanclou lamc mak ge thei gay ni tuang e!”

25 Khoutei kata zuanctu nimeipu Juda rui mundawna, “Ata ny, Rabbi?” twna sa the. Khoutei, “Nang samei tei the,” twna Jisu rui kakhou sa the.

**Poubauhmei Taektw** (*Mark 14.22-26; Luk 22.14-20; 1 Kon 11.23-25*)

26 Kaniw tu bam khou Jisu rui ntyan dwm akhat laana thuanckulou the, kumna hei tei by bakna kaziap nunc khou tiina sa the, “Nangniw laana tu tho; mi hei apumc the.”

27 Mi tangv buangh akhat laana thuanckulou the, kumna hei tei kaniw khou tiina sa the, “Nangniw mathiucna mi hei zangv tho;

28 kalam thu mi hei meic guay khuay kuaklou khang keyloumei azei the. Mi hei latdyng tuang ze the.

29 Ai rui nangniw khou sa tuang e: drakha thai dui hei ai thu zangv dat ni tu hamh the; tiki aPu Guangcdic khou drakha dui kathanc nangniw lev zangv nchamc dat puni.”

30 Mi tangv kaniw lu akhat suanlou lana Laengkic luangcbut thangc tat kan the.

**Pitar rui Kamei Jisu Mei hamh e Twna Sa nime ta Dine Kasuakcloumei**  
(*Mark 14.27-31; Luk 22.31-34; John 13.36-38*)

31 Khoutei Jisu rui kaziap nunc khou sa the, “Aseic zingbangc hei nangniw ata mpatlou puni, kalam thu, ‘Ai rui lauziu gaenghmeipu ta bailuai puni, kumna lauziu pang tei pak phak puni,’ twna hylou e.

32 Tiki ata tiringcthaulou dat pwkhou ai nangniw suangc Galili thangc tat hu puni.”

33 Khoutei Pitar rui mundawna, “Meic guayna nang ta mpatlou pwsini ai thu mpat zat ni tu hamh e,” twna sa the.

34 Khoutei, “Ai rui nang khou kaling siakna sa tuang e: aseic zingbangc hei nruay khuangh mak khou, nang amei hamh e twna nang rui sa liang kathumh puni,” twna Jisu rui kakhou sa the.

35 Khoutei Pitar rui Jisu khou sa the, “Ai nang lev theic nchamcloumei nganvna ai nang mei hamh e twmei sa zat ni tu hamh e.” Ziap baihmei guay tei rui ni hei tei kumcna sa the.

**Jisu Gethsemani khou Huayneyme** (*Mark 14.32-42; Luk 22.39-46*)

36 Mi tangv tei Jisu kaniw ta nduanghna Gethsemani kawmei bamv khou guang the. Mi khou tei kamei rui kaniw khou sa the, “Mi thangc tei ai huayney khang tat ni he, nangniw mi khou hei dungc bam khwan o.”

37 Kamei Pitar lev Zebedi nac mpouh nei ta nduangh tat the. Lungh ryanramei khatni pingmei kakhou guang the.

38 Khoutei kamei rui kaniw khou sa the, “Lungh ryanramei rui ai theic ni kumc the, nangniw mi khou hei bamna ata rak nduangh bam o.”

39 Kumna kamei hu tat kasuakc khath tw gutna nkhum laamv keyna huayneyna, “Apu, nuh e thei mi buangc hei akhou tii guanglou rio; tiki ai rui ningmei hamh e, nang ningmei de” twna sa the,

40 Mi tangv Jisu kaziap nunc daeng khou guang dat pwkhou, kaniw zip bam khwan the. Khoutei kamei rui Pitar khou sa the, “Nangniw ganvdak akhat na sini ai lev rak nchamc ngam mak khe nah cho?”

41 Nthiammei khou keylou mak khang nangniw ntak nrakna bam o, kumna huayney o. Bumaengh rui thu kahaw e, tiki pumh thu suan the.”

42 Jisu tat pat datna huayneyna sa the, “Apu, mi buangc hei ai zangv mak nuh makpui tuang di the tw e thei, nang ningmei sw kan di tho.”

43 Kamei pat dat pwkhou kaniw zip bam dat muay khwan the. Kaniw zip niime rui khaengv ngam mak khe.

44 Jisu kaniw ta ganclouna tat pat datna mi lat kahak tei sa luan thumhmei swna huayney the.



45 Mi tangv tei kamei kaziap nunc daeng khou guang datna sa the, “Nangniw zipna nthaeke bam di hai? Zauclo, Meic Nac Mpouh la paapcmei nunc baanc khou tiilou nipui ganv guang tangc the.

46 Thau tho, tat di kho, ata zuanctu nimeipu guang the.”

**Jisu ta Nymmei** (*Mark 14.43-50; Luk 22.47-53; John 18.3-12*)

47 Jisu mi lat hei sa bammei dyng khou, ziap ruhna kanei pang khou ka-zauhmei Juda tei amuh daihmei nunc khatni charuanc gaanthaic nunc rui ndiuloumei baengsaeng khatni thingdangv sinmei meic kangdai ta nduanghna guang the.

48 Kaniw rui nym nipuimei kiu, kamei rui kaput nimeipu tei the twna kata zuanctu nimeipu tei rui kaniw khou tei salou the.

49 Juda tei Jisu daeng khou nzut phut guangna, “Chuzaenghmei nai diu, Rabbi,” twna sana kaput he.

50 Khoutei Jisu rui kakhou, “Champanv, nang taanc nimei kiu katumcna taanc tho,” twna sa the. Khoutei kaniw guangna Jisu ta nym the.

51 Khoutei Jisu lev bammei gaanv khat rui katuang baengsaeng sat patna tingkuh bangcpu ta dow tina kanukuanc akhat siap ganc the.

52 Khoutei Jisu rui kakhou sa the, “Nang tuang baengsaeng tei kabamv khou lou dat kan tho. Baengsaeng sinmei nunc tei baengsaeng hu theic puni.

53 Ai rui nkhaslou khang aPu khou ney ti thei kamei rui kauh baanchara tuang rihmei kang ruhna kanei suangc sini geicna kadyng khou ndiu guang nuh de twmei nang thay mak nah cho?

54 Kum khwan e thei akumhna hyloumei tei guang tangc nina cho?”

55 Mi dyng khou tei Jisu rui meic kangdai khou tei sa the, “Kwamtupui mei ta nym ni kumcna baengsaeng khatni thing dangv sinna ata nym khang guang tu cho? Tingmik pum ai Ravkai khou nangniw lev dungcna nchamlou bam tu de; nangniw ata nym mak ge.

56 Tiki muhzwng nunc rui hyloumei tei guang tangh khang mi guay hei pat tuang de.” Khoutei ziap guayna tei kata ganclouna pak kan the.

**Jisu ta Pei Mav khou Zay Guangmei** (*Mark 14.53-65; Luk 22.54-55, 63-71; John 18.13-14, 19-24*)

57 Jisu ta nymmei nunc tei rui kata Riakdanv dinhpouc nunc khatni gaanvthaih nunc bam kaduai bammei bamv tingkuh daeng thangc zay tat the.

58 Pitar tei mpaan hiauh hiauna kathei layna tingkuh kai tuang kaimav nganv lay guang the. Kamei kaimav lungc khou gutna akumh sih puni cho twmei zauh khang kamei rigaanv nunc pang khou lay dungc kazauh bam khwan e.

59 Amuh daihmei nunc khatni pei kapwm tei Jisu ta swluai nuh khang karuc khou saraamhmei sakhi phungc guang khang phu the.

60 Khoutei saraamhmei sakhi sw khang meic mpeyna guang khwan e, tiki kata swluai biuhmei khuay dine ngammei kaniw phu tow mak khe. Nkhamh khou gaanv nei guangna

61 “Ai Ravguangc tuang Ravkai hei ra key lana zaeng neih thumh khou sw thaulou dat ngam e,’ twna mi pu hei rui sa the,” twna sa the.

62 Khoutei tingkuh tei ding thauna, “Mi pu nei hei rui nang ruc khou sa bammei khou hei nang daw pat khang maek khah?” twna sa the.

63 Tiki Jisu lat sa mak ge. Khoutei tingkuh tei rui sa the, “Ringhmei Racguangc zanc khou ai rui nang ta syangdyng tiswpui tuang e: Nang hei Ravguangc Nac Mpouh Khrista kiu cho? Sa o.”

64 Jisu rui kakhau sa the, “Nang samei tei the. Tiki ai rui nangniw khou sa tuang e: Ntaw tangv thu Meic Nac Mpouh hei Ngamparimeipu baanzat thangc dungc bammei khatni muangh khou tuangcna keymei ta nangniw how puni.”

65 Khoutei tingkuh tei katuang pheychuanh siatna sa the, “Kamei Ravguangc ta thouhsw thouhsak makpui lat sa the. Tabui baihmei sakhi aniu kage nai dat hena cho? Kamei rui Ravguangc ta thouhsw makna sa kanmei tei ntaw nangniw chu kan the!

66 Nangniw akumhna kakhanh tu cho?” Khoutei, “Kamei theic biuc the,” twna kaniw rui daw the.

67 Khoutei kaniw rui kazaw khou nteih nsuklou the khatni bai the. Gaanvsaekc rui kata kaphina,

68 “Khrista, nang ta kaphimei hei thow cho, dinc pat ro,” twna sa the.

**Pitar rui Kamei Jisu Mei Hamh e Twna Samei** (*Mark 14.66-72; Luk 22.56- 62; John 18.15-18, 25-27*)

69 Khoutei Pitar tei kaimav khou dungc bam khwan e. Kumna banghpui gaanv khat kadaeng khou guangna, “Nang ni Galilimei Jisu thei laymei e.” twna sa the.

70 Kamei hei tei meic guayna hu khou nuh makna sa the, “Nang sa bammei hei ai thay mak ge.”

71 Kamei kaimav raengv mun khou tat pat pwkhou, banghpui baihmei gaanv khat rui how lana, kadaeng khou ding bammei nunc khou, “Mi pu hei Nazarethmei Jisu thei laymei de,” twna sa the.

72 Khoutei ni kamei nuh makna, “Mi pu ta kiuc ai thay mak ge,” twna syangdyng swna sa the.

73 Kanakmei tangv, mi khou tei ding bammei nunc Pitar daeng khou guangna, “Nang ni kaniw pang khou kazauhmei changh de, nang lat gwan khou rui thay de,” twna sa the.

74 Khoutei, “Ravguangc rui thay kan dio! Ai mi pu ti hei thay mak ge,” twna sa the. Mi dyng khou tei nruay khuangc the.

75 Khoutei, “Nruay khuangh mak khou, nang amei hamh e twna sa liang kathumh puni,” twna Jisu rui kakhau saloumei tei Pitar mi dyng khou tei ningtow the. Kamei kapaengc patna kap ranv sihna kap the.

**Jisu ta Pilat Daeng Thangc Zay Tatmei** (*Mark 15.1; Luk 23.1-2; John 18.28-32*)

## **Matthiu 27**

1 Lauthwan khuanzingh amuh daihmei guay khatni charuangc gaanthaic guay tei akumhna Jisu ta swluai kho cho twmei kaphianh the.

2 Kumna, kata karakcna zay patna Rommei tuang guanghkhyn Pilat khou tiilou the.

**Juda Theihmei** (*Latdiutatmei 1.18-19*)

3 Jisu ta nkhuamei tiswlou kan the twmei kata zuanctumei Juda tei thay la khou, kamei lungh laic the, kumna daandi paek tamruc tei amuh daihmei nunc khatni gaanvthaih nunc khou tei phungc guang datna,

4 “Kakhuay maekmeipu ta swluai khang zuanc tumei hei ai nkhuai the,” twna sa the. “Hei tei aniw thouc hamh the, nang nyng di the,” twna kaniw rui sa the.

5 Syan tei ravkai khou tei phaiclou ducna tat pat lana, karana riang thaengcluai kan the.

6 Amuh daihmei nunc tei rui syan tei laa thau lana, “Mi hei ravkai syan bamv khou lou khang kariak rui nuh mak khe, mi hei zei manv di the,” twna sa the.

7 Kumna kaniw kaphianh lana Zentelmei nunc ta phuploupui bamv khang lai kasiamhmei ramv puk akhat mi syan tei rui liu the.

8 Mi kum tina mi ramvpuk ti hei ntaw ni “Zei Ramvpuk” twna kaw bam e.

9 Muhzwng Jeremia rui saloumei tei mi hei kumcna guang tangc kan the. Mi kiu thu: “Kaniw rui dandi paek tamruc tei laa the, hei tei Isaraelmei nunc rui kakhang tii khang nuhmei syan e.

10 Poubauhmei rui akhou tiime i latdanv kumcna kaniw rui mi syan tei rui lai kasiamhmei ramvpuk liu the.”

**Pilat rui Jisu khou Lat Thanvmei** (*Mark 15.2-5; Luk 23.3-5; John 18.33-38*)

11 Jisu Rommei tuang guanghkhyn hu khou guang ding the. Khoutei, “Nang Jihudime i guangc kiu cho?” twna guanghkhyn tei rui thanv the. Khoutei, “Kiuc tina nang sa tuang the,” twna Jisu rui daw the.

12 Amuhdaihmei nunc khatni gaanvthaih nunc rui karuc khou khuay nkhamlouna sa bammei khou kamei lat khat sini sa daw mak ge.

13 Khoutei Pilat rui, “Kaniw rui nang khuay heizu sa bammei guay hei nang chu mak nah cho?” twna sa the.

14 Tiki Jisu kakhau latkaeng akhat na sini mundawlou mak ge. Khoutei akumhmei tuang cho twna guanghkhyn tei ning the.

**Jisu ta Swluai khang Latdanv Patmei** (*Mark 15.6-15; Luk 23.13-25; John 18.39-19.16*)

15 Kaanpatpui Ngai pum guanghkhyn rui kang bammei, meic nunc rui kahawmei gaanv khat ta mpat patmei hei kariak sw bam khwan e.

16 Mi ganv khou tei kazanc tatmei kang bammei Barabbas kawmeipu nai khwan e.

17 Meic kangdai tei guang kaduaipui ganv khou Pilat rui kaniw khou, “Barabbas lev Khrista kawmei Jisu kak khou hei thow ta nangniw khang mpatloumei ta nangniw kahaw cho?” twna thanv the.

18 Kaniw rui Jisu ti hei howtina tii ku tuang e twmei kamei thay e.

19 Pilat tei latzan bamv khou dungc bam khou kanow rui, “Mi kakhuay maekmeipu ruc khou tei nang ramh sw la rio, kalam thu aseic hei amang thangc kalam khou rui ai mpeyna ryanra the,” twna sa guang the.

20 Tiki Barabbas ta mpatlouna Jisu ta swluai khang sa o twna amuh daihmei nunc khatni gaanvthaih nunc rui meic kangdai ta tei katiu the.

21 “Mi nei khou hei thow ta mpatlou o cho?” twna guanghkhyn tei rui sa dat re. Khoutei kaniw rui “Barabbas ta” twna sa the.

22 “Kum e thei Khrista kawmei Jisu ti hei ai tabui sw o twna cho?” twna Pilat rui sa the. “Kata kros khou swluai o” twna kaniw guayna rui sa the.

23 Tiki Pilat rui, “Tabui tuang simei taanv kamei taancna cho?” twna sa the. Tiki kaniw kauc ranv hay hayna, “Kata kros khou swluai o,” twna kauc the.

24 Kamei rui sw bammei guay hei ramhkhat sini gaeng mak khe, abay adapmei pat puni kumc di the twmei how lana, “Mi pu ta swluaimei hei ai rui hamh e!

Nangniw man de!” twna Pilat rui sana dui laana meic kangdai hu khou tei kabaanc khiu the.

25 Meic nunc tei rui mundawna sa the, “Kazei tei aniw khou keylou kan diu, aniw nac nunc khou ni keylou kan diu.”

26 Khoutei kamei rui Barabbas ta mpat pat the, kumna Jisu ta tikathamv tang lana kros khou swluai khang tii pat the.

**Rihmei nunc rui Jisu ta Sinnuime** *(Mark 15.16-20. John 19.2-3)*

27 Mi tangv guanghkhyn tuang ricmei nunc tei rui Jisu ta guangh kai lunge thangc zay gutna rihmei kang kapwm tei rui kadaeng ding huamc the.

28 Katuang phey kathangv ganc lana haengc ringhmei pheychuanh nulou the.

29 Sauh luai pykxim kasiamhna kapy khou runlou the. Kumna katuang nzat baanc khou ntou builwang tisinlouna kahu khou khuksun keyna, “Kalum e, Jihudime guangc,” twna sana sinnui the.

30 Kumna kakhau nteih nsuklou the, khatni ntou builwang tei laana kapy khou bai the.

31 Kaniw rui kata sinnui tang lana, pheychuanh tei kathangv gancna katuang phey tipiulou dat the. Kumna kros khou thaengcluai khang kata zay tat kan the.

**Jisu ta Kros khou Thaengcluaim** *(Mark 15.21-32; Luk 23.26-43; John 19.17-27)*

32 Kaniw tat pat khou Kurenime kazanc Simon kawmeipu ta ariw lana, rihmei nunc rui kata nymna Jisu tuang kros tipuanc the.

33 Kaniw Golgotha (py rou bamv twna e) kawmei bamv khou guang tangh khou,

34 kaniw rui kakhang nkhuemei loumei zouc tii the. Kamei hei tei mbap lana zangv mak ge.

35 Kaniw rui kata kros khou thaengclou lana, san zaucna kaniw katuang phey nzanh the.

36 Khoutei kaniw dungcna kata nkhwan bam the.

37 “Mi hei Jihudimei Guangc Jisu e” twna kata thaengcluaipui khuay tei hyna kapy rue khou daanclou the.

38 Khoutei kwamtumei gaanv nei ta Jisu tuang baanzat baandaw khou thaengclou the.

39 Mi khou tei tat kalw bammei nunc rui kata sinnuina kaniw py kazinhna sa the,

40 “Ravkai ra key lana zaeng neih thumh khou sw thau dat nimeipu, nang rana nang ta kan damc bu cho! Nang Ravguangc Nac Mpouh e thei kros khou rui key o.” twna sinnui the.

41 Mi kumc muayna amuh daihmei nunc, Riakdanv dinhpouc nunc khatni gaanvthaih nunc rui ni kata sinnuina,

42 “Kamei meic baihmei ta thu kanlou laki, karana thu kata kan ngam mak khe. Kamei Isaraelmei guangc e! Ntaw kamei kros khou rui key e thei aniw kakhou lwm puni.

43 Kamei Ravguangc khou lwm e kumna kamei Ravguangc Nac mpouh e twna sa e. Ravguangc rui kata kanlou nii e thei ntaw kanlou kan di tho!”.

44 Kamei lev thaengc nchamclou bammei kwamtumei nei tei rui ni hei tei kumcna sinnui muay the.

**Jisu Theihmei** (*Mark 15.33-41; Luk 23.44-49; John 19.28-30*)

45 Kalaanv ganvdak charuk khou rui tingzyn ganvdak chakiau nganv kandih kapwm zingc khwan e.

46 Ganvdak chakiau dou keymei ganv khou Jisu rui kauc ranvna, “Eloi, Eloi, Lema Sabakh Thani” twna kauc pat khwan e. Mi kabac kiu thu, “ARacguangc, ARacguangc, tabui swna nang ata mpatlou tu cho,” twna e.

47 Mi khou tei ding bammei meic gaanvsaekc rui chu lana, “Mi pu hei Elija ta kaw bam e,” twna sa the.

48 Gaanv khat rui kaluak kalat langhpanv kumhmei khat laa guangna hei tei zoukhiangc khou ntin the, kumna ntou zwan khou louna kakhang tii the.

49 Khoutei, “Nkhwan o, Elija rui kata guang kanlou puni ny zauc kho,” twna baihmei guay tei rui sa the. (Gaanv khat rui buy laana kanaek khou biw the, khoutei dui lev zei pat the.)

50 Khoutei Jisu khwan ranvna kauc patlou dat lana kabumaengc mpatlou kan the.

51 Zauclo, Ravkai tuang khamthingh phey tei karuc thangc rui kabangc nganvna kanei khang siat kaek the, kandih kanuk the, khatni taudaic guay bak the;

52 tarou guay laanclo the khatni nthanmei zip kanmei nunc mpeyna ringcthau dat the.

53 Tarou khou rui patna, Jisu ringcthau datmei tangv kaniw Nthanmei Kaidai khou gut the kumna meic mpeyna khou lyanlou the.

54 Rihpy khatni Jisu ta nkhwan na zauc bammei rihmei nunc tei baengla khatni pat bammei guay tei how la khou ping kasic the, kumna, “Kamei hei Ravguangc Nac Mpouh changh lana di the!” twna sa the.

55 Khoutei Galili thangc rui Jisu siamruai swna kathei lay keymei ntumei mpeyna duh thangc rui phaengc bam khwan e.

56 Mi nunc pang khou kiu Magadalen Meri, Jakob lev Josep pui Meri, khatni Jebedi now kazauh e.

**Jisu ta Mbeihloumei** (*Mark 15.42-47; Luk 23.50-56; John 19.38-42*)

57 Tingzyn key pwkhou Arimathia kaidai thangc rui, kazanc Josep twna kawmei lungcgaymeipu gaanv khat guang khwan e. Kamei hei ni Jisu ziap akhat khwan e.

58 Mi pu hei Pilat daeng khou guangna Jisu pumc tei ney the. Khoutei tii khang Pilat rui latdanv pat the.

59 Josep rui kapumc tei laana pheynuaih mphwanmei kathanc rui kazihlouna,



60 ntau khou langcloumei Josep katuang tarou thanh khou lou the, kumna ntau daihmei rui tarou kaimun tei luangc thinglouna tat kan the.

61 Magadalen Meri lev baihmei Meri tei mi tarou ta tei zauc laanna mi khou tei dungc bam khwan e.

### **Tarou Gaekmei**

**62** Nthuanh thauna, mi kiu Sabbathneic amuh daihmei nunc lev Pharisime nunc Pilat daeng khou guang kariuna,

63 “Kaipouc, ‘zaeng neih thumh tangv ata tiringcthaulou dat puni,’ twna mi saraamhmeipu hei mi kamei ringc bam khou saloumei tei aniw ningtow e.

64 Hei zaeng rui, zaeng neih thumh tangh mak saanv tarou tei gaek khang latdanv patlou o; kum mak ge thei kaziap nunc rui kapumc tei houc tat lana kata tiringcthaulou kan the twna guat reyme khang tei suangc nkhamhmei rui guat kasic ranv pung the,” twna sa the.

65 Khoutei, “Rigaanvmei laa tho, nangniw thaymei kumcna gaek chuyna gaek tho,” twna Pilat rui kaniw khou sa the.

66 Kaniw tatna roukham tauc khou tei laanc pat nuh mak khang madanclo the, kumna rigaanvmei nunc lou the.

### **Jisu Ringcthau Datmei**

#### **Matthiu 28**

1 Sabbathneic tangv, neidak tuang reyme nungc khwanpaengc pat pwkhau Magadalen Meri lev baihmei Meri tarou zauh khang tat the.

2 Khoutei baengla daih zay the, kalam thu Poubauhmei tuang baanchara tingkauh thangc rui keyna ntau tei luangc patlouna, mi ruc khou tei dungc the.

3 Kazaw tingpalikmei riw kumc e khatni kapheybaan gunh kumc mphwan e.

4 Rigaanvmei nunc tei kata pingna kadunh the khatni theic key the.

5 Khoutei baanchara tei rui mi pui nei khou tei sa the, “Ping riu, kros khou thaengc luai kanmei Jisu ta tei nangney phu bam tuang e twmei ai thay e.

6 Kamei mi khou hei bam mak khe, kamei rui saloumei kumcna kamei ringcthau kan the. Kata nziloupui bamv hei guang zauc o.

7 Nangniw katumcna tat lana, ‘Kata tiringcthau kan the, kamei Galili thangc nangniw suangc tat hu kan puni the. Mi khou tei nangniw kata how puni the,’ twna kaziap nunc khou tei salou ti tho. Mi hei ai rui nangney khou kadyloumei tuang the.”

8 Pingmei khatni neihlamei rui padikna, kaziap nunc khou dinclou khang kaney katumcna tarou bamv khou tei rui pak tat kan the.

9 Zauclo, Jisu kaney ta ariwna, “Nangney khou chuzaenghmei nai diu,” twna sa the. Khoutei kaney kadaeng khou guangna kaphay sinna kalum the.

10 Khoutei Jisu rui kaney khou sa the, “Ping riu; nangney tatna achana nunc ta tei Galili thangc guang tho twna salou o. Mi khou tei kaniw ata ariw puni the.”

### **Rigaanv nunc rui Pouloumei**

11 Mi pui nei tei kaney tat nipui chaeng tat kan khou, rigaanvmei nunc gaanvsaekc kaidai khou gutna pat kanmei guayna tei amuh daihmei nunc khou salou the.

12 Amuh daihmei nunc tei gaanvthaih nunc lev kaphianh lana syan rihmei nunc khou tei tiina,

13 “Aniw zip kan khou zingbangc kaziap nunc guangna kata houc tat kan the,’ twna meic nunc khou sa o.

14 Mi hei guanghkhyn rui chu pwsini, nangniw ping khang maek ge, aniw rui kata thu sa thimlou kan ni de,” twna sa the.

15 Rigaanvmei nunc tei syan tei laa lana kaniw ta sa o twmei tei kumcna kaniw sa the, kumna mi pary hei Jihudimei pang khou ntaw nganvna mi hei kumcna rac bam e.

**Jisu Kaziap nunc ta Ariwmei** (*Mark 16.14-18; Luk 24.36-49; John 20.19-23; Lad 1.6-8*)

16 Ziap ruhna khat tei Jisu rui kaniw ta guang o twna saloumei bamv Galili khou naime chynghbut thangc tei tat the.

17 Kata how pwkhou kaniw kata kalum the; tiki gaanvsaekc rui thu lwmsi the.

18 Khoutei Jisu guangna kaniw khou sa the, “Tingpuk khatni kandih kapwm rue khou ngamv akhou tiilou the.

19 Hei zaeng rui, nangniw tatna zaatc kapwmna ta aziap kasiamh o: kaniw ta Pu, Nah Mpouh, khatni Bumaengh Nthanmei zanc khou duiluplou o;

20 ai rui nangniw khou tiilou kanmei latdany guay tei piu khang kaniw khou nchamlou o. Kumna zauclo, kandih zuk luaime nganv ai nangniw ta kaganv kathuic bam nduangh bam puni.”